

Owera kobodorouti

Tarena urio neito amadi-emeiriai-ri

¹ Nirimagare Tiopira, mo ro keba se ata buka ta-nosioidiro Iesu sapuwo to nou ro etou tanaro isioidirotiti ibose nou ro urubia beda sosoro to itamudirotiti.

²⁻³ Iesu woko edi tau ato na-gitamuai womu tato nou Godi ro ti-gowioro Adiri sabowa to, mo ro imese sirio owera Iesu sapuwo to ta-nisioidiro. Iesu bobo rido na-geribua nou 40 saiki to ta-gomidiro duriomoro ato, ina kowasoro urubia aboto ta-gorowawuti. Ibose kowasoro urubia nou ro erere tanaro to umoro ta-iwaititi ibo nou morobise durupi to ta-geribua-ro. Taie neio nou ro nato imowautititi Godi ro kiwabo tanaro beda sosoro ra. Iesu ido gowioro, tauo keba se nou ro kitiodorai urubia to na-giapoi umoro owera nou ro iato gimowauti, Tarena Urrio edi pupuwo korosa ro neito gimowauti.

⁴ Nu neio mutu ohona na-giho nou ro ibo, 'Nio Ierusalem sabowa tauo se emeserai ate, nato ba-dorowomidiro womu tato Tarena Urrio nio aboto neito namadi-emeiriai-ri. Mabu Abera ro keba se ta-garo ibo "Tarena Urrio anamadi-emeiriai-ri," ibose nio mo ro ta-nimowauti.

⁵ Nio Ioane ro obo to se iwarumiautititi, saiki sirio oroporeai-ri pua, aupise owamo nio Godi ro Tarena Urrio to nato ama-iwarumiauti-ri.'

Iesu Godi ro gowioro Adiri sabowa to

⁶ Iedi tau ro nato kitiodorai urubia Iesu mutu atu moro ato gorowomidiro. Taie neio Iesu aboto nato gerewesegerai-rimo neio ro ibo, 'Abera Naramu, abora nimo Iu urubia simara eputa dubu to oro ro ama-ararasoro-ri ra? Ina abora Roma urubia oro ro neido ama-iaipirio-ri ra?'

⁷ Ina Iesu ro neio ibo gimowameai, 'Idaibo sosoro umoro nio abato owamo-ri pua. Abera nakara se ie idaibo sosoro tanaro nou simara korosa to kosioidiro tau ta-gihoduti.

⁸ Kaupoti Tarena Urio neito amadi-ou-ri nio nou ro ama-iatimai-ri, pupuwo nou ro ama-imio-ri. Nio ro mo sapuwo to owera amadimo-obodorouti-ri Ierusarema sabowa ato, ina neido Iudia duriomoro to, ibose Samaria duriomoro to, ina ioudo amadimo-obodorouti-ri imese duriomoro gabogabo to.'

⁹ Nedi owera ro nou ro karo na-goporeai, taie nu Godi ro goto rido aise gaubidiro imese gowioro neio sosoro gabo ato. Na-gowioro neio ro ibose to gemawotidiro-rimo, womu tato tema ro ti-gahidimai.

¹⁰ Neio isana a-giawotidiro-rimo iato urubia dubu teibo keakea namabu to ta-geremeduti-rido imese gotoi-rido neio abato.

¹¹ Neitiro ro ibo, 'Gariri urubia nio nato na-orowotoi etou emawotidiro-dumo? Nedi atu dubu ro nou beda sosoro ioro neido Adiri sabowa to, nou neito idaibo sosoro amadi-orowameai-ri.'

¹² Iesu kitiodorai urubia neio Oribi podo rido na-giroruo-ro imese gorowameai-rimo

Ierusarema sabowa to, Oribi podo aupise gowamo muso ia pua.

¹³ Taie neio ito na-gorowameai-rimo Ierusarema sabowa to, neio bato irowomidirotiti ata ohu moto neito imese godoro-rimo.

Nedi urubia ro neio ie: Pita, Ioane, Iemisi, Enduru, Piripi, Tomasi, Batoromiu, Mataio, ata Iemisi nou Arapisi mere ie, Saimoni Roma urubia nou ro ihoiotiti, ina Iudasi nou ata Iemisi mere ie, neio iato ibo gorowomidiro.

¹⁴ Neio Godi aboto atu se iraratorotiti-mo ibose neio nakara se pua, amia mamio ito ta-gou-rimo neio mutu. Ata nou e Iesu edi mamu ro Maria nou ta-godoro Iesu niramio mutu neio atu se iato iraratorotiti-mo.

Iudasi bobo korobai dubu gaubai-rimo

¹⁵ Imese kimibiria urubia iedi tau ro nato kaupoti moro to ta-gorowoiriamuti-rimo, neio imese sirio se kioputi ato 120 urubia ie. Taie Pita turi rido aise gerehidiro

¹⁶⁻¹⁷ nou ro ibo, 'Kimibiria naminiramio, keba ia tau ato Tarena Urio edi ipusu owera ro Deibidi ro Tarena Buka ato nou gisioidiro. Iedi owera ro Iudasi sapuwo to gisioidiro. Iudasi nou nimo boinana ie woko atu se nisioidirotiti-mo ina nou nimo aboudo gosuruo-ro. Iudasi ro gimudo urubia Iesu aboto taie neio ro nou nato gohiai-rimo.'

¹⁸ (Iudasi mani ta-gomia-rimo edi ubauba tanaro ro na-gosioidiro nou sapuwo to, ina nou ro iedi mani ro neito pari se gomidai. Iudasi eputa to garararo niro aise garapusia, itame nakara moro ato imese giamo.

¹⁹ Ierusalem sabowa urubia ro edi owera ro na-girorowai-rimo 'Io Iudasi idaibo tanaro to gororosoiديو, ina edi pari ro masiro neito gomia-rimo Akeredama. Neio simara owera ato maumo owamo ibo, Karima Paso Pari.)

²⁰ Ina Pita ro ibo, 'Ohare Tarena Buka ato tiamo ibo, *Nou duriomoro abora huruku se ba-mowamo, ata ro nou moto ato omidiro mam.* Ibose ina Ohare Tarena Buka ato tiamo, *Ata dubu ro nou bobo ato kiauri woko ba-morobai.'*

²¹⁻²² Pita ro ina ibo, 'Ina noudo ie ata dubu ro nou bobo ba-morobai nimo kimadabuai aboto Iesu pamo rido na-geribua-ro nou sapuwo to owera imowauti ri. Nedi dubu ro nimo mutu ta-irohotiti keba se Iesu edi tau ato goroho, Ioane ro obo to urubia na-iwarumiautiti womu tato Iesu Godi ro ti-gowioro Adiri sabowa to. Io idaibo sosoro dubu modobo ie nou kaubai nimo iwarebai ri urubia owera kimowauti ibo Iesu bobo rido ta-geribua.'

²³ Neio ro netewa teibo dubu teibo iato giaubai-marimo Iosepa-Barasaba (nou ata masiro Iasiti), Matiasi mutu.

²⁴⁻²⁵ Neio iato gararatoro-rimo, 'Abera Naramu oro tirarowo-die urubia kimaragoidiro beda sosoro ra, oro nakara se umoro ie. Iudasi nimo aboudo ta-gosuruwo-ro nou boido gororomidai-ro neito gorowameai. Abera Naramu nimo dimowapotai-ro beda dubu ro ama-orobai-ri Iudasi bobo.'

²⁶ Taie durumai teibo netewa teibo dubu teibo ro iato giwagoberai-marido ata Matiasi sapuwo to ie, ata Iosepa sapuwo to ie. Matiasi durumai ro gagobeidiro tuturu tau to taie Iudasi edi bobo ro nou ro aise gorobai. Nou kotiodorai dubu to

aise gararapoi, keba se 11 ro goroho-rimo ina
nou ro na-gimadabuai neio imese 12 aise
goi-rimo.

2

Tarena urio na-gororuwo-ro

¹ Ohona Kiwoiriamuti Sorionu saiki
na-gereredea, imese kimibiria urubia neio
kaupoti moro to ta-garadabuti.

² Ina auna diamo gebari nato gororosioihiro
toboro rido na-gororuwo-ro, neio nou ro
a-gimabuo-ro. Iedi diamo ro surama diamo beda
sosoro ra idaibo sosoro ie. Neio beda moto ato
gorowomidiro iedi diamo ro nou ro aise
giahidimai.

³ Neio ro ata nakomu nato gowea-rimo, iedi
nakomu ro ioudo na-gororuwo-ro turupina pina
beda sosoro ra ohu rido nou ro gororuwo-ro.
Iedi pina ro neio ro gororoburutai-rimo erere
kimibiria urubia durupi ato aise gomititi-rimo.

⁴ Neio iato Tarena Urionu ro aise giworohuti, nou
ro modobo giwai neio umoro tato oweru to
eremowagomea ri.

⁵ Nedi tau ro nato arua Iu urubia Godi etio ro
emaragoidiroititi-mo neio ibose to gorowomidiro
Ierusarema sabowa ato. Neio sirio duriomoro
rido apira gou-rimo ito.

⁶ Taie neio ro kowasoro urubia oweru
na-gimororowai-rimo neio atu moro to aise
garadabuti-rimo. Mabu neio aborabora ro
girobai idaibo sosoro tanaro neio ro kiauri pua.
Idaibo urubia erere oweru to
na-geremowagomea-rimo

⁷ abora tanaro ro gororosioidiro, iato neio auna kimaragoidiro ro giopia.

Taie neio ro ibo, 'Nedi urubia ro na-eremowagomea-dumo neio Gariri duriomoro rido ra?

⁸ Kaupoti nimo ro ti-nemewidiro-dumo neio beda oweru to eremowagomea-dumo. Neio umoro beda sosoro oi-dumo?

⁹ Nimo duriomoro erere rido noroho-dioumo nimo arua Patia rido ie, Media, Eramu, nimo amia Mesopotamia rido ie, Iudia, Kapadosia, Ponitasi, Eisia,

¹⁰ Piridia, Pampiria, Isipi, Sairini goto ato Ribia duriomoro ato na-owamo, Roma,

¹¹ Kiriti daro Arabia. Nimo arua Iu urubia ie ina nimo arua Iu urubia to nararapoi-rimo. Kaupoti nedi urubia ro nimo ia oweru to na-warodumo ti-nimewidiro-dumo. Godi ro beda meamea tanaro gisioidiro nou sapuwo to eremowagomea-dumo.'

¹² Modobo pua nedi tanaro ro apira urubia ro maumo mea se kowea, neio kimaragoidiro ro giopia. Taie neio nakara se iato geremodoruti-rimo, 'Nedi tanaro ro na-wororosioidiro-dumo nou maumo beda sosoro ra?'

¹³ Kaupoti neio arua urubia ro a-gimasosowado-rimo ibo, 'Nedi urubia ro koko obo idio-dumo.'

Pita ro urubia gimowauti

¹⁴ Pita aise geribua arua 11 kitidorai urubia mutu, taie nou ro ibo urubia sirio aboto, 'Mo borubi Iu urubia nio Ierusarema sabowa ato nato na-orowomidiro, gare neito mea se

diedea-rimo. Mo beda ower a nama-aro-ri mea se ba-dimidai-mo.

¹⁵ Nio ro imaragoidiro-dumo nedi urubia ro idio-dumo, kaupoti neio idio pua. Saiki ta-idiai-ro nou kowaroho saiki ie.

¹⁶ Godi ipusu ower a dubu Ioere tagara tau ato ta-gomidiro nou ro ower a keba se ta-gisioidiro nedi tanaro ro notororosiodiro-dumo nou sapuwo to. Ioere ro ibo

¹⁷ *Godi ro aro-die nedi ower a ro, Womu tau ato mo ro Tarena Uri o anamadi-emeiriai-ri imese urubia aboto, ibose nio merebusere ro mo ipusu ower a amadimi-imowautiti-ri. Nio orio domere, oromano babio neio aboto mo ro hiwo to tanaro patu anama-iwawutiti-ri.*

¹⁸ *Iedi tau ro nato mo ubi tanaro etio ro isiodiro-dumo upi dubu neio aboto mo ro Tarena Uri o anama-emeiriai-ri neio ro mo ipusu ower a amadimi-imowautiti-ri.*

¹⁹ *Mo ro pupuwo korosa tanaro anama-isiodiro-ri toboro ohu ato ibose sopo duriomoro ato, urubia ro amadimi-iauri-ri idaibo era, karima, kaparuti gahuta.*

²⁰ *Saiki ibo otoi-ri pua duwoduwo ama-oi-ri, sogomi karima ro ama-orobai-ri. Ina iedi tau ro nato mo edi koto saiki ro nato auna ia meamea tanaro ro amadimo-ororosiodiro-ri.*

²¹ *Mo etio ro nororu-dumo neio mo ro kiapopo ie ubauba aboudo.'*

²² Pita ro ina ibo, 'Isiraere urubia, ower a neito dirowidiro-rimo. Iedi Nasareta dubu ro Iesu nou ro pupuwo korosa tanaro ta-gisioidiro. Nou ro na-gisioidiro Godi ro giwawuti-ro ibo Iesu gemeiriai-ro neito, mabu Iesu ro Godi edi pupuwo ro neito gisioidiro. Nio umoro

ta-goi-rimo mabu nedi tanaro ro nio abato
gororosoiديو-ro-rimo.

²³ Godi ro keba tau ato Iesu ta-garapoi ubauba
urubia aboto aiwai ri. Ina nio ro ubauba urubia
tu to noti gedea-rimo ina iato gemopoguti-rimo
ota kemowotowa teibo ato araburai ri.

²⁴ Kaupoti nu Godi ro pamo rido
ta-gowameai-ro. Godi ro nou pamo temeteme
aboudo ta-gemapoduti mabu nou pamo ro
modobo pua tuturu tau to kowarabu.

²⁵ Deibidi ro keba se idaibo owera ta-garo Iesu
sapuwo to. Nou ro ibo, *Abera Naramu mo sosoro
gabo ato timidirotiti ina ibose mo tere owamo-ri
pua mabu nou mo abato aupise tomidiro.*

²⁶ *Ina noudo ie mo giropu ato kamade ro
ama-owamotiti-ri. Mo aboudo sirio tau kamade
owera ro amadimo-osuwoduti-ri. Mo aboto Godi
ro meamea tanaro kisioidiro aboto mo nou
anama-imasebidi-ro-ri.*

²⁷ *Abera Naramu ro Dudi ato mo tuturu tau to
emaui-ri pua. Mo Tarena dubu nou ia se ie, ina
mo durupi nou ro emaui-ri pua kepuse aboto.*

²⁸ *Mo nou ro keremiro gabo
ta-nemowapotai-ro. Mo nou ro kamade nowaititi,
ina nu mo abato aupise imidirotiti.*

²⁹ Mo borubi Iu urubia nirimagare babio nio
mo ro tuputupu se mimowapotai-ro ibo, nimo
nasa Deibidi ta-garaburai nato gemoba-rimo ina
nou bobo nato towamo.

³⁰ Deibidi nou Godi ipusu owera dubu e, nu
umoro ie Godi beda owera garo-ro nou aboto.
Godi ro keba se Deibidi ta-gemowapotai ibo,
“Oro nasa ro ama-omidiro-ri eputa dubu to, oro
abora idaibo sosoro na-omidiro.”

³¹ Ido amadimo-ororosioi diro-ri Deibidi keba se umoro ta-goi. Ina nou ro nou ri gutura ibo, “Godi ro kohodowa dubu Dudi ato tuturu tau to emauriai-ri pua, ibose nou durupi epuse-ri pua. Godi ro nu ama-owameai-ri pamo rido,” ina Deibidi ro nedi oweru ro nou sapuwo to gisioi diro.

³² Ina Iesu nou se ie Godi ro kohodowa dubu nou ro ta-gowameai-ro pamo rido. Ina saro gabo ato nimo ro imese ta-nowea-rimo.

³³ Iesu Godi ro ta-gowioro Adiri sabowa to, ina nou abora Godi tumodi sapuwo ato omidiro-die. Ibose Abera Godi ro Tarena Urío Iesu ta-gemapoí, keba se idaibo sosoro oweru to ta-garo noti gororosioi diro-rimo. Ina Iesu ro emeiriái-die Tarena Urío nimo aboto, abora nou e, nio ro tiauri-dumo ina oweru tirowidiro-dumo nou aboudo.

³⁴ Deibidi owioro pua Godi ro Adiri to. Kaupoti Deibidi ro ibo, *Godi ro ibo mo edi Abera Naramu ro nou aboto Oro ba-domidiro mo tumodi sapuwo ato,*

³⁵ *womu tato oro nasa urubia oro sairo mabu ato imese nama-iwomititi-ri oro ro ituti ri.*

³⁶ Io edi dubu ro nou se ie Iesu nio ro ota kemowotowa ato na-gemopoguti-rimo, Iesu Godi ro nio Abera Naramu to gapoi, ibose Godi ro kohodowa dubu Iesu nou se ie. Isiraere urubia nio morobise umoro doi-mo abora!’

Urubia sirio Pita oweru gimibiria-rimo

³⁷ Urubia sirio ro na-girowai-rimo Pita ro edi oweru to gimowauti neio giropu mibo ro aise girobai. Taie neio ro Pita arua kitiodorai urubia

mutu nato gimodowa-rimo, 'Namuturubi nimo ina beda sosoro nama-orowomidiro-ri?'

³⁸ Taie Pita ro neio iato gimowameai, 'Nio imese derewesegerai-mo ubauba aboudo Godi aboto, ina nio obo to nimo ro nato anamadimi-iwarumiauti-ri, nio Godi ro kohodowa dubu Iesu nou kowasoro urubia to nato aise amadima-ararapoi-ri. Nio ubauba nou ro nato imatopeamuti rie. Ina ibose Godi ro Tarena Urío nio aboto nato amadi-emeiriai-ri.

³⁹ Nedi owera ro keba se ta-gou-ro nio aboto nio merebusere mutu, ibose beda urubia ra muso duriomoro ato na-orowomidiro neio Godi ro tiramairi-die nou aboto oroho ri.'

⁴⁰ Pita ro neio sirio owera to gitomu nou ro ibo, 'Nio mo ro a-nimagege ubauba tanaro urubia ro abora na-isioidiro-dumo neio ro edi ubauba wisa ro namadimi-imidai-ri, modobo pua nio atu sosoro wisa kimidai neio mutu, nio ioudo ba-daragarewado-rimo!'

⁴¹ Pita owera edi urubia ro gimibiria-rimo mea se neio imese obo to aise giwarumiauti-rimo ina iedi atu saiki ro nato 3,000 urubia neio ro garadabuai-rimo Iesu kowasoro urubia aboto.

Kimibiria urubia ibo gorowomidiro

⁴²⁻⁴³ Kitiodorai urubia ro edi awawo korosa tanaro ro na-gisioidiro-rimo, sirio urubia neio aborabora ro girobai. Iedi tau ro nato kimibiria urubia ro auna karatamudiro iaurititi-mo kitiodorai urubia aboudo. Kimibiria urubia naminiramio sosoro iroworohutiti-mo, ibose neio Iesu Nirimagare Ohona ta-isioidirotiti-mo, ina atu se Abera Godi aboto auna se iraratorotiti-mo.

⁴⁴ Kimibiria urubia ro neio atu moro ato iradabutiti-mo neio eremahodawadotiti pua. Neio namabu sirio ibo pua kaupoti mere ro nakara se kiworohuti, neio imese namabu sirio aise iromiotiti-mo.

⁴⁵ Neio goto na-iaiwotiti-mo mani na arua urubia aboto, ina edi mani ro na-imadetiti-mo, mani tato urubia neito iwarebidirotiri-mo, ibose arua mani neio nakara se iromiotiti-mo. Ibose neio namabu aise giaiwo-rimo mani urubia aboto iwamade ri, taie edi mani ro neio ro mani tato urubia gimio-rimo.

⁴⁶ Ina sirio kimibiria urubia Tarena Moto ato sirio saiki aise iradabutiti-mo. Neio ibose erere moto ato ta-wiradabutiti-mo ohona atu se iato gidimi-iho-ri. Neio auna kamade ie ohona idaibo na-iromio-mo,

⁴⁷ Godi na-emowabutiti-mo, urubia sirio edi sabowa ro iato na-gorowomidiro kowasoro urubia aboto auna kamade oititi-mo. Ina saiki gabogabo edi urubia ro Abera Naramu ro na-iapopotiti-ro, nou ro kimibiria urubia aboto aise idabutiti.

3

Sairo ubauba dubu Pita ra Ioane ra ro gowai-rido meana

¹ Ata saiki Pita ra Ioane ra Tarena Moto to gidiai-rido. Iedi tau ro nato adimo saiki ro gowamo, neitiro nato godoro-rido Tarena Moto to Godi aboto araratoro rie, saiki gabogabo Iu urubia ibo isioidirotiti-dumo ito nou ri gou-rido.

² Iedi Tarena Moto ro kodouti moro ato, ata dubu iato gomidiro, iedi dubu ro nou mamu ro ibose to goroto sairo ubauba mutu. Nou sirio tau

namuturubi ro Tarena Moto magere damo masiro owamo ibo Mea Sosoro Magere nu neio ro nato owomititi-mo, urubia nagi-irimodouti-ri Tarena Moto to, nou ro urubia mani ri iato gi-iwaro-ri, 'Ei mo buro mani to kowarebai modobo ra?'

³ Nu sirio tau ibo iwarotiti urubia, taie iato Pita ra Ioane ra na-gou-rido iedi dubu ro neitiro nou ro na-giwia-ma nou ro ibo, 'Mo buro mani domia-rido!'

⁴ Kaupoti Pita ra Ioane ra ro idomari nou ato se giwotobowa-rido. Taie neitiro ro ibo, 'Neitiro oro ro ma-diwia-marol!'

⁵ Taie iedi dubu ro idomari neitiro ato se giaro, nou ro ibo a-gimaragoidiro, 'Mo neitiro ro mani anamadido-omia-ri.'

⁶ Kaupoti Pita ro ibo, 'Mo mani tato ie, imese pоторо ia ie, kaupoti mo abato edi nakomu ro na-owamo oro mo ro nou anama-omia-ri. Iesu Keriso Nasareta dubu edi pupuwo ro neito oro abora dotobowa, doroho!'

⁷ Pita ro edi dubu ro tumodi tu rido aise gewebidiro. Tuturu to pua edi dubu ro nou sairo mau teibo aise garadoborea-rido,

⁸ nou nakara se iato a-geremasibai, 'O mo meana ta-noi.' Taie nou aise geribidiro-ro, koroho iato gorowaibirio. Pita ra Ioane ra Tarena Moto to na-godoro-rido iedi dubu ro ibose to godoro neitiro mutu. Nou kamade mutu a-gererepedu Godi na-gemowabu

⁹ iedi tanaro ro na-gororosoidiro,

¹⁰ urubia ro na-gowea-rimo neio umoro nato goi-rimo ibo, 'O nedi dubu ro na-imidirotiti koroho tato Tarena Moto magere damo ato

na-owomititi-mo mani ri na-iwarotiti, nedi dubu ro nou se ie.'

Urubia ro na-geibimai-rimo nedi dubu ro, auna ia kimaragoidiro ro giopia. Neio modobo pua umoro koi aboto nedi tanaro ro beda sosoro to gororosioiido-ro-rimo, abora tanaro ie.

Pita ro gimowauti oweru Tarena Moto ato

¹¹ Iedi togiri dubu ro Pita ra Ioane ra aboudo aise girarebidiro. Urubia iato auna kimaragoidiro ro giopia taie neio iato gorowarario-rimo neitiro aboto. Neitiro Soromoni iedi Tarena Moto tamu ro nou maumo ato gotoi-rido.

¹² Pita ro ibo, 'Isiraere urubia, etou mabu ato imaragoidiro-dumo auna se? Neitiro nio ro etou mabu rido niauri-madioumo, nio etou idomari ra? Nio ibo a-imaragoidiro-dumo ra neitiro ro nedi togiri dubu ro koroho aboto simara pupuwo to a-nowotobowa-do ra? Nio ibo a-imaragoidiro-dumo ra nedi tanaro ro na-ororosioiido mabu neitiro mea dubu teibo ie? Ee!

¹³ Aberaham, Aisaki, Iakobo, nimo abeamio nasaio ro na-emowabutiti-mo Godi, nou ro nou sowake dubu Iesu masiro auna ta-gowai, nou mabu ato ororosioiido nedi tanaro ro. Kaupoti nou nio ro ubauba urubia aboto ta-gapoi-rimo opia ri, ibose Paireti ubi ta-goi nou dibura rido owagare ri.

¹⁴ Paireti nio ro gemowapotai-rimo ibo, "Nimo ubi tato ie Iesu kosuruwo aboto, urubia kiopiauti dubu ro mosuruwo-ro dibura rido."

Iesu imese meana ia ie daro morobise ie kaupoti nio ro a-gebeiouti-rimo nou aboto nio ata ubi tato ie.

¹⁵ Nio ro noudo ie keremiro kimio dubu kopia, kaupoti nedi dubu ro Godi ro ta-gowameai-ro pamo rido, ina nimo ro ta-niauri-rimo simara idomari to.

¹⁶ Iesu Keriso iedi pupuwo korosa ro nedi togiri dubu ro meana nou ro gowai. Nodi tanaro ro neido ororosioihiro mabu neibi kimibiria tiamo Iesu sapuwo to, nio umoro ie nedi dubu ro, abora simara idomari to notiauri-dumo nou imese meana ta-woi mabu nou kimibiria auna ie Iesu sapuwo to.

¹⁷ Nirimagare mo borubi Iu urubia, nio ro gisioihiro-rimo nedi tanaro ro Iesu aboto, kaupoti nio umoro oi pua etou tanaro gisioihiro-rimo, ina atu sosoro ie nio kiwabo iurubia ibose umoro oi pua.

¹⁸ Godi ro keba se ta-garo nou ipusu owera urubia aboto nedi tanaro ro ororosioihiro ri, idaibo nou edi kohodowa dubu ro temeteme iwia ri ina araburai ri.

¹⁹ Nio abora modobo ie mea se kerewesegerai Godi aboto, nio edi ubauba ro nou ro nato imatopeamuti rie. Ina iato nio Abera Naramu ro orio pupuwo

²⁰ amadi-imio-ri, ina Iesu nou ro nio aboto amadi-emeiriai-ri nou ro na-gapoi kohodowa dubu to.

²¹ Kaupoti Iesu modobo ie Adiri sabowa ato komihiro womu tato tanaro patu Godi ro meana nama-iwai-ri. Godi ro nedi tau ro nou sapuwo to keba se giwauti-ro nou tarena ipusu owera

urubia aboto.

²² Mose ro ta-garo keba se, *Nimo edi Abera Naramu ro Godi, nou ro amadi-apoi-ri ata ipusu owerā dubu mo beda sosoro ra. Nedi dubu ro nio aboudo ama-aubai-ri, nio ro nou owerā se ba-dirowidiro-rimo.*

²³ *Etio ra nou owerā kirowidiro tato neio modobo ie kiopiauti, Godi edi urubia ro neio aboudo imese amadima-araseperai-ri.*

²⁴ Godi ipusu owerā urubia Samuere beda tau ato gomidiro womu tato abora neio ro atu se ta-gorowauti-rimo nedi tanaro ro nimo abato na-gororosioidiro-rimo nou sapuwo to.

²⁵ Godi ipusu owerā urubia ro edi na gowauti-rimo nimo ro noti nowea-dumo. Nimo ro ta-nowea-rimo Godi ro keba se beda owerā garo nio nasaio aboto. Nou ro ibo gutura Aberaham aboto, “Oro merebusere aramio aboudo imese sirio duriomoro urubia nedi sopu goto ro nato meana amadimi-iauri-ri.”

²⁶ Godi sowake dubu Iesu, nou ro na-gapoi-ro nio aboto keba se ta-gemeiriai-ro, nou ro nio imese korosa iwai ri ubauba tanaro kisioidiro aboudo iwesegerai ri.’

4

Pita ra Ioane ra neitiro Iu eputa urubia sosoro gabo ato gotoi-rido

¹ Pita ra Ioane ra urubia owerā ibose to gimowauti-rido, iedi tau ro nato Iu eputa urubia nato gou-rimo neitiro aboto. Iedi urubia ro neio ie, amia turituri urubia, amia Sadusi urubia, ina Tarena Moto kemotoi auna dubu,

² neio ubauba kimaragoidiro mutu gou-rimo. Mabu nedi kitidorai na teibo ro neitiro ro urubia ata sosoro gitamudiro-rido, ibo Iesu bobo rido ta-geribuwa ina pamo urubia idaibo sosoro amadime-eriburio-ri bobo rido.

³ Nedi eputa urubia ro neio ubi ie Pita ra Ioane ra koto aboto iwou-ma ri kaupoti saiki ta-goriodoi, neitiro neio ro nou ri girobai-marimo duwoduwo moto to aise giedea-marimo kowaroho iwou-ma rie koto aboto.

⁴ Kaupoti neitiro ro edi mea owera ro gorowauti-rido Iesu sapuwo to, ina urubia sirio ro na-girowidiro-rimo neio imese ta-gimibiria-rimo, neio kowasoro urubia mutu atu se na-garadabuai-rimo imese 5,000 goi-rimo.

⁵ Ata kowaroho Iu eputa urubia daro Mose sabi kitamudiro urubia neio kaupoti moro to ta-garadabuti-rimo Ierusarema sabowa ato.

⁶ Anasi nou Godi ra urubia ra turituri eputa dubu e, nou urubia mutu idaibo Kaiapa, Ioane, Arekesanida ibose to gorowomidiro.

⁷ Taie neio ro Pita ra Ioane ra iato giwotobowa-marimo neio sosoro gabo ato ina iato gimodoruti-marimo. Neio ro ibo, 'Nitiro ro edi tanaro ro na-osioidiro-do etu ro imapoi-ma, etu ubi ato osioidiro-do edi tanaro ro?'

⁸ Pita Tarena Urío ro goworohuti taie nou ro neio nato gimowameai ibo, 'Nio eputa urubia na-orowotoi,

⁹ nio ubi ra neitiro kimodoruti-ma aboto nedi nirimagare tanaro ro neitiro ro na-nosioidiro-do nedi togiri dubu ro nou aboto? Nio ro ibo

a-nimodowa-madioumo ra nedi dubu ro beda sosoro oi meana?

¹⁰ Nio urubia sirio na-worowotoi imese sirio Iu urubia mutu nio umoro doi-mo ibo nedi dubu ro neitiro ro owai pua meana, nu Iesu Keriso Nasareta sabowa dubu edi pupuwo korosa ro nu nou ro owai meana, abora nio sosoro gabo ato nototoi nu. Iesu nio ro gemopoguti-rimo ota kemowotowa teibo ato kaupoti nedi dubu ro Godi ro ina ta-gowoubua-ro bobo rido, nou abora keremiro ie.

¹¹ Iesu *posi ie, nio moto keremari urubia ro kakate moro ato gedea-rimo, kaupoti nu turimida posi nou se titoititi.*

¹² Iesu nakara se nou se ie ata tato ie urubia ubauba aboudo kiapopo aboto. Ata dubu ata omidiro pua nedi duriomoro gebari ro nato urubia ubauba aboudo kiapopo aboto.'

¹³ Iedi Iu awawo urubia ro neio kimaragoidiro ro giopia Pita ra Ioane ra beda sosoro gotoi-rido ata tere tato neio sosoro gabo ato. Mabu neio umoro ie ibo nedi kitiodorai na teibo ro dorogora se dubu teibo ie, sikuru dubu teibo pua. Neio ibose umoro ie nedi dubu teibo ro sirio tau Iesu mutu ta-irohotiti-do.

¹⁴ Neio ata ro modobo pua karatio nedi tanaro ro, mabu nedi togiri dubu ro sairo meana na-gemowai-rido neitiro gomo ato ibose to gotoi neio sosoro gabo ato.

¹⁵ Taie iedi awawo urubia ro neio ro nato gutura-rimo nedi dubu teibo ro neitiro aboto, 'Nitiro tauo egea mere se dosuruwo-do!'

Neitiro edi kosuruwo ro na-gosuruwo-rido neio nakara moro ato iato geremowauti-rimo.

16 ‘Nedi dubu teibo ro neitiro aboto nimo ro beda tanaro anamadimo-osioi diro-ri? Mabu imese sirio urubia Ierusarema sabowa ato neio imese umoro ta-woi-mo iedi auna korosa tanaro ro neitiro ro na-wosioi diro-do. Nimo ro modobo pua kutura ibo, “Karasaubuti ie, ororosioi diro pua!”

17 Kaupoti nedi owera ro Iesu sapuwo to neitiro ro ina kimowauti modobo pua. Neitiro nimo ro koko owera anamadimi-imia-mari ibo, “Nitiro ro ina imowauti ate Iesu sapuwo to, ibose nedi tanaro ro modobo pua korobodorouti nedi duriomoro ro nato.” ’

18 Taie neio keremowauti na-goporeai-rimo neio ro edi na teibo ro iato giramairiai-marimo odorori. Neitiro na-godoro-rido taie neio iato gutura-rimo neitiro aboto ibo, ‘Nitiro ro Iesu sapuwo to urubia ina imowauti ate!’

19 Pita ra Ioane ra owera mutu iato gotobowa-rido, neitiro ro ibo, ‘Godi sosoro gabo ato mea tanaro boira? Nio ro ma-dimaragoidiro-mo. Neitiro ro modobo ra nio ubi tanaro se kisioidiro o Godi ubi tanaro kisioidiro?’

20 Neitiro modobo pua matagoro kimopai komidiro, neitiro ro edi tanaro ro na-niauri-rido ibose na-nirowidiro-rido, modobo ie urubia kimowauti.’

21 Nedi awawo urubia ro gabo egea se giosora-rimo neitiro ro ubauba wisa kimidai aboto. Ina nou rie Pita ra Ioane ra neio ro auna owera to giwati-marimo, taie aise gitiodorai-marimo, ata ubauba tanaro ata osioi diro pua neitiro aboto mabu neio ro urubia sirio tere gimati-rimo. Mabu sabowa urubia

na-gorowomidiro iato iedi tanaro ro
na-giauri-rimo neio auna kamade ro giwati, ina
neio ro Godi nou ri gemowabu-rimo,

²² mabu iedi dubu ro sairo meana
na-gemowai-rido nu 40 kisimisi to imidiro-titi
saio ubauba mutu.

Kimibiria urubia pupuwo ia kararatoro oweraga-ro-rimo

²³ Pita ra Ioane ra Iu eputa urubia ro
na-gitiodorai-marimo koto aboudo neitiro aise
gimobodiai-ma borubi kimibiria urubia aboto.
Neitiro ro etou tanaro giauri-rido imese aise
gorowauti-rido neio aboto.

²⁴ Nedi kimibiria borubi ro
na-girowidiro-rimo nedi oweraga ro, neio ro atu se
Godi iato gararatoro-rimo. Neio ro ibo 'Abera
Naramu, oro kaupoti nou se ie etu ro gisioidiro
toboro, sopu duriomoro, buru oromo ina imese
sirio namabu nedi duriomoro ro nato na-iamo.

²⁵ Nimo nasa dubu Deibidi oro sowake dubu e,
nou Tarena Urio ro gemasouti kutura oweraga.
Nou ro ibo, *Mabu boira erere duriomoro urubia
serawo ro na-iwatititi? Mabu boira urubia sirio
ro bagea gabo oweraga to na-isioidiro-dumo?*

²⁶ *Sirio duriomoro gabamani urubia neio ubi ie
boso aboto koroho Godi neio ro kowaruriauti
aboto, nou edi na kohodowa dubu ro nou mutu.*

²⁷ Nedi tanaro sirio ro morobise to
ta-gororosioidiro-rimo. Herodi, Ponitiasi Paireti,
daimodaimo urubia, Iu urubia atu moro to beda
tau ato garadabuti-rimo nedi sabowa ro nato
oro ro kohodowa dubu Iesu edi tau ro nato
gowaruria-rimo.

²⁸ Kaupoti nedi atu urubia ro oro edi gabo ro keba se na-gisioidiro neio ro oro Tarena Sowake dubu aboto gosioidiro-rimo mabu oro edi ubi ro, oro edi pupuwo ro nato gororosioidiro-rimo.

²⁹ Ina abora nou e ma-dirowidiro-ro neio ro abora beda ower a aro-dumo nedi urubia ro, neio ubi ie nimo tere iwai ri. Abera Naramu nimo oro sowake urubia ie, nimo ro oro ower a tere tato se kimowauti modobo ie.

³⁰ Ina oro edi korosa tanaro ro nou ba-diwapotai-ro. Temeteme urubia meana ba-diwaititi oro korowapotai modobo ie ibo oro korosa mutu e idaibo tanaro kisioidiro aboto, korosa tanaro ba-mororosioidiro-rimo oro edi tarena sowake dubu ro Iesu, nou edi pupuwo ro nato.'

³¹ Neio kararatoro na-goroporeai edi ipi ato gorowomidiro aise goromuruwouti, iato neio Tarena Urio ro korosa aise giwai, neio ro Godi edi mea ower a ro tere tato se gimowauti-rimo.

Kimibiria urubia namabu aise iromiotiti-mo

³² Kimibiria urubia neio atu sosoro kimaragoidiro giedea-rimo namabu sapuwo to. Neio edi namabu sirio ro simara namabu to iasoratiti pua, neio namabu to atu se ta-irowarebidirotiti-mo.

³³ Ina kitiodorai urubia ro pupuwo korosa mutu Iesu sapuwo to urubia sirio ower a iato gimowauti-rimo ibo, 'Abera Naramu Iesu abora keremiro ie, nou bobo rido ta-geribua-ro.' Sirio kimibiria urubia aboto Godi edi nirimagare ro auna ia se giamo.

³⁴ Ina neio ro namabu iosoratiti pua, neio namabu imese modobomodobo ato giamo. Neio

moto, goto kere mutu amia urubia aboto mani na aise giaiwo-rimo. Neio ro iedi mani ro na-gimade-rimo

³⁵ aise giworoho-rimo kitiodorai urubia aboto, ina kitiodorai urubia ro iwarebidirotiti-mo namabu tato urubia. Ina nou mabu ato ie, neio namabu imese modobomodobo ato giworohuti-rimo.

³⁶⁻³⁷ Ina ata Iesu kowasoro dubu masiro Iosepa ata tau ato goto kere ta-gaiwai urubia ro ta-gowomidai-rimo mani to. Taie edi mani ro nou ro ioudo na-giwou-ro kitiodorai urubia aboto iato aise giaiwai. Iosepa Riwai gu dubu e nou mamu ro Saiporasi Ura ato goroto. Kitiodorai urubia ro nou Banabasi to asorotiti-mo. Banabasi neio oweru to owamo ibo 'Urubia pupuwo kiwaititi dubu e.' Neio ro nou ri asorotiti-mo Banabasi to mabu neio nou ro iwaititi pupuwo.

5

¹ Ata dubu masiro Ananaia nou orobo mutu Sapaia neitiro goto kere iato gaiwai-rido mani na, iedi goto kere ro na-giwomidai-marimo

² neitiro ro mani sapuwo aise gowatateai-rido neitiro ro iwapotai pua. Ananaia abato edi sapuwo mani ro na-geremeserau nou ro aise gowou kitiodorai urubia aboto, iato gimowapotai ibo, 'Mani goto kere sapuwo to momuo se noti nowou-die nio aboto.' Neitiro piro se ta-geremowapotai-rido ibo sapuwo mani owatateai ri neitiro simara sapuwo to.

³ Taie Pita ro ibo Ananaia aboto, 'Mabu boira oro ro Satani ubi tanaro na-osioidiro? Mabu

boira oro ro karasaubuti ower a na-war o Tarena
Urio aboto?

⁴ Iedi goto kere ro oro ro na-gapoi urubia ro
na-gowomidai-dumo, io iedi goto kere ro oro do
ie, ina oro ro na-waiwai mani na iedi mani ro
oro ro modobo ie simara ubi ato koworohuti.
Oro ro idaibo sosoro tanaro etou mabu ato
osioidiro, a? Oro ro urubia isaubuti pua, Godi
asaubuti oro ro.'

⁵⁻⁶ Ananaia ro edi ower a ro na-girorowai nou
iato pamo aise garaweuti imese gorobu goto ato.
Taie amia domere iato godoro-rimo nou pamo
durupi obotama to na-goupiriamuti-rimo iato
gowosuruwo-rimo imese gedea-rimo bobo to.
Taie urubia umoro na-goi-rimo ibo Ananaia
pamo ie neio auna tere aise goi-rimo.

⁷ Adimo sapuwo to nou orobo Sapaira
na-gorowateai-ro nu umoro oi pua ibo etou
tanaro ro ororosoioidiro nou uramu aboto.

⁸ Pita ro nu nato gemodowa ibo, 'Ei Sapaira
mo ma-demowapotai-ro morobise ower a, nedi
mani ro nou se ra goto kere neito
a-giwomidai-madumo?'

Ina Sapaira ro ibo, 'Io mani nou se ie nou
nimia-madumo.'

⁹ Taie Pita ro ibo, 'Nitiro ro etou mabu ato
owaibia-do Abera Naramu edi Tarena Urio ro?
Oro uramu edi urubia ro pamo durupi
na-emoba-dumo abora torowotoi-die magere
damo ato, oro pamo neido neio ro
amadimo-owosuruwo-ri. Oro bobo neio ro
amadime-emasiai-ri uramu gomo ato.'

¹⁰ Sapaira ro iedi ower a ro na-girorowai iato
nou aise garaweuti Pita sairo mabu ato. Uramu

beda urubia ro goumai-rimo pamo neio
na-godoro-rimo nato Sapaira pamo se
gowea-rimo na-gorobu, iato nou durupi neio ro
obotama to koupiriamuti taie, imese
gowosuruwo-rimo uramu gomo ato aise
gedea-rimo.

¹¹ Kimibiria urubia amia urubia mutu
na-girorowai-rimo edi tanaro ro
na-gororosioihiro-rimo neio imese auna tere ro
girobai.

*Korosa tanaro kitiodorai urubia ro
gisioihiro-rimo*

¹² Kitiodorai urubia ro sirio awawo ia korosa
tanaro aise gisioihiro-rimo, urubia umoro
kiwaititi aboto ibo neio ro edi oweru ro
na-gimowauti-rimo Iesu sapuwo to io morobise
ie. Kimibiria urubia sirio Soromoni edi Tarena
Moto tamu ro nou maumo ato iato
iradabutiti-mo.

¹³ Arua urubia neio meamea oweru iarotiti-mo
ibose neio kamade ro iwatititi kimibiria urubia
sapuwo to, kaupoti neio mutu iradabutiti pua
mabu neio tere ro iwatititi.

¹⁴ Idaibo tanaro iedi urubia ro gisioihiro-rimo,
ina upi dubu sirio se kimibiria urubia to aise
gararapoi-rimo, imese sirio ta-goi-rimo.

¹⁵ Temeteme urubia namuturubi ro aise
wiworohotiti-mo gabo bara to arua keta to
iwotodotiti-mo, arua patapata mutu
iworohotiti-mo. Pita abato edi pupuwo korosa
ro auna ia se gowamo, nou gabo ato na-irohotiti
nou edi durupi duwoduwo ro modobo ie
temeteme urubia meana kiwaititi. Taie neio nou

ri iworohotiti-mo edi temeteme urubia ro gabo bara to.

¹⁶ Ina edio temeteme urubia sirio ro namuturubi ro muso moro rido aise giworoho-rimo. Amia urubia Ierusarema sabowa gomo ato beda sabowa ro irobotiti temeteme urubia ioudo aise giworoho-rimo, ibose arua urubia ubauba urio ro na-giworohuti-rimo neio sirio se Godi ro meana aise giwaititi.

Kitidorai urubia Iu eputa urubia ro ubauba mino to giworohuti-rimo

¹⁷ Godi ra urubia ra turituri auna dubu, nou borubi Sadusi urubia mutu, neio auna masawe goi-rimo edi kitidorai urubia ro neio aboto.

¹⁸ Taie neio ro kitidorai urubia na-girobai-rimo dibura to aise giedea-rimo.

¹⁹ Neio dibura moto ato na-gorowomidiro Godi edi sowake urio ro duwo ato nato gou-ro neio aboto, taie nou ro dibura moto magere iato gimodobura neio ioudo aise giwosuruwo-ro.

²⁰ Sowake urio ro ibo, 'Nio abora ito dou-mo Tarena Moto to, urubia sirio iato auna se ba-dimowauti-mo nedi orio komidiro keremiro ro nou sapuwo to.'

²¹ Neio ro edi owera ro na-girorowai-rimo sowake urio aboudo neio iato imese gemibiria Tarena Moto to, kowaroho duwoduwo ato neio ro urubia kimowauti nato gatamuai-rimo.

Ina iedi tau ro nato Godi ra urubia ra turituri auna dubu nou namuturubi mutu neio ro arua koto kiauri urubia iato girumai-rimo ibo neio mutu aradabuai ri. Taie neio keremowagomea na-gatamuai-rimo, arua woko urubia iato

gitiodorai-rimo dibura moto to, kitiodorai urubia neio ro iwameai ri koto aboto.

²² Neio irobai ri na-gou-rimo dibura moto to kitiodorai urubia nato iwia pua, egea se giosora-rimo, taie aise gorowameai-rimo lu awawo urubia aboto. Neio ro ibo gimowauti-rimo,

²³ 'Dibura moto magere kopai ie, kemakoko ie, edi urubia ro emotoi-dumo dibura moto, neio torowotoi magere gomo ato, kaupoti magere na-nodobura-dumo dibura moto goro ato ata dubu ata owea pua nimo ro!'

²⁴ Tarena Moto kemotoi auna dubu, Godi ra urubia ra turituri awawo urubia mutu neio ro na-girorowai-rimo, neio kimaragoidiro ro giopia. Neio ro ibo, 'Ai nedi tanaro ro na-wororosoidiro womu to beda sosoro to ama-ereredeai-ri?'

²⁵ Taie ata dubu na-godoro-ro neio wisana a-geremowagomea-rimo. Nou ro ibo, 'Neito ma-dirorowai-rimo oweri. Dutu adimo odio urubia ro dibura to nio ro na-giedeai-dumo, neio ina abora Tarena Moto ato urubia titamudiro-dumo.'

²⁶ Tarena Moto kemotoi auna dubu nu arua woko urubia mutu neibi iato gorowarario-birimo Tarena Moto to, pua ie kitiodorai urubia nato a-gorowotoi, urubia mea oweri kimowauti moro ato giwiai-ibirimo. Taie edi kitiodorai urubia ro neibi ro aise giwameai-ibirimo. Woko urubia tere ro giwati-bi mabu neibi nadi to kibo-ibi rie sabowa urubia ro, ina noudo ie neibi ro ipi gabo ato ata ubauba tanaro ata osoidiro pua kitiodorai urubia aboto.

²⁷ Taie woko urubia ro kitiodorai urubia na-giwou-birimo koto kiauri urubia sosoro gabo

ato iato giwotobowa-ibirimo, taie iato Godi ra urubia ra turituri auna dubu nou ro neio iato gimodoruti.

²⁸ Nou ro ibo, 'Nio nimo ro keba se koko owera ta-nimowapotai-rimo ibo modobo pua nio ro nedi dubu ro Iesu nou sapuwo to urubia kitamudiro. Kaupoti nio ro abora ma-diauri-mo Ierusarema sabowa gebari ato etou tanaro ro gororosioidiro-dumo, Iesu sapuwo to owera imese ta-gorobodorouti boroboro ia se oworohuti-dumo. Iesu pamo na-gowea nio ro nou mabu ato a-emowamedei-dioumo ra nimo aboto?'

²⁹ Pita arua kitiodorai urubia mutu neio ro awawo urubia ibo gimowameai-rimo, 'Nimo ro modobo ie Godi owera se kibodoro, arua urubia owera ibodoro-ri pua.

³⁰ Iesu nio ro gopia-rimo, ota kemowotowa ato nio ro gowioro-rimo nu ioudo gororidiro-ro. Kaupoti nimo Iu urubia abeamio nasaio ro edi na emowabutiti-mo nou ro gowameai-ro nedi dubu ro pamo rido,

³¹ ina nu tumodi sapuwo ato Godi ro ta-gowomi gabamani to nou gapoi, ibose nu nimo kiapopo dubu e. Godi ro nou mabu ato gosioidiro imese Iu urubia neio erewesegerai ri, neio ubauba nato imatopeamuti rie.

³² Nimo ro simara idomari to ta-niauri-rimo nedi tanaro ro na-gororosioidiro-rimo. Tarena Urio ro ibose ta-giwapotaidiro-ro etou tanaro ro gororosioidiro-rimo. Etio ro isioidiro-dumo Godi ubi tanaro Tarena Urio nou ro neio aboto se gemeiriai-ro.'

³³ Koto kiauri urubia ro owera

na-girorowai-rimo neio serawo mutu
ta-giroruhō-rimo kitiodorai urubia aboto. Neio
ubi a-giamo kitiodorai urubia iopiauti ri

³⁴ kaupoti ata Parasi dubu masiro Gamariere
owera mutu nedi topira maumo ro neido aise
geribua-ro. Nedi dubu ro nou ata Mose sabi
kitamudiro dubu e, urubia auna ubi ie nou
owera kirowidiro aboto. Taie nou ro edi
kitiodorai urubia ro egea mere se iato
gimeiriai-bi osuruwo ri.

³⁵ Taie nu iato aise gerewesegerai borubi koto
kiauri urubia aboto nou ro ibo, 'Isiraere urubia,
nimo etou tanaro nisioidiro-dumo modobo ie
tanaro kimaragoidiro mutu kisioidiro nedi
urubia ro neio aboto.

³⁶ Nio ro a-imaragoidiro-dumo ra keba se
Teuda abato etou tanaro ro gororosioioidiro? Nou
ro ibo garo, "Mo auna dubu e." Taie nou ro
urubia sirio iato gidabuti-ro 400 dubu nou aboto
neio ro garadabuti-rimo. Kaupoti nou Roma
boso urubia ro aise gopia-rimo. Nou aboto edi
urubia ro garadabuti-rimo neio erere moro to
aise gorowadaudio, neio ro modobo pua ata
tanaro ata kosioidiro.

³⁷ Ina nou saro gabo ato atu sosoro tanaro
ibose to gororosioioidiro ata dubu masiro Iudasi
nou Gariri duriomoro rido gou-ro. Iedi tau ro
nato neio masiro iaremuti ri goroho-rimo
simara sabowa to. Nedi dubu ro nou ro ibose
urubia sirio ta-gidabuti, urubia nou ro gimudo
Roma boso urubia iaipirio ri, ina nou aboto atu
sosoro tanaro ibose to gororosioioidiro, Roma
boso urubia ro nou aise gopia-rimo. Ina Iudasi
ro edi urubia ro gidabuti neio ibose to

gorowadaudio tere ri erere moro to.

³⁸ Abora nio mo ro nou ri nimowapotai umoro ower, nedi urubia ro dimeserai-mo daragareawado-mo neio aboudo, nakara se moroho-mo, etou tanaro isioidiro-dumo misioidiro-mo. Neio ro edi tanaro ro na-isioidiro-dumo urubia aboudo kou ato io owamo-ri pua, karaseperai ie.

³⁹ Ina Godi aboudo kou ato nio ro modobo pua kodiobo nedi tanaro ro. Etu umoro ra nimo ro idaibo tanaro kisioidiro ato nimo ro idaibo Godi gabo kowasiai ie.'

⁴⁰ Koto kiauri urubia ro Gamariere edi ower ro na-garo neio ubi aise goi-rimo. Taie neio ro kitiodorai urubia iato giramairiai-rimo orowameai ri koto aboto. Neio na-godoro-rimo taie iato gimowapotai-rimo woko urubia ro iado ri, 'Nio dou-mo nedi kitiodorai urubia ro kerei to ba-diado-mo!'

Taie neio aise giriribua-rimo kitiodorai urubia iato giado-rimo kerei to.

Koto kiauri urubia ro kitiodorai urubia iato gimowapotai-rimo, 'Abora nedi tau ro noudo Iesu sapuwo to nio ro urubia imowauti ate!' Taie neio ro nedi kitiodorai urubia ro ioudo aise gitiodorai-rimo osuruwo ri.

⁴¹ Taie iedi kitiodorai urubia ro ioudo auna ia kamade mutu gosuruwo-rimo, mabu neio Godi ro modobo ta-giwaititi siripo tanaro neio aboto ororosioiido ri Iesu masiro kowoubua aboto.

⁴² Edi kitamudio ro tanaro ro neio ro idiobuti pua aise gitamudio-rimo, sirio saiki imese aise irohotiti-mo Tarena Moto to, ibose erere moto to, urubia Iesu sapuwo to iato imowautiti-mo. Neio ro inaina aise imogutiti-mo mea ower

korowauti Iesu sapuwo to. Neio ro ibo imowautiti-mo, 'Godi ro kohodowa dubu to na-gapoi-ro Iesu kaupoti nou se ie.'

6

7 kiwarebai urubia giaubai-rimo

¹ Iesu kowasoro urubia iedi tau ro nato imese sirio ta-goï-rimo inaina aise garadabu-rimo Iesu kowasoro aboto, kaupoti ata mibo turi to nato godoro-ro. Iu urubia netewa teibo topira teibo ie, arua Iu urubia Giriki owerà to wiàro-mo, arua Iu urubia Aramiki owerà to wiàro-mo, edi urubia ro owerà to neio ro gororobai-rimo. Ina Giriki owerà to edi kimibiria urubia ro na-wiàro-mo neio masawe owerà iato garo-rimo ibo, 'Ohona nagirimi-oromio-ri nimo edi garamio mamio ro nio ro iwasosorowadotiti pua aise girimi-imario-ri.'

² Taie 12 kitidorai urubia ro kimibiria urubia sirio iato gidabuai-rimo kaupoti moro to. Neibi ro ibo, 'Neibi ro ohona kimio woko kisioidiro modobo pua, sirio tau Godi owerà kimowauti neito kodiobuti modobo pua,

³ ina nou rie naminiramio nio aboudo modobo ie 7 meamea urubia kiaubai. Nedi urubia ro neio mea muro mutu e, neio Tarena Urìo ro iworohutiti, idaibo sosoro urubia neio kiaubai modobo ie, nimo ro nedi woko ro neio aboto anamadimi-iaiwai-ri.

⁴ Nimo ro modobo ie sirio tau kararatoro owerà karo Godi aboto, ina ibose urubia modobo ie Iesu owerà to kitamudiro.'

⁵ Kimibiria urubia sirio ro edi owera na-girorowai-rimo ubi to gomidai-rimo, neio ro ibo, 'Nu modobo owera ie.'

Neio ro iato giaubuti-rimo 7 urubia, keba se Sitibini gaubai-rimo, (nou ata auna kimibiria dubu e ina Tarena Urio ro oworohutiti,) iato Piripi, Porokoru, Nikano, Timoni, Pamena, daro Nikorau. (Nikorau nou Entioko sabowa dubu e, nu Iu dubu to ta-gararapoi.)

⁶ Taie nedi 7 na peteibi ro kitiodorai urubia sosoro gabo ato iato giwomi-rimo, neio Godi aboto na-gararatoro-rimo neibi sapuwo to, tu neibi eputa to iato giaremo-rimo.

⁷ Ibose Godi edi owera ro iato ta-gorobodorouti imese urubia aboto Ierusalem sabowa ato. Kimibiria urubia edi topira ro auna aise gowai-rimo, ibose Godi ra urubia ra turituri urubia sirio Iesu edi gabo ro neio ro aise gobodoro-rimo.

Iu urubia ro Sitibini gohiai-rimo

⁸ Godi ro Sitibini auna ia pupuwo korosa gomia, nou ro awawo korosa tanaro neito gisioidiro urubia abato, neio umoro koi sapuwo to ibo nedi mea owera ro Godi aboudo ie.

⁹ Nou ro edi tanaro ro na-gisioidiro arua Iu urubia serawo goi-rimo nou aboto. Nedi urubia ro neio keba se wisa tato woko isioidirotiti-mo kaupoti edi mibo woko ro neio ro ta-gimesere-rimo. Ina noudo ie neio ro ata topira nou ri gosioidiro-rimo neio neito geriduti-rimo 'Mibo Tato Urubia'. Neio edi karadabu moto ro Iu urubia Sirisia ra Eisia ra nedi duriomoro teibo ro neio ioudo gou-rimo,

ibose auna sabowa teibo na-iamo-ma Sairini ra Arekesanidara ra amia urubia ioudo neio aboto ta-garadabuai-rimo. Ina nedi urubia ro Sitibini mutu auna oweru to gorowati-rimo.

¹⁰ Kaupoti Sitibini oweru na-iarotiti auna ia muro mutu iarotiti ina edi muro ro nu Tarena Urio ro omiotiti-ro, odio Iu urubia ro noudo ie Sitibini oweru neio ro kemadibiai modobo pua.

¹¹ Taie neio ro arua dubu iato gihodowa-rimo Sitibini sapuwo to oweru kakate moro ato emowagegere ri ibo, 'Io nou nimo ro ta-nemerewidiro-rimo ubauba oweru na-iarotiti Mose ra Godi ra sapuwo to, idaibo sosoro oweru neitiro ubauba neito iwaititi-ma.'

¹² Mibo Tato Urubia to edi urubia ro geriduti-rimo, neio ro Iu eputa urubia daro Mose sabi kitamudiro urubia aboto iedi oweru ro iato gorowauti-rimo. Eputa urubia ro edi oweru ro na-girorowai-rimo neio niro turi korosa neito neio ro aise gimowai-rimo. Taie neio na-gou-rimo Sitibini aise gohiai-rimo iato gowodoro-rimo Iu urubia edi ohu ia koto kiauri urubia aboto.

¹³ Ina arua urubia neio ubi ta-goi-rimo bagea oweru aro ri Sitibini sapuwo to, taie neio ohu ia koto kiauri urubia sosoro gabo ato na-gotoburio-rimo bagea oweru neio ro iato gimowauti-rimo nou sapuwo to. Neio ro ibo, 'Nedi dubu ro sirio tau auna ubauba oweru iarotiti edi Tarena Moto ro nou sapuwo to, ibose Mose sabi sapuwo to.

¹⁴ Ina nou ro ibose ta-iarotiti ibo Iesu Nasareta sabowa dubu nou ro nedi Tarena Moto ro ama-ototoro-ri. Nou ro ibose ta-iarotiti Mose ro

edi tanaro ro na-giwapotai-ro, Iesu ro ata mino to ama-iwesegerewado-ri.'

¹⁵ Koto kiauri urubia neio idomari nou ato se giwotoi-rimo, neio ro nato gowea-rimo nou sosoro woidomari ata sosoro giwotoi sowake urio woidomari sosoro ie.

7

Sitibini ro Iu koto kiauri urubia ower a gimowauti

¹ Godi ra urubia ra turituri auna dubu ro Sitibini iato gemodowa, 'Morobise ra? Oro ro idaibo sosoro ubauba ower a-iarotiti ra?'

² Ina neio Sitibini ro ibo gimowameai, 'Nio mo urubia ie, gare neito ma-demedea-rimo! Nimo morobise auna ia pupuwo Godi na-imidirotiti-die nimo nasa Aberaham nou aboto ta-gorowapotai. Aberaham Haran duriomoro to ido to gorowateai nou keba se Mesopotamia duriomoro ato imidirotiti Godi nato gorowapotai nou aboto.

³ Godi ro ibo a-gutura Aberaham aboto, *Oro koroto duriomoro, oro urubia, ba-dimeserai-ro. Mo ro edi duriomoro ro nama-emapoi-ri oro ito ba-dou iato ba-dimidirotiti.*

⁴ Taie Aberaham ro edi ower ro na-girorowai nou ro Mesopotamia duriomoro aise gemeserai imese gaimai Haran sabowa to. Aberaham Haran sabowa ato na-imidirotiti nou abera nato garaburai, ina nou Godi ro ioudo gemeiriai-ro neito nimo abora nedi duriomoro ro nato ti-norowomidiro.

⁵ Godi ro Aberaham keba se otuputai pua ata goto kere ata nou ro karahidimai aboto, kaupoti hodo nou ro ta-gasaubiai-ro Aberaham aboudo

nou ro *ama-emohodowa-ri* ata *duriomoro* nou *merebusere*, *aramio*, *nasaio* nou ia *mutu* *neio* *korowomidiro* *aboto* *imese* *sirio* *tau*. Nedi *tau* ro nato *Aberaham* ro ata *mere* *besere* ata *arasomai* *pua*.

⁶ Godi ro *ibo*, *Oro* *aramio* *merebusere* ata *duriomoro* *ato* *apira* *urubia* *sosoro* *ama-irowomidirotiti-ri*. *Duriomoro* *abeamio* *iato* *na-worowomidiro* *oro* *nasaio* ro *wisa* *tato* *woko* *amadimi-imesioidirotiti-ri* *neio* *aboto*, *ina* *ubauba* *mino* *to* *amadimi-iworohuti-ri* *400* *kisimisi* *to*.

⁷ Godi ro *ibose* *ta-garo*, *Oro* *nasaio* *nedi* *urubia* *ro* *neio* *ro* *amadimi-iworohuti-ri* *ubauba* *se*, *ina* *iedi* *urubia* *ro* *mo* *ro* *ubauba* *wisa* *neio* *aboto* *anama-iaiwo-ri*. *Ibose* *oro* *nasaio* *ro* *iedi* *muso* *duriomoro* *ro* *saro* *to* *nato* *amadime-emeserai-ri*, *mo* *ro* *neio* *nedi* *duriomoro* *ro* *neito* *anamadi-iwameai-ri*, *ina* *mo* *neio* *ro* *iato* *anamadime-emowabutiti-ri*.

⁸ Godi ro *ibose* *ta-garo* *Aberaham* *aboto*, “*Imese* *dubu* *mere* *modobo* *ie* *dubu* *simara* *takamai* *kasiai* *kuriai*, *neitiro* *hodo* *ibo* *neremasaubiai-rido*.”

Ina *Aberaham* ro *na-girorowai* *taie* *nou* ro *ioudo* *gatamuai-ro*, *nou* *mere* *Aisaki* *mamu* ro *na-goroto* *kaupoti* *woiki* *na-goroporeai* *dubu* *simara* *takamai* *na-gemasiai* *iato* *gemuriai*. *Taie* *iedi* *atu* *tanaro* ro *Aisaki* ro *dubu* *mere* *na-garasomai* *Iakobo*, *nou* ro *atu* *tanaro* *ibose* *to* *gosioidiro*. Ina *ibose* *Iakobo* *edi* *12* *dubu* *mere* ro *na-girasomo* *nou* ro *idaibo* *sosoro* *tanaro* *nou* *gisioidiro* *neio* *aboto*. *Io*, *iedi* *12* *urubia* ro *nimo* *nasaio* *gu* *neio* *aboudo* *irobu-die*.

⁹ *Iakobo* *nou* *12* *dubu* *mere* *girasomai* *ina* *neio* *auna* *masawe* *ro* *iwatiti* *Iosepa* *aboto*, *taie* *nou*

nou ri gahodorai-rimo Isipi urubia aboto wisa tato woko iato isioidiro ri neio abato, kaupoti Godi nou mutu ta-idabutititi.

¹⁰ Ibose nou Godi ro ta-owairiawadotiti-ro koko tanaro aboudo. Nou ro Iosepa mea muro kimaragoidiro ta-gomio, ina noudo ie Iosepa ro eputa dubu Pero auna kamade emowaitititi. Iosepa *nou ro ohu to na-gowioioidiro Isipi duriomoro ato, gabamani masiro nou ro aise gomia.* Eputa dubu edi moto urubia sirio ro, nou aboto aise giapoi nou ro emeauri ri.

¹¹ Kaupoti Isipi ra Keineni ra duriomoro teibo ato *auna sogoi tau ro gereredea* saiki auna ia se itoititi pari ohona iato mea mino to isuwodutiti pua. Ina urubia iato na-irowomidiroititi iedi duriomoro teibo ro nato neio imese auna ia sogoi ro iwatititi. Taie Iakobo edi 12 dubu mere ro nimo nasaio ohona tato gorowomidiro.

¹² Kaupoti *Iakobo ro na-girowai oweri ibo Isipi duriomoro ato ohona modobo ato tiamo, urubia ro ioudo imade-dumo,* taie nou ro neio iato gimeiriai ohona imade ri. Io neibi keba tau e ito na-gou-birimo Isipi duriomoro to.

¹³ Ina ata tau Isipi to na-gorowameai-birimo *Iosepa naramio aboto nato geremabowa ibo nou etu ra,* ina Pero umoro nato goi ibo urubia neito na-woroho-dioumo iedi urubia ro Iosepa simara karima borubi ie.

¹⁴⁻¹⁵ Taie Iosepa ro naramio iato gimeiriai nou abera Iakobo nou urubia mutu ou ri Isipi duriomoro to. Nedi urubia ro bame gou-rimo atu se, Iakobo mutu Isipi duriomoro to, imese 75 urubia neio ro gou-rimo. Neio iato

na-irowomidirotiti Isipi duriomoro ato, Iakobo aise garaburai, ibose nou 12 dubu mere iato gorowaburo-rimo.

¹⁶ Neio edi pamo durupi ro Sekemi sabowa to giwameai-rimo, Aberaham ro keba se beda bobo gomidai pamo durupi neito gibiti-rimo. Iedi bobo ro Sekemi sabowa ato na-owamo Aberaham ro gomidai mani to Hamo edi mere peteibi ro neibi aboudo.

¹⁷ Godi ro keba ia se oweru ta-garo Aberaham aboto ibo, “Mo ro Keineni duriomoro oro aramio nasaio neio aboto anama-aiwai-ri.” Io nedi tanaro ro kororosioi diro tau aupiaupi ro ta-gorobai. Ina nimo nasaio Isipi duriomoro ato na-gorowomidiro neio *imese sirio ta-goi-rimo, womu tato*

¹⁸ *ata orio eputa dubu na-gomi Isipi duriomoro nou ro giauri, ina nedi eputa dubu ro Iosepa ro keba se beda meamea tanaro isioidirotiti, orio eputa dubu ro aise iwaruriautititi,*

¹⁹ ibose nou ro nimo nasa naminami auna se isaubutititi. Ina ubauba tanaro isioidirotiti neio aboto, nou ro ta-gedea ata sabi bamuai kainakaina sapuwo to, neio iwosuwoduti ri goto ato iwotodo ri orowaburo ri, idaibo sosoro sabi nou ro nou gedea.

²⁰ Iedi tau ato kororosioi diro-rimo edi tanaro ubauba ro, Mose nato goroto mamu ro, *nou imese mea ia mere ie*, nou 3 sogomi to moto goro ato piro se owomidirotiti-do mamu ra abera ra ro.

²¹ Neitiro ro Mose bamuai edi kowosuruwo ro na-gowosuruwo-rido nou aise gemeserai-rido, iato eputa dubu besere ro gou-ro nou ro

na-gowea edi bamuai ro aise goumai-ro *nou ro owoubuatiti, simara mere to aise gapoi.*

²² Mose auna na-goï nou Isipi urubia ro auna se atamudiro-titi-mo nou tanaro kisioidiro mutu auna ia pupuwo ie ibose owera karo pupuwo ia ie.

²³ Mose 40 kisimisi ro na-gorobai nou ubi nato giedea simara Isiraere urubia kiraturiomai aboto.

²⁴ Nou edi tau ato gou ito, Isiraere dubu nou ro nato gowea Isipi dubu ro kado moro ato, nou aise girario edi dubu ro owairiai ri. Mose ro iedi Isipi dubu ro nou sapuwo to pamo se gesuai.

²⁵ Mose ro ta-gimaragoidiro ibo nou simara Isiraere urubia umoro amadimo-oi-ri ibo nou Godi ro neio iwairiai na gohodowa-die, kaupoti nou neio ro eibimai pua.

²⁶ Ata saiki na-gowaroho neio nou ro ina nato giraturiomai, Isiraere dubu teibo se giwia-ma karaberemo moro ato, nou neido na-girario nou ubi ie neitiro iwasiri-mari. Nou ro ibo, "Ibo orowati mamō nakaranakara se, naminiramio ibo korowati pua."

²⁷⁻²⁸ Kaupoti *edi dubu ro gatamuai karaberemo* Mose nou ro aise gohoiotai, nou ro ibo, "Dutu Isipi dubu oro ro pamo se na-gopia neito a-wararasoro ra, a? *Auna to omidiro ri etu ro gaubai oro? Etu ro owapotai nimo oro ro kiauri? Oro ubi ibo a-owamo ra mo opia ri dutu beda sosoro gopia Isipi dubu?*"

²⁹ Mose ro na-girorowai edi owera ro nou tere ri eputa dubu aboudo aise godau *Midiani duriomoro to taie nou karaho iato goi*, ina orobo

iato aise gedea. Nou ro netewa teibo mere teibo girasomai-ma edi orobo ro nou abato.

³⁰⁻³¹ 40 kisimisi saro gabo ato *Godi sowake urio nato gorowapotai Mose aboto* goto se duriomoro ato, Sinai podo gawagogo ato. Nou ro nato gowea *ota ato era pina na-giriware-ro*, nou a-giwagogorai iato kimaragoidiro ro gopia edi tanaro ro nou ro na-gowea. *Era nou ro aupiaupi na-gemowaititi nou ubi ie mea se owea ri. Kaupoti ioudo nou ro owera kodu se girorowai na-gutura-ro,*

³² *Mo Godi ie, oro nasa peteibi Aberaham, Aisaki ina Iakobo mutu mo neibi ro noti nemowabu-bimo.*

Mose iato aise gomugugurai nou ro aise kiauri modobo pua edi era ro na-giriware, nou tere ro gorobai.

³³ *Abera Naramu ro ibo, Oro edi sairo pata teibo ro na-iroidiro-ma dipurutai-ma, nedi moro ato na-wotoi tarena ia goto ie.*

³⁴ *Mo ro simara idomari to ti-niaurititi mo urubia Isipi duriomoro ato neio temeteme iamo mutu woko na-isioidirotiti-dumo. Mo nou ri nororuo-die neio iapopo ri iedi ubauba ro nou aboudo. Mose, oro abora mo ro a-nemeiriai Isipi duriomoro to.*

³⁵ *Ina Godi ro iato gemeiriai atu dubu, Isiraere urubia ro edi na dubu na-ebeiouti-mo ibo, Auna to omidiro ri etu ro gaubai oro, a? Etu ro owapotai nimo oro ro kiauri?*

Kaupoti Godi ro Mose noti gohodowa-ro neio iauri na, iapopo na. Godi edi sowake urio ro, Mose aboto ota rido owera ioudo na-garo-ro, sowake urio nou mabu ato Godi ia ro

gemeiriai-ro Mose owarebai ri, urubia nou ro ubauba komidiro moro rido ioudo iapopo ri, ina Isiraere urubia kiwaboi dubu to ararasoro ri.

³⁶ Mose ro Isiraere urubia Isipi duriomoro rido na-giwosuruwo-ro, Toketoke Oromo bara to na-giwateai-ro, ina ioudo goto se duriomoro to giwaboi-ro. Mose ro edi kiwaboi ro na-iwaboititi-ro 40 kisimisi maumo ato nou ro awawo korosa tanaro nedi duriomoro Peteibi ro nato isioidirotiti.

³⁷ Mose ia ro Isiraere urubia ta-gimowapotai ibo, *Godi ro nio ata ama-imohodowa-ri nou ipusu oweru dubu to ararapoi ri mo beda sosoro ra.*

³⁸ Mose ro gidabuai nimo nasa naminami goto se duriomoro ato. Ina Godi sowake urio oweru kodu Mose ro nato gemororowai Sinai podo ohu ato. Taie Godi ro womu tato keremiro kimio oweru nimo Isiraere urubia sapuwo to Mose aboto nou ro nato gaiwai-ro.

³⁹ Kaupoti nimo nasa naminami neio ubi tato goi-rimo Mose edi oweru ro nou kirowidiro aboto. Neio ro Mose a-webeioutiti-mo, neio ubi a-iamotiti Isipi duriomoro to korowameai.

⁴⁰ Ina nou mabu ato *gemowapotai-rimo Eroni neio ro ibo, "Nimo ota titi orora dimesioidiro-ro, nimo keba to neibi ro anamabimi-iwaboioirotiti-ri. Nimo edi dubu ro na-niwosuruwo-ro Isipi duriomoro rido, nimo umoro pua etou tanaro ro gororosioioidiro nou aboto. Iedi dubu ro otou na owati?"*

⁴¹ Iedi tau ro nato neio ro iato gosioioidiro-rimo *burumukau ota titi sosoro, iato dao neio ro iato gemematowo-rimo nou sapuwo to, neio auna*

kamade ro giwati edi tanaro ro
na-gisioidiro-rimo.

⁴² Ina neio edi tanaro ro nou isiodiro moro
ato Godi ro na-giwia-ro neio nou ro huru se
gimowou-ro. Neio huru edi kimowou ro
na-gimowou-ro neio ro iato gatamuai-rimo saiki,
sogomi, kiboni neio kimowaibiti.

Godi ro ibo gutura, keba se nedi oweru ro nou
ipusu oweru dubu Eimosi nou ro ta-gisioidiro
ibo, *Edi 40 kisimisi ro nato nio goto se duriomoro
ato na-wirohotiti-mo, nio meamea nakomu mo
aboto a-iaiwohotiti-mo ra, a? E e, iaiwohotiti pua. Ina
ibose dao mo ia aboto nio ro emematowotiti pua.
Nio ro nedi tanaro ro isiodirohotiti pua mo aboto,*

⁴³ *orora dubu Moreki parai moto mutu
na-oworohutiti-mo nou emowabutiti-mo. Ina
ibose kiboni orora Repani nio ro
ta-emowabutiti-mo. Edi ota titi ro
na-gisioidiro-rimo neio gimowabu-rimo. Ina
abora nou rie nio orowomidiro-ri pua nedi mea
duriomoro ro nato, nio neido mo ro
anama-imabodorai-ri muso duriomoro to masiro
Babironia, ina ata sapuwo nio ubauba keremiro
to iato ama-irowomidiro-ri.*

⁴⁴ Godi ro Mose ibo gotomudiro, “Mo edi
tarena parai moto ro idaibo sosoro muro to nio
ro neito ba-dosiodiro-mo.”

Ina neio ro edi mino ro neito gosiodiro-rimo.
Ina nimo edi nasa naminami ro goto se
duriomoro ato na-irohotiti-mo, iedi tarena parai
moto ro neio ro nou oworohutiti-mo moro
gabogabo.

⁴⁵ Ina ibo irowomidirohotiti saro to Godi ro edi
duriomoro urubia ro nato iwagareawadotiti-ro,

taie nimo nasa naminami Iosua ro nato iwoutiti-ro edi orio duriomoro ro neito. Neio ro edi na parai moto ro na-gimowameserai-rimo orio duriomoro to nou mutu godoro-rimo womu tato Deibidi eputa dubu to ti-gomi.

⁴⁶ Deibidi edi tau ato na-gomidiro eputa dubu to Godi auna kamade ro owatititi nou aboto. Nou ro Godi nato gemodowa ibo, “Oro Godi ie Iakobo ro na-emowabutiti. Modobo ra oro Tarena Moto mo ro kemidi?”

⁴⁷ Kaupoti Tarena Moto Deibidi ro ididi pua, nou ro edi mere ro na-garasomai Soromoni, Tarena Moto nou ro gemidi.

⁴⁸ Kaupoti Godi ohu ia ato na-omidiro-die urubia dubu ro tu to kididi moto nou nato komidiro pua. Ina Godi ipusu owera dubu Aisaia ro ibo ta-garo,

⁴⁹ *Abera Naramu ro ibo, Mo komidiro moro ie Adiri Sabowa, mo ro ioudo niauri-die. Mo sairo teibo sopu duriomoro ato niwotoititi-ma. Mo beda sosoro moto namadime-emidi-ri nio ro? Mo komidiro moro ata ata ro kemesioidiro modobo pua.*

⁵⁰ *Mea se dimaragoidiro-mo, imese namabu sirio mo simara pupuwo to mo ia ro nisioidiro.'*

⁵¹ Ina Sitibini ro owera aise gemogu nedi awawo urubia ro neio aboto, 'Nio imese akau ia urubia ie, nio eputa koko ia ie, nio gare tato ia ie. Nio niro turi Godi aboto morobise to iaiwai pua, nio ro nu owera irowidiro-ri pua idaibo. Tarena Urío nio aramio negenege, nasaio ro beda sosoro emoputiti-mo, ina abora nio ro ibo emoputi-dumo.

⁵² Keba ia tau ato Godi imese ipusu ower a urubia sirio na-imeiriotiti-ro nio aramio negenege, nasaio neio ro ubauba ia se iworohutiti-mo. Godi ipusu ower a urubia ro nio nasaio ta-imowautiti-mo ibo ata mea dubu amadi-ou-ri, kaupoti nedi urubia ro na-imowautiti-mo nio nasaio ro giopiauti-rimo. Ina dutu ata nedi mea dubu ro nio ro noti gapoi-dumo ina iato gesuai-dumo.

⁵³ Mose edi sabi sirio ro Godi edi sowake urio ro Mose aboto neio ro giaiwai-rimo, ina abora nio abato tiamo. Kaupoti nio ro ibodoro pua!'

Sitibini beda sosoro gopia-rimo

⁵⁴ Sitibini ro edi ower a ro gimowauti Iu eputa urubia neio auna serawo goi-rimo kimegege se girarowo-rimo nou aboto.

⁵⁵ Edi tau ro nato Sitibini Tarena Urio ro goworohuti. Nou toboro to na-girarowea, nou ro Godi edi woroworo ro nou se gowea, ina Iesu tumodi sapuwo ato gotoi-ro.

⁵⁶ Nou ro ibo, 'Mo na-nirarowea Adiri magere ta-worodobura-ro Imese Urubia Kiauri Dubu Godi tumodi sapuwo ato totoi-die.'

⁵⁷ Ina Iu eputa urubia ro edi ower a ro na-girorowai-rimo, neio gare aise geremoputi-rimo. Kai diamo mutu iato gorowabera-rimo Sitibini aboto nu neio ro aise gohiai-rimo,

⁵⁸ imese gomudo-rimo sabowa rido amede daimo to, iato nadi to aise gobo-rimo. Nou masiro etio ro gowai-rimo ubauba, neio ohu namabu na-gipuriti-rimo, orio dubu masiro Sauro nou sairo mabu ato giaremuti-rimo.

⁵⁹ Sitibini neio ro nadi to na-gobo-rimo karaburai aupiaupi ro gowamo-ro nou ro ibo, 'Abera Naramu Iesu, mo urio dememidai-ro.'

⁶⁰ Taie iato nou kauhio to aise gorodiriti. Nou ro ibo auna se, 'Abera Naramu oro ro neio aboto emowamedei ate neio ro etou ubauba osioidiro-diomo mo aboto, ba-dimatopeamuti.' Iato nou aise garaburai.

8

¹⁻² Taie Sauro ro ubi to gomidai Sitibini na-gopia-rimo. Ina arua meamea kimibiria urubia Sitibini edi pamo durupi ro idobi mutu gowou-rimo bobo to iato gedea-rimo.

Kimibiria urubia a-iadotiti-mo

Iedi atu saiki ro nato Ierusarema sabowa ato kimibiria urubia kiado neido garatamuai. Arua kimibiria urubia neio ioudo aise gorowadaudio Iudia duriomoro to, arua Samaria duriomoro to. Iesu edi kitiodorai urubia ro neio ro se gorowomidiro Ierusarema sabowa ato.

³ Sauro ro kimibiria urubia aboto ubauba kisioidiro neido gatamuai. Nou moto gabogabo na-godouti kimibiria urubia iato na-gorowomidiro, upi dubu nou ro ioudo aise giwosuwoduti-ro taie dibura to imese giaremo.

Piripi gimowauti mea owera Iesu sapuwo to Samaria duriomoro ato

⁴ Kimibiria urubia sabowa gabogabo to etio ro gororoburutai-rimo, neio ro Iesu sapuwo to mea owera nato gobodorouti-rimo.

⁵ Ina Piripi Samaria sabowa to na-godori-ro, nou ro urubia sirio mea owera Godi ro kohodowa dubu nou sapuwo to iato gimowauti.

⁶ Ina urubia sirio ro Piripi owera na-gemewidiro-rimo nou ro edi pupuwo korosa tanaro ro na-gisioidiro neio auna ia ubi ro giamo nou owera gare kemedea.

⁷ Taie urubia etio ra ubauba urio ro na-giworohuti-rimo, nou ro nato aise gimabodoidiro, edio ubauba urio ro neio iamo mutu gorowosuwoduti-rimo. Ina sairo ubauba urubia, idaro togiri urubia ta-giworoho-rimo, Piripi ro meana aise giwaititi.

⁸ Urubia ro na-giauri-rimo edi tanaro ro Piripi ro na-gisioidiro, auna kamade ro gereredea iedi sabowa ro nato.

⁹⁻¹⁰ Ina Piripi ido gou ito Samaria sabowa to, ata pakani dubu nou masiro Saimoni iato ta-imidirotiti, ina urubia auna ia kimaragoidiro ro iwatititi nou aboto. Saimoni auna keremowabu dubu e, nou ibo iarotiti, 'Mo gebari pere ie.' Iato erere urubia ro Saimoni owera na-gemewidiro-rimo, neio ro ibo 'Nedi dubu ro Godi edi pupuwo ro nou ro toworohutititi. Nou masiro Auna Pupuwo Dubu'.

¹¹ Saimoni ro edi pakani tanaro ro na-isioidirotiti, urubia sirio nou ro kimaragoidiro siriosirio imowaititi, ina nu neio ro aise obodorotiti-mo.

¹² Kaupoti Piripi ro urubia na-gimowauti Godi ro kiwaboi tanaro beda sosoro ra, ibose ie Iesu Keriso edi pupuwo korosa ro nou sapuwo to, imese sirio urubia aise gimibiria-rimo. Taie iedi

urubia sirio ro upi dubu nou ro obo to aise giwarumiauti.

¹³ Edi pakani dubu ro Saimoni nou ibose ta-gimibiria, Piripi ro nou obo to ta-gowarumia. Piripi ro edi pupuwo korosa tanaro ro na-gisioidiro Saimoni auna kimaragoidiro ro gowati, nou Piripi abato aupise gateidiro.

¹⁴ Edi 12 kitiodorai urubia ro Ierusarema sabowa ato na-gorowomidiro, neio ro na-girorowai-rimo ibo Samaria urubia ta-gimibiria-dumo Godi edi mea owera ro, neio ro Pita ra Ioane ra se gimeiriai-marimo Samaria sabowa to.

¹⁵ Neitiro ito na-gorowateai-rido, kimibiria urubia na-giwia-rido, neitiro ro Godi aboto iato gararatoro-rido Tarena Urio neio aboto emeiriai ri.

¹⁶ Nedi urubia ro obo to ta-giwarumiauti Piripi ro, neio Abera Naramu Iesu urubia to orowomidiro rie. Kaupoti Tarena Urio neio aboto tau se ateai pua.

¹⁷ Iato Pita ra Ioane ra na-gou-rido, tu iato gitomo-rido urubia eputa ato, iedi tau ro nato Tarena Urio neio aboto nato gateai-ro.

¹⁸ Iedi pakani dubu ro Saimoni nou ro na-gowea edi tanaro ro, Iesu ro kitiodorai-ma dubu teibo nou ro mani egea se gimia-ma.

¹⁹ Nou ro iato gutura neitiro aboto ibo, 'Mo ibose ubi ie nitiro ro nedi pupuwo korosa tanaro ro komia. Ina mo ro urubia idaibo sosoro anama-iwaseidiro-ri Tarena Urio neio aboto nato amadi-ate-ri.'

²⁰ Pita ro ibo, 'Idaibo tanaro kisioidiro pua! Tarena Urio Godi ro wisa tato emeiriotiti-die.

Oro ibo a-imaragoidiro ra Tarena Urio mani to omidai ri? Gabo tato ia ie! Oro mani mutu Godi ro ba-mipisiamuti-ma!

²¹ Oro modobo pua neitiro aboto karadabuai nedi woko ro nou kosioidiro aboto. Mabu oro niro turi imese moro ato owamo-die,

²² oro modobo ie kerewesegerai mea mino to, nedi ubauba tanaro ro ba-demeserai, ina Abera Naramu aboto ba-dararatoro. Etu umoro ra oro ubauba nou ro ama-ematopeamuti-ri.

²³ Mo umoro ie, oro ta-neibimai serawo kimaragoidiro tiamo oro abato. Oro ubauba ohu ato omidiro.'

²⁴ Saimoni ro ibo, 'Nitiro teibo mo sapuwo to Abera Naramu kararatoro modobo ie. Modobo pua idaibo tanaro mo aboto kororosioidiro.'

²⁵ Pita ra Ioane ra urubia na-gimowauti-rido Abera Naramu sapuwo to neitiro ro simara idomari to Iesu ta-giauri-rido nou ro etou tanaro na-isioidirotiti taie, neitiro imese gorowameai-rido Ierusalem sabowa to, ipi gabo ato beda sabowa ro giamo neitiro ro mea owera Iesu sapuwo to Samaria urubia iato gimowauti-rido.

Piripi ro Epioupia gabamani dubu gatamudiro

²⁶ Piripi Samaria duriomoro ato na-gomidiro Godi sowake urio ro ibo Piripi aboto, 'Ba-dohau nigori boido aro-die, gabo Ierusalem sabowa rido torobu-die Gasa sabowa to.' Urubia iato irowomidirotiti pua edi gabo ro goto se duriomoro ato owamo.

²⁷⁻²⁸ Taie iedi owera ro nou ro na-girorowai, ioudo aise gaimai-ro. Neido na-gou ipi gabo ato urubia dubu isana ioudo a-gou-ro, Ierusalem

sabowa rido Godi kemowabu aboudo
gorowameai-ro. Nou Epioupia dubu e, Epioupia
duriomoro ato nou eputa orobo masiro
Kanadake, mani nou ro emeaurititi. Nedi dubu
ro goto ato koroho nakomu woiri teibo mutu
gabo ato gou-ro, nou ohu ato gomidiro. Nou
na-gou-ro gabo ato, Godi ipusu oweru dubu
Aisaia odio Tarena Buka ro noudo geremoputi.

²⁹ Tarena Urio ro ibo Piripi aboto, 'Iedi koroho
nakomu ro demarario nou aboto ba-daradabuai,
atu se ba-dou-do.'

³⁰ Piripi na-girario koroho nakomu gomo to,
nou ro neido girorowai nedi dubu ro Aisaia
buka rido gioputi. Nou ro ibo, 'Oro ro edi Tarena
Buka ro na-eremoputi maumo a-womidai ra?'

³¹ Taie Epioupia dubu ro ibo, 'Mo ro mea se
beda sosoro anama-omidai-ri? Modobo ie ata
mo abato komidiro buka maumo nou ro
amadi-owawea-ri.'

Taie Epioupia dubu ro koroho nakomu aise
gairio Piripi nou ro iato garamairiai-ro taie nou
abato aise gomi.

³² Epioupia dubu ro nedi oweru ro Tarena
Buka rido nou gioputi.

*Sipisipi batina beda sosoro kowou ra opia ri nu
ibo gowou-rimo. Ina sipisipi dawade beda sosoro
kirahumai ra oweru tato sobo kowasio ato nu
idaibo sosoro gotoi.*

³³ Urubia ro nu siripo gowai-rimo ina neio ro
nu ubauba se goworohuti-rimo. Kaupoti nou aise
gimaria nou iato na-gopia-rimo keremiro iato
aise gemasiai-rimo.

Ata mere ata nou ro arasomai pua nou masiro ararasoro na, nou keremiro iato aise goroporeai nedi duriomoro ro nato.

³⁴ Epioupia dubu ro ibo, 'Nedio oweru ro na-iamo Aisaia ia simara sapuwo to a-iamo ra? O ata dubu sapuwo to a-iamo ra? Ina nu maumo beda sosoro ra?'

³⁵ Taie nedi oweru ro Piripi ro neido gatamuai nou kemowauti mea oweru Iesu sapuwo to, iato nou ro aise gimibiria.

³⁶⁻³⁷ Neitiro gabo ato na-gou-rido neido girarowea-rido obo paruo na-gomidiro-ro. Epioupia dubu ro ibo, 'Obo tomidiro-die daio, mo nedi tau ro nato kowarumia modobo ra obo to?'

³⁸ Taie koroho nakomu nou ro iato aise gairio, neitiro imese giodori-ma obo to. Edi Epioupia dubu ro obo to iato gowarumia,

³⁹ ioudo na-gidiai-rido Piripi nato pоторо se gowea, Tarena Urio ro Piripi neido goupiriai Asota sabowa to gimeihai. Iedi Epioupia dubu ro nou ro Piripi ina owea pua. Nou imese gorowameai auna kamade mutu.

⁴⁰ Kaupoti Piripi nou Asota sabowa to ito na-gimeihai, Iesu sapuwo to ina mea oweru urubia iato gimowauti. Ibose nou ta-gadoro-ro Asota sabowa rido sabowa gabogabo urubia na-gorowomidiro nou ro iato gimowauti mea oweru Iesu sapuwo to, womu tato Siseria sabowa to ti-gorowateai-ro.

9

Sauro komidiro keremiro na-giwesegerai

¹ Sauro Ierusarema sabowa ato kimibiria urubia iato na-irowomidiro-titi, nou ro auna se imahuwotiti iopiauti ri. Nou ata tau iato gou Godi ra urubia ra turituri auna dubu aboto,

² nou ro ibo, 'Modobo ra umoro oweru paba titi oro ro kiatiti ina mo aboto kiaiwei? Mo ia ro nama-imio-ri Iu urubia beda moro ato iradabutiti-dumo Damasikasi sabowa ato.'

Iedi umoro oweru paba titi ro nato ibo a-giamo, Iesu gabo etio ro obodoro-dumo upi dubu Damasikasi sabowa ato na-orowomidiro modobo ie neio Sauro ro kirobo ina kiwameai Ierusarema sabowa to dibura to iato iaremo ri.

³ Taie nedi paba ro Sauro ro na-gimidai-ro, nu ioudo aise gasiriai-ro arua urubia mutu Damasikasi sabowa to. Nou ro sabowa aupiaupi na-gemowaititi-ro pina benenio mutu toboro rido nato gerememiai-ro,

⁴ nou iato aise geretei. Nou ro nedi oweru ro nou girorowai simara ia oweru to na-gutura-ro, 'Sauro! Sauro! Mo oro ro temeteme etou mabu ato nomiotiti?'

⁵ Ina Sauro ro ibo, 'Auna dubu, oro etu ra?'

Ina nou ro ibo, 'Mo Iesu e, mo oro ro nomiotiti temeteme.

⁶ Deribua, ba-dodoro sabowa to oro iato ata dubu ro ama-emowapotai-ri oro ro beda tanaro ama-isioidiro-ri.'

⁷ Iedi urubia ro Sauro mutu na-gou-rimo neio ro ata dubu ata owea pua, oweru kodu se girorowai-rimo neio iato woki ro giopia.

⁸ Taie Sauro ioudo na-geribua-ro nu idomari teibo modobo pua kimaipotai-ma, imese pogo ia ie. Taie neio ro nou aise gorobai-rimo tu rido imese gowou-rimo Damasikasi sabowa to.

⁹ Sauro netewa didi saiki ibose to gomidiro, dokou ra ohona ra kiho tato.

¹⁰ Ata kimibiria dubu iato ta-gomidiro Damasikasi sabowa ato nou masiro Ananaiasi. Taie Abera Naramu ro ibo nou aboto, 'Ananaiasi! Ananaiasi!'

Nou ro na-girorowai nedi owera ro nou ro ibo, 'Abera Naramu, oro owera ma-daro-ro.'

¹¹ Iesu ro ibo, 'Oro ba-dou gabo masiro neito asoro-dumo Tuputupu Gabo, nou se dowasoro. Iato ata dubu masiro Sauro nou Tasasi sabowa dubu e Iudasi moto ato tomidiro,

¹² ina nou ro oro iauri hiwo to oro ro tu itomai ri nou abato, nou idomari mea se kirarowea aboto. Abora nu mo aboto tararatoro-die owarebai ri.'

¹³ Kaupoti Ananaiasi ro ibo, 'Abera Naramu, mo ro owera ta-nirowidiroiti nedi dubu ro nou sapuwo to, Ierusarema sabowa ato oro urubia nou ro iadotiti.

¹⁴ Ina ibose nu neito nou ri gou-die Godi ra urubia ra turi auna dubu aboudo peba titi ta-gimidai-die oro etio ro emowabutiti-dumo nou ro irobo ri ina dibura to iaremo rie.'

¹⁵ Kaupoti Abera Naramu ro nu ibo gemowameai, 'Oro dou! Nedi dubu ro mo ro narapoi. Mo sapuwo to owera nou ro ama-imowautiti-ri Iu owera karo tato urubia aboto, neio edi gabamani urubia aboto erere duriomoro ato na-orowomidiro, ibose Isiraere urubia aboto.

¹⁶ Idaro nedi dubu ro umoro anama-owai-ri ibo nu ubauba beda sosoro ama-iaurititi-ri mo sapuwo to.'

¹⁷ Ananaiasi ro edi owera ro na-girorowai nou imese gasiriai. Nou ito na-gorowateai tu teibo Sauro eputa ato aise gitomai-ma. Nou ro ibo 'Nanutuna Sauro! Mo Abera Naramu Iesu, nou ro nemeiriai-die oro aboto, oro aboto edi dubu ro na-gorowapotai-die gabo ipi ato io Iesu e. Oro mo ro meana owai rie, ina Tarena Urío oro abato omidiro rie.'

¹⁸ Nou ro iedi tau ato na-gutura nedi owera ro nou idomari teibo rido nakere kisoí beda sosoro ra ioudo neitiro ro giretei-maró. Nou idomari na-gimapopodorai iato mea se girarowea, iato nu Ananaiasi ro obo to aise gowarumia.

¹⁹ Nu kiho tato ta-gomidiro netewa didi saiki duwo neito, nu durupi imese pupuwo tato ta-goi, taie ohona na-giho durupi pupuwo neito gowai.

Sauro ro Iesu gowauti Damasikasi sabowa ato

Sauro meana na-goi Iesu kowasoro urubia mutu nou arua saiki to ta-gomidiro Damasikasi sabowa ato.

²⁰ Taie nou imese irohotiti Iu urubia karadabu moto to urubia sirio nou ro iato imowautititi ibo, 'Iesu nou Godi mere ie.'

²¹ Taie urubia sirio ro nedi owera ro na-girorowai-rimo neio aborabora ro girobai. Neio ro ibo, 'Nio umoro ra nedi dubu ro Ierusarema sabowa nou ro owawodorowadotiti, Iesu kowasoro urubia nou ro iadotiti dibura to iato gi-iaremo-ri. Idaibo tanaro nou isioidiro ri gou-die neito, Iesu kowasoro urubia irobo ri Ierusarema sabowa to iworoho rie Godi ra urubia ra turituri eputa urubia aboto.'

²² Kaupoti nu Godi ro pupuwo bo gemowai, nou ro Tarena Buka rido inaina gorowauti ibo

Iesu Godi ro kohodowa dubu kaupoti nou se ie. Neio oweru to imese ta-giwamedei ata ata ro oweru eremowauti pua, modobo pua neio ro nu oweru kemowasiai aboto.

²³ Nu iato ta-gomidiro sirio saiki to ina arua Iu urubia nou kopia sapuwo to oweru piro se nato gisioidiro-rimo.

²⁴ Sauro kodau rie kodouti moro ato urubia neio ro iato ta-giwotoburio-rimo duwo saiki, magere damo aise emotoititi-mo. Taie ata dubu ro gemowapotai Sauro ibo oro amadimo-opia-ri.

²⁵ Ina ata duwo ato nu kowasoro urubia ro gowarebai-rimo, hodo gatere to gowororuwo-rimo kara pito goro rido.

Sauro ro Iesu gowauti Ierusarema sabowa ato

²⁶ Sauro Ierusarema sabowa to na-gorowateai nou ubi ie Iesu kowasoro urubia mutu aradabuai ri. Kaupoti Iesu kowasoro urubia ro nou tere gemati-rimo. Neio ro mea se imibiria pua ibo nu Iesu kowasoro dubu e.

²⁷ Kaupoti nu Banabasi ro gadabuai Iesu kitiodorai urubia aboto. Taie Banabasi ro ibo, 'Nedi dubu ro nio ro na-iauri-dioumo, Damasikasi gabo ipi ato Abera Naramu nou ro nato gowea ina oweru nou aboudo nato girorowai. Nou ro Damasikasi sabowa ato mea oweru Iesu edio pupuwo ro neito urubia tere tato se gimowauti.'

²⁸ Sauro Iesu kowasoro urubia mutu atu moro ato na-gorowomidiro Ierusarema sabowa gebari ato, nou ro mea oweru Iesu sapuwo to arua urubia iato gimowauti. Sauro ro auna pupuwo korosa edio oweru ro nouto gimowauti.

²⁹ Ina arua Iu urubia Giriki oweru to na-iaro-mo, neio iato ta-gorowomidiro nou edio oweru ro na-gemororowai-rimo nou neio mutu oweru to orowatititi. Taie nou neio ro kopia gabo egea se gemosora-rimo.

³⁰ Ina borubi kimibiria urubia ro kopia oweru na-girorowai-rimo, taie nu neido gowodori-rimo Siseria sabowa to. Ina Siseria sabowa rido ioudo gemeiriai-rimo simara koroto sabowa to masiro Tasasi.

³¹ Iesu urubia nedi duriomoro peteibi ro nato na-gorowomidiro Iudia, Gariri, Samaria neio abato miro tau aise gereredea. Neio edio tau ro nato Godi ro pupuwo aise giwaititi. Iesu Keriso neio ro mea mino to emododidiro-titi-mo, mau esebotiti pua. Neio edio kimibiria tanaro ro Tarena Urio ro imowaitititi pupuwo. Ina iedio tau ro nato orio urubia aise godouti-rimo womu tato Iesu urubia imese sirio ti-goi-rimo.

Enaiasi Pita ro gowai meana

³² Pita duriomoro gabogabo goroho, ata tau nou Rida sabowa to ito gou Iesu edi tarena urubia ro iato na-gorowomidiro neio giraturiomai.

³³ Taie Rida sabowa ato ata togiri dubu masiro Enaiasi nou ro iato gowea, iedi togiri dubu ro 8 kisimisi neito orobuti, nakara se eriburiotiti pua.

³⁴ Pita ro na-gowea edi dubu ro nou ro ibo, 'Godi ro kohodowa dubu Iesu oro nou ro meana towai, deribua! Keta deremetebuti!' Taie iedi dubu ro aise geribuwa.

³⁵ Urubia sirio ro na-gowea-rimo Enaiasi koroho moro ato, Rida sabowa urubia ina Seroni

durio goto ato edi sabowa ro na-giamo, edi urubia sirio ro neio atu se ubauba tanaro aise gimesere-rimo, Abera Naramu edio mea gabo ro nato gotobowa-rimo.

Pita ro Tabita pamo rido gowameai-ro

³⁶ Ata kimibiria orobo nou masiro Tabita Iopa sabowa ato imidirotiti. (Giriki urubia ro Dokasi to asorotiti-mo, maumo owamo ibo mea dia sosoro ie.) Nou ro meamea tanaro isioidirotiti ibose namabu tato urubia nou ro ta-iwarebidirotiti.

³⁷ Ata tau nu auna ia temeteme ro gorobai-rimo, isana Pita Rida sabowa ato gomidiro, Tabita iato aise garaburai. Nou pamo durupi obo to na-gowiouti-rimo imese gowioro-rimo ohu moto to.

³⁸ Iopa muso pua Rida sabowa rido, taie kimibiria urubia ro na-girorowai-rimo ibo Pita tomidiro-die Rida sabowa ato, neio ro netewa teibo kimibiria dubu teibo nato gitiodorai-marimo Pita orobai ri. Taie neitiro neido na-gedei-rido nu nato gemagege-rido ibo, 'Oro samo to dou-ro neibi atu se anamabimo-ou-ri Iopa sabowa to.'

³⁹ Taie iato neibi atu se ioudo imese gohau-birimo Iopa sabowa to.

Pita edio tau ato na-gorowateai nou aise gowaboi-rimo ohu moto to, iato nou ro garamio mamio se giwia. Pita neio ro ta-gemowaperai-rimo Tabita idobi na-gemerete-rimo. Garamio mamio ro Tabita beda namabu iwaruwoidirotiti, idaibo penikoto, sodo, Pita aboto edi namabu ro idobi mutu nou

giwawuti-rimo. Neio ro ibo, 'Nou na-imidirotiti nedi namabu ro nou ro nimowaruwoidirotiti.'

⁴⁰ Taie Pita ro urubia iato gimowapotai ibo, 'Tauo nedi moto ro nio ro ma-demeserai-rimo dosuruwo-mo ito!'

Nou iato kauhio teibo to na-girimusubua Godi imese gararatoro. Taie iato nou ro ibo Tabita aboto, 'Tabita oro deribua-ro!'

Tuturu to pua Tabita idomari na-gimahitai-ro nato Pita se gowea iato nou aise gomi,

⁴¹ Pita ro nou tu rido korobai aise gowoubua-ro. Iedi kimibiria urubia ro garamio mamio mutu nou ro aise giramairiai-ro odoro ri. Neio na-godoro-rimo, Tabita nato keremiro se gowea-rimo.

⁴² Edio oweri ro Iopa sabowa urubia ro na-girorowai-rimo, imese urubia iato aise gerewesegerai-rimo Abera Naramu kobodoro aboto.

⁴³ Pita iato arua saiki to ta-gomidiro ata dubu moto ato, nou masiro Saimoni. Nu burumukau takamai woko dubu e.

10

Sowake urio Koneria aboto gorowapotai-ro

¹ Ata dubu masiro Koneria, Siseria sabowa ato imidirotiti. Nu Roma gabamani maumo ato ata boso eputa dubu e, ina Itari boso urubia 100 nou ro iaurititi.

² Nou ro meamea tanaro ta-isioidirotiti, namabu tato urubia nou ro namabu to ta-iwarebidirotiti. Koneria Iu dubu pua, kaupoti nou simara moto urubia mutu morobise Godi

neio ro emowabutiti-mo. Ibose sirio tau nou ro Godi aboto aise iraratorotiti.

³ Ata adimo 3 koroko ato Godi edi sowake urio ro hiwo sosoro to Koneria aboto nato gorowapotai-ro. Nou ro ibo, 'Koneria!'

⁴ Koneria tere ri idomari keakea girarowea sowake urio aboto. Nou ro ibo, 'Ei auna dubu, oro etou owera amadi-utura-ri mo aboto?'

Sowake urio ro ibo 'Oro kararatoro owera Godi ro ta-emewidiroititi-ro, oro ro edi meamea tanaro na-isoiroidititi namabu tato urubia oro ro na-iwarebidirotiti, Godi ro ta-iaurititi-ro. Godi oro ro kamade neito emowaitititi. Oro nou ro woki emati pua, temaragoidiroititi-die.

⁵⁻⁶ Urubia Iopa sabowa to ba-dimeiriai, ata dubu masiro Saimoni nou burumukau takamai woko dubu e, nou moto oromo bara ato otoī. Ata dubu nou abato tomidiro masiro Saimoni Pita, neibi ro nedi dubu ro aise ba-madabuai-birimo.'

⁷ Taie iato sowake urio edi owera ro karo na-goporeai nou iato aise garaseperai. Koneria ro sowake dubu teibo iato girumai-ma, ibose nou durupi gomo ato na-wateidiroititi ata boso dubu nou ro iato gorumai. Iedi boso dubu ro Godi nou ro emowabutiti, ibose Koneria woko nou ro emesoiroidititi.

⁸ Koneria ro beda tanaro giauri sowake urio aboudo neibi nou ro iato gimowauti-bi. Taie iedi owera ro neibi nou mutu gimeiriai-bi Iopa sabowa to.

Pita ro ohona obotama giauri

⁹ Ata saiki ato saiki turi korobai aupiaupi ro gowamo, Koneria ro edi dubu peteibi ro na-gimeiriai-bi Iopa sabowa aupiaupi

gemowaititi-birimo. Isana Pita nato giroto moto ohu to Godi aboto araratoro ri.

¹⁰ Pita iato sogoi ro aise gorobai nou moto urubia ro ohona samo to ito pua, neio ohona gimododiwado-rimo. Taie nou ro hiwo sosoro to

¹¹ giauri toboro magere na-gorodobura-ro. Taie ioudo auna obotama sapusapuwo rido gorobidiro-rimo nato gowororuwo-rimo sopu to.

¹² Nato a-giamo sirio sairo to koroho namabu, goto ato koromudidiro namabu, pawa, neio ro giamo. Iedi namabu sirio ro sabi ie Iu urubia ro kiho aboto.

¹³ Taie owera kodu ioudo gutura-ro Pita aboto, 'Pita oro etou emasebidiro? Nedi nakomu sirio ro diopiauti, ba-diho!'

¹⁴ Kaupoti Pita ro owera kodu ibo gemowameai, 'Abera Naramu, modobo ia pua mo egea se nimidirotiti mo ro idaibo sosoro ohona ata ouho pua, sabi ia ie mo ro kiho!'

¹⁵ Owera kodu ina iato gutura-ro nou aboto, 'Imese beda mutu nakomu patu ro iamo Godi ro meana ta-giwai, kiho modobo ie. Idaibo sosoro ohona ubauba to iasoro mamu!'

¹⁶ Nedi tanaro ro netewa didi tau to gororosioidiro-birimo Pita aboto. Taie iato tuturu to pua edi auna obotama ro ohona sirio mutu toboro to aise giwameai.

¹⁷ Pita imese gomidiro, woki ro gopia nedi tanaro ro na-gororosioidiro, nou sapuwo to auna se gimaragoidiro. Koneria ro edi dubu peteibi ro na-gimeiriai-bi neibi ro Saimoni moto ta-gowea-birimo magere gomo ato gotoi-birimo.

¹⁸ Neibi ro ibo, 'Urubia dubu masiro Saimoni Pita nedi moto ro nato a-womidiro ra?'

¹⁹ Pita wisa hiwo oweru gemaragoidiro, iato Tarena Urio ro ibo Pita aboto, 'Pita neito ma-dirorowai-ro, netewa didi dubu peteibi totoi-diebimo oro osora-diebimo.'

²⁰ Dororuwo ito, neibi Iu urubia pua, kaupoti mo ro nimeiriai-bidie oro aboto. Oro ata ubauba kimaragoidiro iwia ate, neibi mutu aise ba-dou.'

²¹ Taie iato Pita aise gororuwo-ro nedi dubu peteibi ro neibi aboto. Nou ro ibo, 'Mo nou se ie nibi ro na-nosora-diebimo. Etou buro ri ou-diebimo neito?'

²² Neibi ro ibo, 'Neibi boso eputa dubu Roma gabamani maumo ato isioidirotiti woko, nou masiro Koneria. Nu mea dubu e Godi nou ro emowabutiti, Iu urubia nou aboto auna ubi ie. Nou dutu ata sowake urio ro gemowapotai ibo oro ou ri nou moto to, oro abato beda sosoro oweru ro owamo oro ro nou emowauti rie.'

²³ Taie Pita ro ibo, 'Io modobo ie dodoro-birimo, nibi tauo nato duwo kaupoti ama-irobu-biri ou-ri pua, kowaroho tinamabimo-ou-ri.'

Pita Koneria aboto gou eremowauti ri

Ata saiki Pita namabu na-gimododiai edi dubu peteibi ro neibi mutu atu se imese gaimai-birimo Siseria sabowa to. Ina Iopa sabowa rido amia kimibiria urubia ioudo ta-garadabuai-birimo neio atu se ibo gou-rimo.

²⁴ Siseria sabowa to neio ata saiki ato gorowateai-rimo. Koneria isana urubia mutu Pita gemasebidiro-rimo. Nou urubia namuturubi mutu ta-gidabuti-ro, neio

a-gorowomidiro moto goro ato Pita
gemasebidiro-rimo.

²⁵ Taie Pita edi tau ato na-gorowateai moto to
nou Koneria ro na-gowea, nou ro ibo
a-gimaragoidiro Pita ata auna dubu e. Nou iato
kauhio to aise girimusubua Pita nou ro iato
gemowabu.

²⁶ Kaupoti nou Pita ro tu rido aise gorobai-ro
imese gowotobowa. Pita ro ibo, 'Deribua! Mo
Godi pua! Oro beda sosoro ra urubia dubu mo
ibo ie.'

²⁷ Taie neitiro moto goro to atu se godoro-rido
owera keremowauti keremowauti. Pita
na-gorowateai ito moto goro to, nou ro urubia
dubu patu se giwia neio a-gorowomidiro.

²⁸ Taie Pita ro ibo neio aboto, 'Nio imese sirio
se umoro ie ibo Iu urubia, Iu owera karo tato
urubia, neio atu moro to karadabu pua, ibose
neio karaturio pua, nimo Iu urubia sabi ro aro
idaibo. Kaupoti mo Godi ro dese to nowai-die
umoro ibo mo ro modobo pua arua urubia
ubauba to kiasoro, ibo neio modobo pua Godi
mutu karadabu.

²⁹ Oro urubia ito na-gimeiriai mo aboto, mo ro
ata owera ata utura pua mo muhoio tato ioudo
aise naimai-die. Nirimagare, abora mo
ma-demowapotai-ro urubia dubu Peteibi mo
aboto etou mabu ato gimeiriai-bi?'

³⁰ Ina Koneria ro Pita ibo gemowameai, 'Dutu
ata idaibo tau nato 3 koroko adimo ato mo
karatoro owera naro moto ato, mo sosoro gabo
ato urubia dubu iato aise gorowapotai-ro keakea
obotama se giroidiro.

³¹ Nou ro ibo, “Koneria, oro edi karatoro oweru ro na-iarotiti Godi ro ta-emewidirotitiro. Ibose oro ro edi tanaro ro na-isioidirotitinamabu tato urubia aboto, oro ro na-iwarebidirotitin, Godi ro timaragoidirotitin, woki imati pua.

³² Oro ro urubia Iopa sabowa to ba-dimeiriai, ata dubu tomidiro iato masiro Saimoni Pita nou neito ba-mou-ro. Nu burumukau takamai woko dubu Saimoni, nou moto ato omidiro. Nedi dubu ro nu moto oromo bara ato otoi.”

³³ Taie mo ro nedi dubu peteibi ro samo to nou ri nimeiriai-bi oro orobai ri. Nimo auna kamade ie oro beda sosoro ou-die neito, abora nou e nimo Godi sosoro gabo ato noti norowomidiro, oro Abera Naramu ro beda sosoro gemowapotai nimo oro ro nouto imowauti rie.’

Mea oweru Iesu sapuwo to Koneria urubia mutu Pita ro gimowauti

³⁴ Pita ro neio aboto oweru karo iato gatamuai, nou ro ibo ‘Mo abora umoro ta-noi Godi nou auna se imaragoidirotitin pua kaupoti oweru urubia aboto.

³⁵ Erere duriomoro ato urubia na-irowomidirotitin nou etio ro emowabutiti-dumo, ibose tuputupu tanaro na-isioidirotitin-dumo nedi urubia ro Godi ro simara urubia to neio kiapoi ie.

³⁶ Nio umoro ie Isiraere urubia aboto Godi ro oweru keba se ta-gemeiriai-ro, nedi mea oweru ro nou e, miro Iesu Keriso aboudo ta-gou-ro. Iesu Keriso Abera Naramu e imese sirio oweru urubia nou ro iaurititi-die.

³⁷ Iedi tanaro ro gororsioidiro-rimo Iudia duriomoro ato nio umoro ta-goi-rimo, keba se Gariri duriomoro ato garatamuai-rimo iedi

tanaro ro. Obo to edi dubu ro na-iwarumiautiti Ioane, nou ro urubia keba se ta-imowautiti obo to kiwarumiauti sapuwo to.

³⁸ Nio umoro ie Nasareta dubu Iesu Godi ro ta-gohodowa ina nu Godi ro ta-gemapoi Tarena Urío ibose pupuwo korosa mutu. Nio umoro ta-iamotiti Iesu duriomoro gabogabo na-irohotiti meamea tanaro nou ro ta-isioidirotiti, idaibo urubia Satani pupuwo maumo ato na-irowomidirotiti neio nou ro meana ta-iwaititi. Mabu Godi Iesu mutu idabutititi.

³⁹ Nimo nou kitiodorai urubia, Iesu ro edi tanaro sirio na-isioidirotiti Iudia ra Ierusarema ra ato, nimo ro nou simara idomari to ta-niaurititi-mo. Kaupoti Iu urubia Ierusarema sabowa ato na-gorowomidiro Iesu neio ro gopia-rimo ota kemowotowa ato na-gemopoguti-rimo.

⁴⁰ Ina netewa didi saiki na-gorobai Godi ro nou pamo rido nato gowameai-ro urubia ro owea ri.

⁴¹ Nou Godi ro edi kowameai ro na-gowameai-ro ibo pua nou urubia sirio aboto korowapotaiddiro, nou nimo aboto se gorowapotaiddiro-ro. Godi ro edi urubia ro keba se na-giapoi nou sosoro owea ri nimo nou e, nou nimo aboto se gorowapotaiddiro-ro. Nou Godi ro pamo rido na-gowameai-ro, nimo nou mutu ohona atu moro ato nato niho-rimo ibose simara idomari to nato niauri-rimo.

⁴² Nimo nou ro ibo nimowapotai-ro urubia imowauti ri ibo Iesu Godi ro keba se ta-gohodowa-ro, korowaburo urubia ina korowomidiro urubia nimo atu se koto nou ro anama-iwai-ri.

⁴³ Imese sirio Godi ipusu oweru urubia ro neio

ro keba se ta-iarotiti-mo ibo, Godi ro kohodowa dubu owera etio ro imibiria-dumo neio edi ubauba ro Iesu Keriso edi pupuwo ro neito Godi ro ama-imatopeamuti-ri.'

Godi ro Tarena Urio Iu owera karo tato urubia aboto gemeiriai-ro

⁴⁴ Pita ro edi tanaro sirio ro na-giauri nou ro urubia nou gimowauti. Iedi atu tau ro nato nou owera etio ro gemewidiro-rimo Godi ro Tarena Urio aise gemeiriai-ro neio aboto.

⁴⁵⁻⁴⁶ Koneria urubia ro neio umoro tato owera to Godi neito gemowabu-rimo, ina iedi Iu kimibiria urubia ro Pita mutu na-gou-rimo neio ro nato gemewidiro-rimo. Ina iedi Iu urubia ro neio ro na-gowea-rimo edi tanaro ro na-gororosoidiro, neio kimaragoidiro ro giopia mabu Tarena Urio ata wisa tato se gemeiriai-ro Godi ro Iu owera karo tato urubia aboto.

Ina Pita ro ibo simara Iu urubia aboto,

⁴⁷ 'Nio ata ro ama-iwotowa-ri ra nedi urubia ro obo to kiwarumiauti aboto? Godi ro Tarena Urio neio aboto ta-emeiriai-ro, nimo aboto keba se beda sosoro gemeiriai-ro, neio aboto atu sosoro emeiriai-die.

⁴⁸ Neio nio ro obo to ba-diwarumiauti-mo, neio Iesu Keriso urubia to orowomidiro rie.'

Taie obo to aise giwarumiauti-rimo. Ina Pita neio ro iato gemodowa-rimo ibo, 'Oro nimo mutu komidiro modobo ra arua saiki to?'

11

Pita korowairiai owera to gimowauti Iu kimibiria urubia

¹ Iesu ro kitidorai urubia, arua kimibiria
urubia mutu Iudia duriomoro ato
na-gorowomidiro, neio ro owera
ta-girorowai-rimo ibo Iu owera karo tato urubia
Godi edi owera ro neio ro ibose to
ta-gimibiria-dumo.

² Ata tau, Pita imese gidiai Ierusarema sabowa
to. Arua Iu urubia Iesu na-gowasoro-rimo, neio
ro Pita na-gowea-rimo, neio auna serawo
goi-rimo nou aboto.

³ Taie neio ro ibo, 'Pita oro Iu owera karo tato
urubia mutu ohona na-ihotiti, nimo Iu urubia
sabi idaibo oro ro iwaruriautititi!'

⁴ Taie Pita ro neio aboto owera mea mino to
nato gemabuti, nou ro ibo,

⁵ 'Mo Iopa sabowa ato nomidiro ina mo Godi
aboto na-nararatoro hiwo sosoro to ata nakomu
mo ro nato niauri, auna obotama toboro rido
sapusapuwo rido gorobidiro-rimo ioudo
gowororuwo-rimo mo aboto. Iedi obotama ro
mo ro nato aupise nowea,

⁶ taie mo ro obotama goro na-nemetai nato
a-giamo sairo to koroho namabu sirio, goto ato
koromudidiro nakomu sirio, erere pawa mo ro
nou niwia.

⁷ Taie toboro ohu rido owera kodu iato
gutura-ro, "Pita! Nedi nakomu sirio ro diopiauti,
ba-diho!"

⁸ Mo ro ibo, "Abera Naramu, nedi ohona ro mo
ro abora ia se nama-iho-ri. Idaibo nakomu nimo
ro kiho pua, sabi ie."

⁹ Owera kodu ina toboro rido iato gutura-ro,
"Imese beda mutu nakomu patu ro iamo Godi ro

meana ta-giwai kiho modobo ie. Idaibo sosoro ohona sabi to iasoro mamu.”

¹⁰ Iedi tanaro ro netewa didi tau to gororosioi-di-ro-birimo. Iato tuturu to pua iedi auna obotama ro ohona sirio mutu toboro to aise giwameai.

¹¹ Iedi atu tau ro nato mo edi moto ato nomidi-ro netewa didi dubu peteibi neibi magere damo ato gotoi-birimo. Neibi Koneria ro Siseria sabowa rido gimeiriai-biro mo aboto.

¹² Taie mo Tarena Urio ro nato nemowapotai-ro ibo nedi dubu peteibi ro mo neibi mutu atu se ou ri Koneria aboto, ata ubauba kimaragoidi-ro tato se. Nedi 6 Iu kimibiria borubi ro neibi ibose ta-garadabuai-birimo mo mutu atu se nou-birimo Koneria moto to.

¹³ Taie Koneria ro neibi ibo nimowapotai-bi, “Godi sowake urio nato gorowapotai-ro mo aboto. Nou ro ibo, ‘Oro ro sipu tato na peteibi ba-dimeiriai-ibi Iopa sabowa to, ata dubu masiro Saimoni Pita ba-morobai-birimo neito ba-mowou-birimo.

¹⁴ Ina oro moto urubia oro ia mutu nou ro mea oweru ama-imowauti-ri, Godi ro nio beda sosoro ama-iapopo-ri ubauba aboudo.’ ”

¹⁵ Taie mo ro nedi oweru ro kimowauti na-natamuai, Koneria nou urubia mutu iedi atu tau ro nato Tarena Urio neio aboto aise gateai-ro. Nimo aboto keba se beda sosoro gororuwo-ro, idaibo sosoro gororuwo-die neio aboto.

¹⁶ Ina mo kimaragoidi-ro nato niwameai Abera Naramu ro beda oweru garo keba se. Nou ro ibo garo, “Urubia Ioane ro obo to se

ta-iwarumiautiti, kaupoti nio Godi ro Tarena
Urio to ama-iwarumiauti-ri.”

¹⁷ Nimo Iu urubia Iesu oweru
na-nimibiria-dumo Tarena Urio Godi ro nimo
aboto ata wisa tato gemeiriai-ro, ina neio aboto
atu sosoro wisa tato se gemeiriai-die. Ina mo
aboudo modobo ra Godi woko kodiobuti?
Marasio mo ro odiobuti-ri pua.’

¹⁸ Iu kimibiria urubia serawo oweru dese to
garo-rimo, iedi serawo ro boito hatu
gowou-rimo aise gararaseperai, taie Godi neio ro
iato gemowabu-rimo. Neio ro ibo, ‘O! Godi ro
ibose gabo ta-godobura-die Iu oweru karo tato
urubia ubauba aboudo erewesegere ri, womu
tato womu tato keremiro komidai sapuwo to!’

Mea oweru Entioko sabowa to na-gorowateai

¹⁹ Sitibini edi tau ato na-gopia-rimo,
Ierusarema ato kimibiria urubia iato
na-gorowomidiro neio ioudo
gorowadaudiro-rimo erere sabowa to
goroho-rimo. Arua neio Ponika duriomoro to
giodori, arua neio Saiporasi ura to giabu-rimo,
arua neio Entioko sabowa to gou-rimo. Nedi
urubia ro neio ro mea oweru Iesu sapuwo to iato
Iu urubia se imowautiti-mo.

²⁰ Arua kimibiria urubia Saiporasi ura rido
giabu-rimo ina arua Sairini sabowa rido ie neio
atu se gou-rimo Entioko sabowa to mea oweru
Abera Naramu Iesu sapuwo to neio ro
gobodorouti-rimo Iu urubia aboto daro Iu oweru
karo tato urubia aboto.

²¹ Nedi oweru ro urubia ro
na-girorowidiro-rimo neio aise gimibiria-rimo
taie iato gerewesegere-rimo Iesu kowasoro

aboto. Mabu nedi kimowauti urubia ro Abera Naramu edi pupuwo korosa ro neio abato owamotiti.

²² Nedi tanaro ro na-gororosioi-di-ro-rimo, kimibiria urubia na-gorowomidi-ro Ierusarema sabowa ato neio ro na-girorowai-rimo, taie neio ro Banabasi aise gemeiriai-rimo Entioko sabowa to.

²³⁻²⁴ Banabasi mea dubu e, nou ata auna kimibiria dubu e, Tarena Urio ro woworohutiti. Banabasi Entioko sabowa to na-gorowateai, nou ro nato giwia urubia Godi ro wisa tato nirimagare beda sosoro gaiwai neio aboto, nu auna kamade goi. Nou ro neio pupuwo iato giwaititi, idaibo sirio tau Abera Naramu owerase gi-irowidi-ro morobise giropu mutu gi-isioidi-ro tanaro. Ina kimibiria urubia imese sirio ta-goi-rimo, Iesu kowasoro urubia to aise gararapoi-rimo.

²⁵ Taie Banabasi Tasasi sabowa to ito na-gou Sauro osora ri, nou ro ibo osoratiti womu tato ti-gowea.

²⁶ Banabasi ro Sauro na-gowea nou ro nu aise gadabuai-ro imese gowou Entioko sabowa to. Neitiro Iesu urubia mutu ta-iradabutiti-do kaupoti kisimisi to, urubia sirio iato itamudirotiti-do. Iedi tau ro nato Entioko sabowa ato kowasoro urubia keba tau e urubia ro Keriso Urubia to kiapoi, ibo owamo Keriso do ie.

²⁷ Iedi atu tau ro nato Godi ipusu ower urubia arua, neibi Ierusarema sabowa rido giodori-biro Entioko sabowa to.

²⁸ Neibi aboudo ata dubu Agabasi nu aise gotobowa, Iesu urubia nou ro Tarena Urio pupuwo to gimowauti ibo, 'Ata ubauba tau amadi-ererede-ri imese duriomoro gebari ato. Iedi tau ro urubia auna ia sogoi ro ama-iwatititi-ri.' (Nedi tanaro ro Karadiasi auna eputa dubu to na-gomidiro nato gororosioidiro-rimo.)

²⁹ Kimibiria urubia ro na-girorowai-rimo neio oweri nato giamo idaibo kimibiria borubi Iudia duriomoro ato na-orowomidiro beda sosoro amadimi-iwarebai-ri. Neio ro ubi to gomidai-rimo

³⁰ taie mani iato gidabuti-rimo, iedi mani ro neio ro Banabasi ra Sauro ra aboto giaiwai-rimo. Ina ioudo neitiro ro giwou-rido Iudia duriomoro ato na-gorowomidiro Iesu urubia etio ro emeauri-dumo neio aboto.

12

Tagara Herodi-Agiripa ro kimibiria urubia ubauba na-iwaititi

¹ Iedi tau ro nato Herodi boso urubia ro arua kimibiria urubia aise irobotiti-mo iado ri.

² Keba se Ioane edi naramu ro Iemisi nou aboto gosioidiro-rimo nedi tanaro ro. Neio ro nu na-gorobai-rimo iato garia-rimo.

³ Herodi umoro na-goi ibo Iu urubia kamade ta-goi-dumo nou ro nedi tanaro ro na-gisioidiro, ina Pita nou ro iato gedea dibura to. (Nedi tanaro ro Patapata Beredi Kiaupai Tato nou soriomu kisioidiro tau ato gororosioidiro.)

⁴ Pita dibura to na-gedea-rimo nou netewa netewa boso dubu patu ro gemotoi-rimo. Herodi

gabo ibo giworohuti, Pita sapuwo to Kimasaudai Soriomu iamo ri, nou saro gabo ato Pita nato owosuruo rie koto owai ri urubia sosoro gabo ato.

⁵ Pita dibura abato ibo gomidiro, isana Iesu urubia Ierusarema sabowa ato na-gorowomidiro nou sapuwo to Godi auna ia se gararatoro-rimo.

Pita dibura moto rido na-gosuruwo-ro

⁶ Pita ata kowaroho ato Herodi ro owosuruo rie koto aboto dibura moto rido, iedi duwo ro nato nu boso dubu teibo turituri ato gorobu. Tu sapusapuwo anikapo to ta-gemotohiti-rimo, anikapo womu teibo boso dubu teibo aboudo girobu-marō. Arua boso urubia ro magere gemotoi-rimo.

⁷ Iedi tau ro nato Godi sowake urio aise gorowapotai-ro, iedi dibura moto ro pina aise gimewia. Pita nou ro gomo ato aise gopipimai, nou ro ibo, 'Pita! samo to deribua.' Nou ro edi owera ro na-girorowai anikapo tu rido egenabo gararapopodorai-rimo.

⁸ Ina sowake urio ro ibo, 'Oro bereito daratahirai, tamaka dirori-ma, dou-ro, mo saro rido dobodoro-ro.'

Taie Pita bereito karatahirai,

⁹ Godi sowake urio keba se ioudo gosuruo-ro Pita ro nou saro rido aise gobodoro-ro. Kaupoti Godi sowake urio edio tanaro ro gisioidiro, Pita umoro iamo pua ibo morobise to ororosiodiro-dumo. Nu a-gimaragoidiro ibo, 'Mo ro hiwo to niauri.'

¹⁰ Neitiro ioudo na-gosuruwo-rido keba boso dubu na-gorohodorai-rido ina ata boso dubu

iato gorohodorai-rido, womu tato auna magere damo to ti-gorowateai-rido. Iedi auri magere gebari ro nakara se egenabo gorodobura. Taie neitiro imese gosuruwo-rido, auna gabo to na-gereredea-rido Pita ipi gabo ato sowake urio ro aise gemeserai, nou nakara se imese gou.

¹¹ Pita iato a-geremasibai beda tanaro ro gororsioidiro. Nou ro ibo, 'Mo abora morobise to umoro noti noi Abera Naramu ro emeiriai-die sowake urio mo aboto, ubauba aboudo nowagare-die. Iu urubia ubi ie mo Herodi woko urubia ro opia ri, kaupoti mo Godi sowake urio ro nowagare-die ioudo.'

¹² Nou umoro na-goi, taie nu ioudo aise gemobodiai-ro Maria moto to, Maria mere ie Ioane, nou ata masiro Mareko. Kimibiria urubia sirio Maria moto ato ta-garadabuai-rimo, auna se iato gararatoro-rimo Pita sapuwo to.

¹³ Pita edi moto ro neito aise gemobodiai, magere ato iato gipoguti. Nou na-gipoguti iato ata sowake besere ro gemororowai, nu aise gosuruo-ro magere emodobura ri, iedi besere ro masiro Rouda.

¹⁴ Pua ie Rouda ro Pita kodu ato se geibimai nou auna kamade ro gorobai, kaupoti Pita magere nou ro emodobura pua. Rouda ina ioudo aise gororoupiriai-ro kowasoro urubia aboto, taie nou ro nato gimowapotai ibo, 'Pita totoi-die magere damo ato!'

¹⁵ Ina neio ro ibo, 'Ese, oro kawakawa ro ta-worobai!'

Kaupoti Rouda ro ibo, 'A a nou se ie, Pita ie, nou ro ipoguti-die, nou owera kodu mo ro

ta-nemororowai.'

Ina neio ro ibo, 'Etu umoro ra io Pita edi sowake urio ro iaurititi, nou ro ipoguti-die.'

¹⁶ Pita kipoguti eremasio pua, inaina aise gipoguti-ro. Taie neio atu se iato gosuruwo-rimo nato Pita se gowea-rimo neio imese a-giwagogorai-rimo Pita sosoro na-gowea-rimo.

¹⁷ Pita ro neio tu to gimadohodai. Nou ro neio iato gimowauti nou Abera Naramu ro beda sosoro owosuruo-die dibura moto rido. Nou ro ibo, 'Iesu edi neama ro Iemisi arua kimibiria naminiramio mutu neibi se ba-dimowapotai-ibimo ibo beda tanaro ro ororosioidiro mo aboto.'

Taie nedi owera ro na-garo, Pita ata moro to aise gaimai.

¹⁸ Ata saiki ato Pita edi boso urubia ro na-gemotoi-rimo neio ro nu pотор se gowea-rimo dibura moto goro ato, neio iato a-garageguti-rimo.

¹⁹ Herodi ro na-girorowai nedi owera ro, sowake urubia iato gimeirio Pita neio ro iato gosora-rimo, owea pua. Herodi ro iato gimodoruti Pita edi boso urubia ro gemotoi-rimo. Taie Herodi ro ibo, 'Edi boso urubia ro neio nato orowomidiro-ri pua, ba-diopiauti-mo Pita kodau sapuwo to.'

Tagara Herodi-Agiripa na-garaburai

Nedi tanaro ro na-gororoporeai-rimo, eputa dubu Herodi-Agiripa Iudia duriomoro na-gemeserai, imese godori-ro Siseria sabowa to nou iato gomidiro.

²⁰ Taie ata oweru nou ro nato girorowai Taia ra Sidoni ra sapuwo to, nou auna serawo ro gorobai edi sabowa teibo ro neitiro urubia aboto. Kaupoti Taia ra Sidoni ra sabowa teibo rido urubia ta-gimeiriai-rimo Herodi aboto, neio atu ubi ato Herodi ro miro neio abato edea ri. Nedi urubia ro neido na-gou-rimo Herodi saro edi dubu ro emeaurititi masiro Barasitasi neio keba se nou aboto gorowateai-rimo, neio ro nu a-wageawadotiti-mo neio iwarebai ri. Barasitasi ubi ta-goi neio kiwairiai aboto. Neio ubi ie miro ro kereredea mabu neio ohona Herodi duriomoro rido imadetiti-mo.

²¹ Taie Herodi ro beda saiki gapoi karadabuai aboto oweru eremowauti ri, eputa dubu edi obotama iroidirotiti-dumo nou ro na-giroiti eputa dubu sea to aise gomi. Taie urubia sirio na-garadabuti-rimo Herodi oweru karo nato gatamuai,

²² urubia sirio imese kamade ro giwati nou oweru gare na-gemedea-rimo. Neio ro ibo giaiauti-rimo, 'Nedi dubu ro oweru urubia dubu sosoro aro pua, Godi sosoro aro-die!'

²³ Ina Godi masiro auna owai pua Herodi ro, nu auna nakara se aise gorowai. Nu nakara se ohu to gorowiourio, ina noudo ie iedi atu tau ro nato Godi ro sowake urio iato gemeiriai-ro, Herodi nou ro temeteme aise gomia. Taie nu niro turi poporo ro aise gowaroho-rimo, iato nu pamo aise gowea.

²⁴ Kaupoti Godi edi mea oweru ro urubia ro aise obodoroutititi-mo erere duriomoro to.

²⁵ Taie Banabasi tiro Sauro mutu neitiro edi woko aboto gimeiriai-marimo na-goporeai-rido,

Ioane, ata masiro Mareko neitiro ro nou se
gadabuai-rido, neibi atu se imese
gorowameai-birimo Ierusarema sabowa rido
Entioko sabowa to.

13

*Banabasi ra Sauro ra Tarena Urio ro
girapoi-marō*

¹ Iesu patu urubia Entioko sabowa ato
na-gorowomidiro, ina neio abato Godi ipusu
owera urubia ibose to gomidiro-birimo
kitamudiro urubia mutu. Nedi na peteibi ro
neibi ie, Banabasi, Simioni nu garegare dubu e,
Rukiasi nou Sairini sabowa dubu e, eputa dubu
Herodi nu kororomai boinana Manaini, ina
ibose Sauro iato ta-gomidiro.

² Iedi tau ro nato neio ohona aise giraia-rimo,
kiho tato gorowomidiro Abera Naramu se
gemowabu-rimo. Iedi tau ro nato neio Tarena
Urio ro nato gimowapotai-ro ibo, 'Banabasi ra
Sauro ra ba-dihodowa-mamo, neitiro se
ba-dimeiriai-mamo mo ro edi auna woko ro
na-nimapoi-ma neitiro ro nou osioidiro rie.'

³ Nedi tanaro teibo ro na-gororoporeai-rido
ohona karaia daro Godi kemowabu nou saro
gabo ato, Godi iato garatoro-rimo. Neio tu
neitiro eputa ato iato gitomo-rimo neitiro mea
korosa kimia-ma sapuwo to. Taie neitiro ioudo
imese gimeiriai-marimo Godi woko emesioidiro
ri.

*Banabasi Sauro mutu mea owera gimowauti-rido
Saiporasi ura ato*

⁴ Banabasi ra Sauro ra Tarena Urío ro gitiodorai-ma Entioko sabowa rido imese giodori-ma Serusia sabowa to, taie ioudo neitiro sawa pe to se giora-rido imese giabu-rido Saiporasi ura to,

⁵ Ioane nou ata masiro Mareko nou mutu, neitiro nou ro iwarebidirotiti-ma. Neitiro Saramisi sabowa to gou-rido keba se. Iu urubia edi karadabu moto sirio ro neitiro ro Godi edi mea owera ro urubia iato gimowauti-rido.

⁶⁻⁸ Ina edi ura ro neitiro ro nato goroho-rido womu tato ata auna sabowa masiro Peposi neito imese gorowateai-rido. Taie Peposi sabowa ato neitiro ro ata Iu pakani dubu iato gowea-rido, nou masiro Baiesu. Nou ata masiro Giriki owera to owamo ibo Erimasi, nou maumo owamo ibo Pakani Dubu. Nou ata karasaubuti dubu e. Nou a-iratigititi Godi ipusu owera dubu to. Nedi pakani dubu ro gabamani dubu gomo ato ateidirotiti. Nedi gabamani dubu ro masiro Seregio-Pauro, nu ata mea kimaragoidiro dubu e.

Iedi tau ro nato gabamani dubu ro owera nato gemeiriai Banabasi ra Sauro ra nou aboto ou ri, mabu nu ubi ie Godi edi mea owera ro irowidiro ri neitiro aboudo. Kaupoti edi pakani dubu ro Erimasi ubi tato ie gabamani dubu ro mea owera Iesu sapuwo to kimibiria, neitiro nou ro aise idiobutiti-ma.

⁹ Kaupoti Sauro, nu ata masiro Pauro, edi tau ro nato nou Tarena Urío ro goworohuti, ina nu idomari teibo Erimasi ato se giwotobowa-ma nou se giauri. Nou ro ibo,

¹⁰ 'Oro imese Satani mere dubu ia ie. Mea tanaro kisioi diro aboudo oro imese neio boso dubu e. Oro abato ubauba tanaro, karasaubuti tanaro imese sirio ia se iamo. Abera Naramu edi morobise owera ro oro ro iwesegerewadotiti bagea owera to.

¹¹ Abora oro idomari teibo Abera Naramu ro tema to ama-iatimai-mari, nedi tau ro neido egea mere se oro pogo ama-omidi-ro, saiki pina woroworo oro ro iauri-ri pua!'

Nedi atu tau ro nato nou idomari teibo duwoduwo ro aise giatimai-ma, ito modobo pua mea se kirarowo. Taie nou ito na-giaubai modobo pua, nou ro urubia giosora owerebai ri.

¹² Ina nedi tanaro ro gorosioidiro-rimo gabamani dubu ro na-giauri, nou ro mea owera Iesu sapuwo to nato aise gimibiria. Mabu neitiro ro edi owera ro na-gorowauti-rido Abera Naramu sapuwo to, nou imese auna ia kimaragoidiro ro gopia.

Pauro ro gimowauti Entioko sabowa urubia

¹³ Pauro edi na urubia mutu goroho misinare aimara, neibi Peposi sabowa na-gemeserai-birimo, imese giabu-birimo Pega sabowa to. Pega sabowa Pampiria duriomoro ato owamo. Taie neibi edi tau ato gorowateai-birimo, Ioane-Mareko ro neitiro iato aise gimeserai-ma, nou ioudo aise gorowameai-ro Ierusarema sabowa to.

¹⁴ Ina Pauro Banabasi mutu neitiro ioudo gidiai-rido womu tato Pisidia duriomoro to ti-gorowateai-rido, iato neitiro aise gimobodiai-ma Entioko sabowa to. Iedi Entioko

ro Pisidia duriomoro ato owamo. Neitiro iato na-gomidiro-rido Iu urubia komidiro saiki ro iato girobai-ma. Taie neitiro edio saiki ro nato aise godoro-rido Iu urubia karadabu moto to.

¹⁵ Taie Iu dubu teibo ro Tarena Buka oweru urubia neitiro ro nato gimoputi-rido. Neitiro ata ro Mose edi sabi oweru ro neido gimoputi, ina ibose ata ro Godi ipusu oweru urubia ro edi na oweru gisoidiro-rimo, nou ro neido gimoputi. Kioputi na-goroporeai karadabu moto edi urubia ro na-iaurititi-mo neio umoro oweru iato gemeiriai-rimo Pauro ra Banabasi ra aboto ibo, 'Namutuna teibo, nitiro abato ata oweru kowamo ato, modobo ie nitiro ro urubia nato na-orowomidiro kimowauti neio pupuwo kimowaititi sapuwo to.'

¹⁶ Pauro na-geribua tu to urubia nou ro iato gimadohodai oweru eremasiai ri, nou ro ibo, 'Isiraere urubia idaro Iu oweru karo tato urubia nio ro Godi na-emowabutiti-dumo, oweru neito ma-dirorowidiro-rimo!

¹⁷ Isiraere urubia edi na emowabutiti-dumo nimo nasa naminami nou ro keba se ta-girapoi. Neio edi tau ato gorowomidiro Isipi duriomoro ato neio ro auna ia sipu nou giwia-rimo. Godi edi pupuwo korosa ro Isiraere urubia nou ro neito giwosuruwo-ro Isipi duriomoro rido.

¹⁸ Neio Godi ro edi mino to na-iwaboititi-ro goto se duriomoro ato 40 kisimisi to, Godi serawo samo to oititi pua neio aboto.

¹⁹ Keineni duriomoro ato neio sapuwo to Godi ro 7 erere oweru urubia patu neio giwai ubauba, ina nedi duriomoro gebari ro Isiraere urubia aboto gapoi.

²⁰ Nedi tanaro ro na-gororosioi-di-ro-rimo 450 kisimisi ta-giporeai-rimo Isipi duriomoro ato na-irowomidirotiti ina ibose na-outiti-rimo ipi ato, womu tato Keineni duriomoro ti-girobuti-rimo.

Ina nou saro gabo ato Godi ro neio kiauri urubia nato gimio, womu tato Semuere iana dubu e Isiraere urubia nou ro kiauri. Ibose nou Godi ipusu oweru dubu e.

²¹ Ina neio Godi aboto nato gararatoro-rimo eputa dubu imia ri neio kiauri sapuwo to. Keba se neio Godi ro Sauro gimohodowa. Sauro Kisi, nou Beniamini gu dubu e. Isiraere urubia nou ro 40 kisimisi to giwabo.

²² Sauro Godi ro aise gowagare ina iato nou ro Deibidi gohodowa eputa dubu to Isiraere urubia iwabo na. Godi ro Deibidi sapuwo to idaibo oweru gutura, “Iesi edi mere ro *Deibidi nou abato ta-nowea mea tanaro, neitiro kaupoti kimaragoidiro ie nou mutu*, mo ubi tanaro imese nou ro ama-isioidirotiti-ri.”

²³ Godi ro keba se oweru ta-garo-ro ibo Deibidi edi nasa ro Isiraere urubia nou ro amadi-apopo-ri ubauba aboudo, Godi ro hodo ibo gasaubiai-ro keba se, ina Deibidi edi nasa ro Iesu nou se ie.

²⁴ Iesu saro to gou-ro keba se Ioane ro Isiraere urubia ibo imowautititi, “Nio ubauba aboudo derewesegerai-mo ina nio obo to nato anama-iwarumiauti-ri!”

²⁵ Ioane woko na-goporeai nou ro ibo gimowauti, “Mo nio ro etu to nasoro-dumo? Mo Godi ro kohodowa dubu to asoro mamu, mo nou pua. Nu saro rido tou-die, mo aboudo modobo

pua nou sairo sigibere kemowiouti aboto, nu imese auna ia dubu e.”

²⁶ Mo borubi Iu urubia, nio Aberaham urubia ie, neito ma-dirowidiro-rimo! Ina ibose arua Iu oweru karo tato urubia nato na-orowomidiro nio ro Godi na-emowabu-dumo, nio imese oweru atu se neito ma-dirowidiro-rimo! Nimo aboto mea oweru neito ta-gorowateai-die nimo Godi ro ubauba aboudo kiwatateai aboto.

²⁷ Ierusarema sabowa ato edi urubia ro na-irowomidirotiti neio eputa urubia mutu, nedi urubia ro neio ro Iesu mea se eibimai pua. Ibose Godi ipusu oweru urubia ro edi oweru ro gisioidiro-rimo, komidiro saiki gabogabo ato ta-imopotiti-mo. Kaupoti Ierusarema urubia ro maumo mea se imadetiti pua, ina noudo ie Godi ipusu oweru morobise to noti gororosoidiro-rimo neio ro Iesu na-gapoi-rimo opia ri.

²⁸ Iesu kopia sapuwo to neio ro ata ubauba ata emowea pua. Kaupoti nou neio ro Pairiti aboto aise gowou-rimo nou ro neio gabo imapoi ri kopia aboto.

²⁹ Beda oweru iatititi-mo keba ia se Godi ipusu oweru urubia ro nou pamo kowea sapuwo to, Ierusarema urubia ro ibose to gisioidiro-rimo nou aboto. Namuturubi ro ota kemowotowa rido nou pamo durupi na-gebedai-rimo, bobo to aise gibiria-rimo.

³⁰ Kaupoti nu Godi ro pamo rido aise gowameai-ro.

³¹ Nou ro Gariri duriomoro rido beda urubia giwaboi-ro Ierusarema sabowa to, nou neio aboto se irowapotaidirotiti. Nou abato beda

tanaro ro gororosioi diro-rimo nedi urubia ro neio ro owautiti-dumo Iu urubia aboto.

³² Keba ia se Godi ro beda owera ra na-garo-ro nimo nasa naminami aboto, abora nedi mea owera ro nou sapuwo to nio neitiro ro neito nimowauti-do.

³³ Nimo gu ioudo irobu-die, ina nimo sapuwo to Godi ro beda owera garo keba se morobise to ti-gororosioi diro-rimo, Iesu nou ro na-gowameai-ro pamo rido. Tarena Ohare Buka 2 ato nedi owera ro nato iamo Godi ro na-garo, *Oro mo mere ie. Abora mo oro Abera to nararapoi.*

³⁴ Iesu Godi ro bobo rido ta-gowameai-ro ina nou orowameai-ri pua bobo to durupi iato epuse ri. Ina nou sapuwo to ie Godi ro keba se ta-gutura ibo, *Deibidi mo ro ta-nemowapotai ibo nu mo ro anama-owarebidi-ro-ri, ina nio morobise to ibose to anama-iwarebidi-ro-ri.*

³⁵ Ina nou mabu ato iamo Tarena Ohare Buka ata ipi ato Deibidi ro ibo ta-garo Godi aboto, *Oro ro emauriai-ri pua oro Tarena Dubu durupi epuse ri bobo ato.*

³⁶ Deibidi komidiro keremiro maumo ato nou ro Godi ubi tanaro ta-isioidirotiti. Deibidi na-garaburai nou pamo durupi aramio negenege beda moro ato gimobuti-rimo nou neio gomo ato gemoba-rimo, ina nou durupi aise gepuse.

³⁷ Kaupoti Godi ro edi dubu ro gowameai-ro bobo rido nou ia sapuwo to Godi owera morobise to ti-gororosioi diro-rimo, nou pamo durupi epuse pua.

³⁸ Mo borubi Iu urubia, nio modobo ie umoro aise koi neitiro ro nio beda owera to

nimowauti-do. Owera ibo ie Iesu aboudo modobo ie nio edi ubauba ro nou ro kimatopeamuti aboto.

³⁹ Mose edi sabi kibodoro gabo ro nio nou ro mea tuputupu urubia to iapoi-ri pua. Kaupoti Iesu sapuwo to etio ro imibiria-dumo neio nou ro mea tuputupu urubia to nato ama-iapoi-ri.

⁴⁰ Ina noudo ie mea se deremowotoi-mo, Godi ipusu owera urubia edi owera to garo-rimo, modobo pua nio aboto atu sosoro tanaro ro kororosioihiro. Mabu Godi ro ibo ta-garo,

⁴¹ *Nio etio ra mo na-nemasewado-dumo mea se ma-dowea-mo! Nio kimaragoidiro ro nama-iopia-ri iato nio amadimo-orowaburo-ri. Mabu nio komidiro keremiro maumo ato mo ro ata sosoro tanaro anama-osioihiro-ri, kaupoti nio ata dubu ro nedi tanaro ro nou sapuwo to kimowauti rasiri ie, nio ro imibiria-ri pua.'*

⁴² Pauro ra Banabasi ra Iu urubia karadabu moto na-gemeserai-rido, taie Iu urubia ro neitiro nato gimagege-marimo ibo, 'Nitiro ina ata komidiro saiki ato ba-dorowameai-rido nimo nedi owera ro imowauti ri.'

⁴³ Taie iedi karadabuai tanaro ro na-gororoporeai, Iu urubia sirio, ina Iu owera karo tato urubia mutu etio ro godoro-rimo Iu urubia tanaro kisioidiro aboto, neio ro ibose Godi na-emowabutiti-mo, nedi urubia ro Pauro ra Banabasi ra beda moro to gou-rido neio ro saro rido aise gibodoro-marimo. Taie neio neitiro ro aise gimediawado-rido ibo, 'Godi edi wisa tato nirimagare ro na-gaiwai-ro nimo aboto, modobo ie edi gabo ro nio nato aise korowotoi.'

*Mea oweru Iu oweru karo tato urubia ro
gimibiria-rimo*

⁴⁴ Taie iato ata komidiro saiki na-gorobai, sabowa urubia imese sirio se aise gemaubai-ro Abera Naramu edi oweru ro nou irowidiro rie.

⁴⁵ Ina Iu urubia ro na-giwia-rimo Iu oweru karo tato urubia sirio, neio masawe aise goi-rimo. Pauro neio ro ubauba oweru imese iato gomio-rimo, ina nou oweru aise gemasio-rimo.

⁴⁶ Kaupoti Pauro ra Banabasi ra neitiro ro oweru pupuwo to iato garo-rido neio aboto ibo, 'Keba se Godi edi mea oweru ro neitiro ro nio Iu urubia aboto ta-norowauti-rido, io modobo ie. Kaupoti nedi oweru ro nio ro ebeiouti-dumo. Pua buro! Nio ro ibo imaragoidiro-dumo, "Nimo ro modobo pua womu tato keremiro koweia aboto!" Ina noudo ie neitiro Iu oweru karo tato urubia aboto namado-oro-ro, neio anamadi-imowauti-ri.

⁴⁷ Mabu neitiro Abera Naramu ro ibo nimowapotai-marō, *Oro mo ro narapoi oro pina ie Iu oweru karo tato urubia sapuwo to ama-imewiautiti-ri, imese duriomoro urubia umoro oititi ri ibo mo ro urubia ubauba aboudo idaibo mino to kiapopo ie.'*

⁴⁸ Iu oweru karo tato urubia ro na-gimororowai-marimo neitiro edi oweru ro na-garo-rido neio kamade ro giwati, ina neio ro inaina aise garowado-rimo ibo, 'Abera Naramu edi mea oweru ro imese meana ia ie!' Ibose Godi ro keba se etio girapoi womu tato womu tato keremiro koweia aboto, neio ro nedi oweru ro aise gimibiria-rimo.

⁴⁹ Taie iedi tau ro noudo Abera Naramu edi owera ro Pisidia duriomoro ato imese aise gorobodorouti.

⁵⁰ Kaupoti awawo mamio Godi etio ro emowabutiti-mo, sabowa eputa urubia mutu, neio Iu urubia ro niro korosa gimio-rimo Pauro ra Banabasi ra sapuwo to. Ina neitiro urubia sirio ro ubauba mino to giworohuti-marimo, taie neio simara duriomoro rido neitiro ioudo aise giwagare-marimo.

⁵¹ Iedi tau ro nato Pauro ra Banabasi ra poro panese se geremahuduti-rido, ina neitiro imese gou-rido Ikoniam sabowa to.

⁵² Kaupoti kimibiria urubia Entioko sabowa Pisidia duriomoro ato na-owamo, neitiro ro na-gimeserai-rido neio auna kamade ro iwatititi neio Tarena Urío ro wiworohutititi.

14

Pauro ra Banabasi ra ro Ikoniam sabowa urubia gimowauti-rido

¹ Pauro ra Banabasi ra beda tanaro to irowatiti-do ata sabowa to kou ato, neitiro Iu urubia karadabu moto to aise kimobodiai-ma ie, taie neitiro ro urubia iato kimowauti ie owera Iesu sapuwo to. Ina neitiro ro idaibo tanaro nou gisioidiro-rido Ikoniam sabowa to na-gorowateai-rido, Iu urubia edi karadabu moto ro neito aise gimobodiai-ma. Ina urubia sirio ito ta-garadabuti-rimo Iu owera karo tato urubia Iu urubia mutu, taie Iesu sapuwo to neitiro ro nedi owera ro neito gimowauti-rido. Iesu sapuwo to neitiro ro urubia pupuwo ia to

gimowauti-rido ina nou rie urubia sirio aise
gimibiria-rimo.

² Kaupoti amia Iu urubia imibiria pua, ina
neio ro Iu oweru karo tato urubia ubauba
kimaragoidiro iato gimio-rimo kimibiria urubia
sapuwo to.

³ Pauro ra Banabasi ra nou ri gomidiro-rido
tuturu tau to Ikoniam sabowa ato. Neitiro ro
Abera Naramu sapuwo to ata tere tato
irowautititi-do. Neitiro woko edi pupuwo to
gisoidiro-rido Iesu aboudo gou-ro, neitiro ro
awawo korosa tanaro nou mabu ato
gisoidiro-rido. Neitiro ro edi awawo korosa
tanaro ro na-gisoidiro-rido, Abera Naramu ro
neito gowapotaiddiro-ro ibo, neitiro ro edi oweru
gimowauti-rido Godi edi wisa tato nirimagare ro
na-gaiwai-ro nou sapuwo to io morobise ie.

⁴ Imese urubia sirio iedi sabowa ro iato
na-gorowomidiro neio turi ato aise
gorohodowa-rimo. Arua neio Iu urubia aboudo
goi-rimo, ina arua neio kitiodorai-ma dubu teibo
aboudo goi-rimo. Arua Iu urubia, arua Iu oweru
karo tato urubia simara awawo urubia mutu,
oweru iato gisoidiro-rimo.

⁵ Neio ro Pauro ra Banabasi ra iato
gimediai-marimo ubauba mino to
iworohuti-mari ina nadi to ibo-mari.

⁶ Ina neitiro ro nedi oweru ro
na-girorowai-rido neitiro iato tuturu tau to
omidiro pua, Ikoniam sabowa aise
gemeserai-rido imese gorowadau-rido Raikoniam
duriomoro to. Ina Raikoniam duriomoro ato
sabowa teibo iato giamo-ma Risitira ra Debe ra
neitiro ito gorowadau-rido. Ina arua sabowa

kainakaina gomo ato na-giamo

⁷ Pauro ra Banabasi ra ro Iesu sapuwo to mea oweru urubia iato ta-gimowauti-rido.

Pauro ra Banabasi ra Risitira urubia ro mea se iebimai-ma pua

⁸ Risitira sabowa ato neitiro ro urubia sirio iato gimowauti-rido. Iedi sabowa ro nato ata togiri dubu iato imidirotiti, nu mamu ro ibose to goroto.

⁹ Pauro ro oweru na-giwasoro Iesu sapuwo to togiri dubu ro Pauro oweru gare se gemedea-ro. Pauro idomari teibo edi dubu ro nou ato se giwotoi-ma. Ina nu ta-geremasibai ibo togiri dubu ta-imibiria ibo 'Pauro ro iedi oweru ro na-warodie Godi sapuwo to mo nou ro meana anama-owai-ri.'

¹⁰ Pauro ro auna se ioudo gemaia-ro iedi dubu ro, 'Urubia dubu, deribua!'

Iedi dubu ro aise geribidiro, imese goroho simara sairo to.

¹¹ Urubia sirio ro na-gowea-rimo edi tanaro ro Pauro ro na-gosoidiro, neio Raikonias oweru to auna se iato giaiauti-rimo. Neio ro ibo, 'Abora orora dubu teibo paea dubu teibo to aratigi-do, neitiro ro isoidiro-do idaibo pupuwo korosa tanaro.'

¹² Taie neio ro neitiro masiro iato gimia-marimo, Banabasi neio simara orora masiro Seusi neito gomiasimo, Pauro Hemesi to gomiasimo, mabu owamo ibo Hemesi arua orora sapuwo to nou ro kimowauti dubu e, ina Pauro Hemesi sosoro ie auna oweru karo dubu e.

¹³ Seusi asaso daimo ato itoititi sabowa gomo ato, ina nou turi dubu ro burumukau amia

sowio namabu mutu iato giwou-ro sabowa kodouti magere damo to. Nou urubia mutu ubi ie Banabasi ra Pauro ra burumukau dao imamatowo-mari, nedi tanaro ro nou mabu rido gisioidiro-rimo.

¹⁴ Kaupoti neitiro umoro na-goi-rido auna masawe ro girobai-ma, namabu aise gerewekekiouti-rido, iato aise gorowatea-rido urubia dubu patu maumo to. Neitiro ro urubia iato gimaia-rido,

¹⁵ 'Nio ro etou mabu rido isioidiro-dumo idaibo tanaro? Nio paea urubia beda sosoro ra neitiro ibo ie, urubia dubu teibo ie! Modobo pua nio idaibo tanaro na-wosioidiro-dumo neitiro aboto! Nio neitiro ro mea oweri nimowauti-do nedi dorogora namabu ro imesera i morobise Godi aboto erewesegerai rie. Godi ia ro gisioidiro toboro, oromo, nedi sopu duriomoro gebari ro, ibose beda mutu namabu sirio ro iamo nato.

¹⁶ Keba se erere duriomoro urubia Godi ro idomari to ta-iaurititi-ro simara ubi tanaro na-isioidirotiti-mo.

¹⁷ Kaupoti nou nirimagare rido ie toboro rido daroho nou ri emeirititi-die, pari namabu na-isuwoduti-dumo nou ro iwoubuatiti-die nio ro iho na. Nio niro turi ato kamade na-iamotiti nou ro imaremotiti-die, nou ro idaibo mino to nio aboto irowapotaidirotiti-die. Modobo ie nou se kemowabu!'

¹⁸ Neitiro ro urubia auna se gimadowere-rido nedi oweri ro neito, neio auna ubi ro giamo neitiro sapuwo to burumukau dao kimamatowo-ma.

¹⁹ Taie arua Iu urubia Entioko ra Ikoniam ra sabowa teibo rido na-gou-rimo, neio ro oweranato gisaubuti-rimo Pauro sapuwo to, ina Risitira sabowa urubia ubauba kimaragoidiro neio ro gimio-rimo. Pauro sabowa urubia ro nadi gohi to iato gobo-rimo, sabowa goro rido aise gomudo-rimo amede daimo to. Neio ro a-gimaragoidiro-rimo, 'Pauro nimo ro ta-nopia-mo, ta-waraburai.'

²⁰ Kaupoti kimibiria urubia iato ta-gorowotoi nu neio ro na-gemowaperai-rimo, iedi tau ro nato nou aise geribua-ro, sabowa to imese godoro.

Ata saiki Pauro Banabasi mutu iedi sabowa ro aise gemeserai-rido imese gou-rido Debe sabowa to.

Pauro ra Banabasi ra amia sabowa neito gorowameai-rido

²¹ Pauro ra Banabasi ra Debe sabowa urubia na-imowautiti-do, sirio urubia iato na-gorowomidiro neio neitiro ro Iesu kowasoro aboto aise giwasaudai-rido. Ina neitiro Debe sabowa rido na-gorowameai-rido, Risitira sabowa to aise gou-rido, ina ioudo gorowameai-rido Ikoniam sabowa to, ina ioudo Entioko sabowa to.

²² Taie neitiro ro kimibiria urubia sirio pupuwo iato giwaititi-rido. Neitiro ro kowasoro urubia kimibiria pupuwo imowaititi-do ibo, 'Kimibiria tanaro koko se ba-dorobidiro-mo! Godi edi kiwabo! tanaro ro nimo neito na-nodouti-dioumo, sirio koko tau nimo aboto amadidime-erereihuti-ri.'

²³ Neitiro ibo irowatiti-do ata sabowa to kou ato, ohona kiho tato obo kidio tato Godi iato kararatoro ie. Ina Iesu patu urubia sabowa gabogabo ato na-gorowomidiro, neio aboudo neitiro ro Iesu urubia kemeauri urubia idaibo mino to giaubo-rido. Nedi kemeauri urubia ro Abera Naramu sapuwo to ta-gimibiriauti-rimo, ina Pauro ra Banabasi ra ro Iesu tu to neio aise kiedea ie.

²⁴ Taie Pisidia duriomoro neitiro ro aise gemeserai-rido imese giodori-marō Pampiria duriomoro to,

²⁵ neitiro ro iato urubia imese gimowauti-rido Pega sabowa ato. Pega sabowa ato kimowauti na-goroporeai taie imese giodori-marō Ataria sabowa to.

²⁶ Taie Ataria rido neitiro sawa pe to giora-rido imese gorowameai-rido, neitiro beda sabowa rido gitiodorai-marimo Entioko sabowa neito gorowameai-rido. Iesu edi patu urubia ro neitiro neio ro keba se ta-giedea-marimo Godi edi nirimagare maumo ro neito, nedi woko ro nou osioidiro ri. Ina nedi woko ro neitiro ro na-gosioidiro-rido nedi tau ro nato goporeai-rido.

²⁷ Taie neitiro ito na-gorowateai-rido Entioko sabowa to, Iesu patu urubia aise gidabuai-rido. Godi ro neitiro abato beda tanaro gisioidiro, ina ibose lu owera karo tato urubia kimibiria gabo Godi ro beda sosoro gimodobura, Entioko kimibiria urubia neitiro ro neito gimowauti-rido.

²⁸ Taie neitiro Entioko sabowa ato tuturu tau to iato aise imidirotiti-do borubi kowasoro

urubia mutu.

15

Iu oweru karo tato urubia Iesu kowasoro aboto gabo boido aidiro-die

¹ Arua urubia Iudia duriomoro rido giodori-ro Entioko sabowa to, neio ro Iu oweru karo tato urubia Iesu edi urubia ro na-gowasoro-rimo oweru ibo gimowauti-rimo, 'Nio ro modobo pua kimibiria kawakawa se kiworohuti, nio Godi ro ubauba aboudo nato iapopo-ri pua, womu tato nio dubu simara takamai kiwasio kiworiouti, Mose ro beda sosoro itamudiroiti.'

² Nedi oweru ro Pauro ra Banabasi ra ro na-girorowai-rido neitiro auna ubi tato goi-rido. Neitiro neio mutu auna ia oweru to gorowati-rimo. Iesu patu urubia ro oweru iato gisiodiro-rimo ibo, modobo ie Pauro ra Banabasi ra nimo ro Ierusarema sabowa to kimeiriai-ma arua kimibiria urubia mutu. Iesu kitiodorai urubia, Iesu urubia etio ro emeauri-dumo Ierusarema sabowa ato na-orowomidiro, neio mutu nedi oweru ro atu se mea mino to emotuputi rie.

³ Iesu patu urubia ro neio iato gimeiriai-rimo Ierusarema sabowa to, neio Ponika ra Samaria ra duriomoro teibo to aise godoro-rimo, sabowa iato na-giamo neio iato ta-garaperewado-rimo. Kimibiria urubia iato na-gorowomidiro erere sabowa ato Pauro ra Banabasi ra ro neio iato gimowauti-rido Iu oweru karo tato urubia beda sosoro gerewesegere-rimo morobise Godi aboto. Kimibiria urubia ro nedi oweru ro na-girowidiro-rimo, neio auna kamade ro giwati.

⁴ Pauro ra Banabasi ra edi urubia mutu gou-rido neio Ierusarema sabowa to na-gorowateai-rimo, Iesu kitiodorai urubia ro, Iesu urubia etio ro emeauri-dumo, Iesu urubia mutu nedi urubia sirio ro neio ro aise giramairiai-rimo. Neitiro ro neio iato gimowauti-rido ibo Godi ro beda tanaro gisioidiro neitiro Iu oweru karo tato urubia abato na-irohotiti-do.

⁵ Kaupoti arua Parasi urubia Iesu edi urubia ro na-gowasoro-rimo neio aise girerubua-rimo oweru mutu. Neio ro ibo, 'Iu oweru karo tato kimibiria urubia neio modobo pua kimibiria se kiworohuti. Neio modobo ie dubu simara takamai kiwasio kiworiouti, ibose Mose edi sabi sirio ro neio ro modobo ie aise kibodoro.'

Urubia Pita Ro gimowauti Iu oweru karo tato urubia sapuwo to

⁶ Iesu kitiodorai urubia, Iesu urubia kemeauri urubia mutu neio nakara se iato garadabuai-rimo nedi oweru ro emotuputi ri.

⁷ Neio tuturu tau to geremowagomea-rimo. Taie, Pita aise geribuwa, nou ro ibo, 'Naminiramio, nio umoro ta-goi-rimo mo Godi ro nio soirio maumo rido keba se nohodowa, Iu oweru karo tato urubia imowauti ri mea oweru Iesu sapuwo to. Neio ro nedi mea oweru ro ta-girorowai-rimo mo aboudo, neio iato aise gimibiria-rimo.

⁸ Imese urubia Godi ro kimaragoidiro timeaurititi-die, ina nedi kimowauti oweru ro etio ro gimibiria-rimo neio Godi ro aise gimaiddorai-ro. Godi ro Tarena Uriu keba se beda mino to gemeiriai-ro nimo aboto, nou ro

atu sosoro tanaro nou gosioidiro-ro neio aboto.
Nou ro idaibo mino to gowawea-ro ibo neio nou
ro ta-gimaidodorai-ro.

⁹ Godi ro kiauri maumo ato nedi urubia ro ata
kemeteruti tato ie neio nimo mutu atu sosoro ie.
Neio na-gimibiria-rimo Godi ro neio niro turi edi
tau ro nato mareamarea tato aise gimowai.

¹⁰ Ina noudo ie abora mabu boira Iu ower
karo tato urubia nio ro mibo na-imotomo-dumo?
Godi gabo nio ro a-owasiouti-dumo ra? Atu
sosoro mibo nimo nasa naminami nimo ia mutu
kiratidiro modobo ra?

¹¹ Kaupoti nimo Iu urubia kimibiria tiamo ibo,
Abera Naramu Iesu edi wisa tato nirimagare ro
nimo Godi ro neito se anamadi-iapopo-ri. Ina Iu
owera karo tato urubia neio ibose ie Abera
Naramu Iesu edi wisa tato nirimagare ro neito
amadi-iapopo-ri.'

*Urubia Iemisi ro gimowauti Iu ower karo tato
urubia sapuwo to*

¹² Pita ower karo na-goporeai taie Pauro ra
Banabasi ra aise giriribua-rido ower mutu.
Urubia sirio imese ower karo tato gorowomidiro
neitiro ower gare se gimedeas-marimo. Neitiro
ro urubia neito gimowauti-rido Godi ro beda
pupuwo korosa tanaro gisioidiro Iu ower karo
tato urubia ro iauri ri. Iedi pupuwo korosa
tanaro ro Godi pupuwo to neitiro ro durupi to
nou gisioidiro-rido.

¹³ Pauro ra Banabasi ra neitiro ower karo
na-goporeai-rido, taie iato Iemisi ro gotobowa
nou ro ibo, 'Naminiramio, ower mo aboto neito
dirowidiro-rimo!

¹⁴ Nimo Saimoni Pita ro beda owera to nimowapotai-die abora, io morobise ie nou keba tau e Godi ro idaibo sosoro nirimagare nou gowawea-die Iu owera karo tato urubia aboto. Neio aboudo nou ro amia urubia ta-gihodowa nou urubia to ararapoi ri.

¹⁵ Ina idaibo sosoro owera tiamo Godi ipusu owera urubia ro keba se nou gisioidiro-rimo.

¹⁶ *Abera Naramu ro ibo, Eputa dubu Deibidi sapuwo rido ama-otoi-ri nu idaibo anama-emabuti-ri. Nu moto ta-geresebuti, kaupoti saro gabo ato mo anamadi-orowameai-ri, nu moto mo ro mea se anama-emowotobowa-ri, ibose keresebea moro anama-emodomo-ri.*

¹⁷ *Ina noudo ie erere duriomoro urubia mo neio ro anamadimo-osora-ri. Neio mo ro keba se na-nirapoi, neio mo urubia ie. Abera Naramu ro nedi owera ro ibo garo-ro.*

¹⁸ *Nou ro nedi owera ro keba ia se gowapotai-ro.'*

¹⁹ Ina Iemisi ro owera ibo gemoguai, 'Ina noudo ie mo ibo nimaragoidiro Iu owera karo tato urubia na-erewesegere-dumo Godi aboto, modobo pua nimo ro neio mibo kimotomo.

²⁰ Modobo ie nimo ro neio peba titi se kimesioidiro, ibo modobo pua nedi tanaro peteibi ro neio ro nou kisioidiro-ibi. Orora aboto beda ohona kiedea ra neio ro modobo pua kiho. Mabu orora aboto ohona kiaremo ato iedi ohona ro ubauba neito aise kiwai ie. Upo tanaro neio ro kisioidiro modobo pua. Ibose dao karima mutu iho mamu, idaibo urubia ro hodo to na-iopiauti-dumo, karima keba se kosuputi modobo ie. Iu owera karo tato urubia Iesu

na-owasoro-dumo neio ro nedi sabi peteibi ro
Mose sabi maumo ato na-iamo-ibi neibi se
ba-mimaragoidiro-titi-bimo.

²¹ Mabu Mose edi sabi ro keba ia se
gatamuai-rimo sabowa gabogabo ato
na-itamudiro-titi-dumo. Ina abora komidiro saiki
gabogabo ato neio ro Iu urubia karadabu moto
ato neito aise imoputiti-dumo.'

Peba titi oweru Iu oweru karo tato urubia aboito

²² Iesu kitidorai urubia, Iesu urubia etio ro
emeauri-dumo, imese Iesu patu urubia, neio atu
se oweru na-geremowauti-rimo neio ro ibo,
'Modobo ie nimo aboudo arua urubia kimeiriai
Pauro ra Banabasi ra mutu ama-iodori-ri
Entioko sabowa to.'

Taie neio ro nato giaubai-marimo netewa
teibo dubu teibo Iudasi abera masiro Sabasi, ina
ata dubu Sairasi, neitiro mea dubu teibo ie
kimibiria naminiramio sosoro gabo ato.

²³ Neio ro peba titi aise gisoidiro-rimo neitiro
neio ro nou mutu gimeiriai-marimo Entioko
sabowa to.

Ina peba ato nedi oweru ro neio ro giamo.

'Nedi peba titi oweru ro Iesu kitidorai urubia,
Iesu urubia etio ro emeauri-dumo nedi peba ro
nimo aboudo ie. Nimo nio urubia ie. Nio
Entioko sabowa ato na-orowomidiro, Siria ra
Sirisia ra duriomoro teibo ato na-orowomidiro,
nio Iu oweru karo tato urubia Iesu etio ro
owasoro-dumo kamade oweru nemeiriai-dumo
nio aboto.

²⁴ Nimo ro oweru keba se ta-nirorowai-rimo
ibo, nimo aboudo arua urubia piro se ito
ta-gou-dumo ata kitamudiro mutu urubia neito
gitamudiro-dumo. Ina nio neio ro kamade tato

neito giwai-rimo. Kaupoti nedi urubia ro neio nimo ro itiodorai pua idaibo tanaro isioidiro ri.

²⁵ Nedi tau ro nato nimo kaupoti kimaragoidiro niwia-dumo arua urubia nio aboto imeiriai ri Pauro ra Banabasi ra mutu ou ri. Nedi dubu teibo ro nimo namutuna teibo ie,

²⁶ Abera Naramu Iesu Keriso edi sowake ro na-irohotiti-do, neitiro keremiro aise iatowotiti-do.

²⁷ Ina Iudasi ra Sairasi ra nou mabu ato nimeiriai-madumo Entioko sabowa to Pauro ra Banabasi ra mutu atu se ou ri. Neitiro simara durupi to amado-ou-ri nedi atu owera ro neitiro ro nou amado-orowauti-ri nio aboto.

²⁸ Tarena Urio nimo mutu atu se ibo nimaragoidiro-dumo nimo ro nio arua mibo ohu rido imotomo-ri pua.

²⁹ Modobo ie nio ro nedi sipu tato tanaro peteibi ro nou se kibodoro-ibi. Orora aboto beda ohona kiedea ra nio ro modobo pua kiho. Ibose dao karima mutu iho mamo, idaibo urubia ro hodo to na-iopiauti-dumo, karima keba se kosuputi modobo ie. Ina ata owera nou e, upo tanaro nio ro kisioidiro modobo pua. Nio ro nedi tanaro peteibi ro kisioidiro-ibi tato, nio mea se ama-irowomidiro-ri. Nimo aboudo owera nou se ie. Iawo.'

Kimibiria urubia ro peba titi owera mea se gimidai-rimo

³⁰ Iedi dubu peteibi ro Ierusarema sabowa na-gemeserai-birimo imese giodori-ibiro Entioko sabowa to. Taie Entioko sabowa ato Iesu patu urubia neibi ro atu moro to na-gidabuai-birimo

neibi ro nedi oweru ro iato aise gaiwai-birimo
neio aboto.

³¹ Nedi peba titi ro na-gimoputi-rimo, neio ro
kamade mutu gomidai-rimo, mabu nato mea
pupuwo kimowaititi oweru ro giamo.

³² Iudasi ra Sairasi ra neitiro ibose Godi ipusu
oweru dubu teibo ie, neitiro ro sirio oweru
kimibiria urubia neito gimowauti-rido neio
kimibiria pupuwo kimowaititi aboto.

³³⁻³⁴ Iudasi ra Sairasi ra egea mere se
ta-gomidiro-rido Entioko sabowa ato. Taie
neitiro kimibiria urubia ro ioudo mea miro
mutu aise gitiodorai-marimo, keba se edi urubia
ro gitiodorai-marimo neio aboto
gorowameai-rido.

³⁵ Isana Pauro ra Banabasi ra Entioko sabowa
ato na-gomidiro-rido amia kimibiria urubia
mutu, neio ro atu se urubia mea oweru
ta-imowautiti-mo, ibose neio ro oweru Abera
Naramu sapuwo to urubia neito
ta-itamudiro-titi-mo.

Pauro ra Banabasi ra a-gorohodowa-rido

³⁶ Pauro ra Banabasi ra arua saiki
ta-giporeai-rido Entioko sabowa ato komidiro.
Taie Pauro ro ibo Banabasi aboto, 'Neitiro keba
se beda sabowa to nirohotiti-do Abera Naramu
oweru na-nimowautiti-do, neito
anamado-orowameai-ri neio
anamadi-iraturio-ri. Kimibiria urubia iato
na-orowomidiro neio beda mino to hatu
orowomidiro.'

³⁷ Banabasi ubi a-gowamo neitiro ro Ioane
adabuai ri nu ata masiro Mareko neibi atu se ibo
oroho rie.

³⁸ Kaupoti Pauro ro inaina aise garowado, 'Marasio nou adabuai-ri pua! Neibi keba se atu se na-noroho-birimo, neitiro nou ro Pampiria duriomoro ato aise nibedidiro-marō.'

³⁹ Taie neitiro nedi dubu ro nou sapuwo to auna owera to gorowati-rido, ina nou mabu rido ie neitiro aise gorohodowa-rido. Banabasi ro Ioane ata masiro Mareko nou ro gadabuai, neitiro ibo giabu-rido Saiporasi ura to.

⁴⁰ Wisana Pauro ro Sairasi gadabuai. Taie Entioko sabowa kimibiria urubia atu moro to na-garadabuai-rimo, Pauro neio ro Abera Naramu wisa tato nirimagare ato gedea-rimo nou ro owarebai ri. Taie neitiro atu se imese gasiriai-rido

⁴¹ misinare aimara Siria ra Sirisia ra duriomoro teibo to, iato irohotiti-do. Pauro ro Iesu patu urubia iato na-gorowomidiro erere sabowa ato neio kimibiria pupuwo nou ro aise gimowaititi.

16

Timoti Pauro ra Sairasi ra ro gadabuai-rido

¹ Pauro Sairasi mutu Debe ra Risitira ra sabowa teibo to na-gou-rido, neitiro ro Iesu kowasoro dubu ata iato gowea-rido. Nu masiro Timoti, mamu Iu orobo ie ina edi orobo ro kimibiria orobo ie, kaupoti nu abera Iu dubu pua.

² Ina kimibiria urubia Risitira ra Ikoniam ra sabowa teibo ato na-gorowomidiro neio auna ubi ie Timoti aboto.

³ Pauro ubi ie Timoti kadabuai misinare aimara nou mutu koroho, kaupoti Iu urubia

sirio iato na-gorowomidiro neio umoro ie ibo nu abera Iu dubu pua, Giriki dubu e. Taie iato Timoti simara durupi takamai Pauro ro aise gowasiai iato guriai, Iu urubia ro nu kemaiddodoro aboto.

⁴ Ina nu Pauro ro aise gadabuai neibi sabowa gabogabo misinare aimara iato goroho-birimo. Ierusarema sabowa rido kitiodorai urubia ina Iesu urubia etio ro emeauri-dumo neio ro beda peba titi gimeiriai-rimo, nedi oweru ro urubia neibi ro neito gimowauti-birimo neio ro mea se kibodoro aboto.

⁵ Taie nedi oweru ro na-girorowidiro-rimo, Iesu urubia erere sabowa ato na-gorowomidiro neio kimibiria pupuwo neibi ro neito gimowaititi-birimo. Saiki gabogabo kimibiria urubia sirio aise oititi-mo.

Pauro Godi ro gowaboi Masedonia duriomoro to

⁶ Pauro edi urubia mutu na-goroho misinare aimara, Tarena Urui ubi tato goi neibi ro Eisia duriomoro ato kimowauti mea oweru Iesu sapuwo to. Ina nou rie neibi Piridia ra Gereisia ra duriomoro teibo neitiro turituri ato godoro-birimo, ina ioudo aise gimobodiai-bi Misia duriomoro to.

⁷ Neibi ioudo na-gou-birimo Misia duriomoro sobea korobai aupiaupi, neibi ubi ie Bitinia duriomoro to odorori. Kaupoti neibi ioudo Iesu edi Tarena Urui ro nou ro gitowerai-biro,

⁸ Misia duriomoro aise gorohodorai-birimo imese giodori-biro Torowasi sabowa to.

⁹ Taie iedi duwo ro nato Torowasi sabowa ato, Pauro ro hiwo to nato giauri Masedonia dubu nu a-gotoi. Nou ro Pauro hiwo to aise

gemagege-ro ibo, 'Oro Masedonia duriomoro to nimo iwarebai ri neito dabu-ro!'

¹⁰ Iedi hiwo ro nou saro gabo ato, neibi iato gabo niosora-birimo ito kiabu aboto. Neibi umoro ta-noi-birimo ibo Godi ubi ie neibi ito kiabu Masedonia duriomoro to neio imowauti ri mea oweru Iesu sapuwo to.

Ridia kimibiria orobo to na-gararapoi

¹¹ Neibi ro Torowasi sabowa na-nemeserai-birimo, imese niabu-birimo Masedonia duriomoro to sawa pe to. Iedi sawa pe ro ibose to gapere-ro, Samoteresi ura gare mata to gaudurai, imese gabu-ro womu tato ata kowaroho neibi nato norowateai-birimo Orio Sabowa to.

¹² Neibi Orio Sabowa rido sairo to nidiai-birimo Piripai sabowa to. Piripai sabowa ato Roma urubia iato wirowomidiro-titi. Nou ata auna sabowa ie Masedonia duriomoro ato, ina neibi iato ta-nomidiro-birimo arua saiki to.

¹³ Iu urubia komidiro saiki na-gorobai, kaupoti Iu karadabu moto iato otoi pua. Neibi ro kimaragoidiro to nowea-birimo ibo oromo bara mea karadabu moro ie, Iu urubia Godi aboto iato iraratorotiti-dumo, neibi iato imese nosuruo-birimo sabowa goro rido oromo bara to. Neibi ro iato arua mamio se niwia-birimo neio a-gorowomidiro, taie neibi neio aboto aise naradabuai-birimo, neibi ro neio oweru iato nimowauti-birimo.

¹⁴ Iedi mamio ro neio abato ata orobo iato ta-gomidiro, nu masiro Ridia, nu Taiatira sabowa rido gou-ro. Nu ata besinisi orobo ie, nou aboudo karimakarima sosoro obotama urubia ro auna mani to imadetiti-mo. Nu Iu

orobo pua, kaupoti Godi nou ro emowabutiti.
Pauro ro edi oweru garo nu kimaragoidiro Abera
Naramu ro aise gemodobura kimibiria aboto.

¹⁵ Ridia moto ato edi urubia ro
na-gorowomidiro, nu ia mutu obo to
kiwarumiauti na-goroporeai, neibi nou ro iato
nimagege-ibiro ou ri nou moto to. Nou ro ibo,
'Nibi ibo na-imaragoidiro-bimo mo morobise
kimibiria orobo ie, nibi mo moto ato aise
ba-domidiro-bimo!'

Taie neibi ioudo aise nou-birimo Ridia moto
to.

Pauro ra Sairasi ra dibura to giedea-marimo

¹⁶ Ata saiki neibi na-nou-birimo kararatoro
moro to, neibi iato ata wisa tato woko besere ro
niwia-ibi. Iedi besere ro nou abato ata sosoro
urio ro imidirotiti, urubia umoro tato tanaro
nou umoro koi ie, iedi urio ro nu nou ro
emasoutiti-ro. Nou ro auna mani iaurititi iedi
tanaro ro nou sapuwo to, ina iedi mani ro nou
eputa urubia ro imadetiti-mo.

¹⁷ Neibi na-nou-birimo Pauro mutu, saro rido
iedi besere ro nou ro aise nibodoro-ibiro. Nou ro
idaibo oweru giaiauti, 'Nedi dubu Peteibi ro
Auna ia Godi ohu ia ato na-imidirotiti-die neibi
nou sowake dubu Peteibi ie! Neibi ro nio
imowauti-bimo ibo nio Godi ro kiapopo gabo
boido aidiro-die!'

¹⁸ Sirio tau nedi besere ro idaibo tanaro nou
isioidirotiti, nu idaibo sosoro na-irowautititi,
Pauro nou ro masawe emowaitititi.

Pauro aise gerewesegerai iedi besere ro nou
aboto, nou ro ibo urio aboto, 'Iesu Keriso edi
pupuwo ro neito oro mo ro a-nemowapotai
ioudo dosuruwo-ro!'

Taie iedi besere ro urio ro aise gemeserai.

¹⁹⁻²⁰ Ina nu eputa urubia na-geremasibai-rimo ibo, ubauba urio ta-waraseperai iedi besere ro nou aboudo, neio mani kiauri gabo ibose to gararaseperai. Taie neio ro Pauro ra Sairasi ra aise girobai-marimo, imese gimudo-marimo koto kiauri dubu teibo aboto. Sabowa urubia beda moro ato iradabutiti-mo koto kiauri dubu teibo iato gomidiro-rido. Neio ro ibo, 'Nedi dubu teibo ro Iu dubu teibo ie. Urubia nedi sabowa ro nato neitiro ro igediouti-do!

²¹ Neitiro ro ata sosoro kitamudiro iworohuti-do, ina nimo Roma urubia modobo pua idaibo tanaro nou kibodoro!'

²² Taie koroho kawa urubia sirio na-garadabuti-rimo, iedi dubu teibo ro ubauba oweru to iato gimaro-marimo. Neitiro kiroidiro namabu Roma koto kiauri dubu teibo ro iato giwabuti-marido, ina neitiro oweru to Pauro ra Sairasi ra amia urubia ro ubauba mino to gonopu to iato giado-marimo,

²³ taie dibura to aise giedea-marimo. Neio ro ibo dibura kiauri dubu aboto, 'Nedi dubu teibo ro mea se ba-dimowotoi-ma!'

²⁴ Nedi dibura kiauri dubu ro nedi koko oweru ro na-girorowai, neitiro nou ro aise giwodoro-ma ibi gugu ia to. Nou ro neitiro sairo ota goro to iato gimowodouti-ma koko ia ti-gimowaititi-ma.

²⁵ Duwo turi korobai aupiaupi Pauro ra Sairasi ra Godi aboto gararatoro-rido, ibose Godi kemowabu ohare iato gemabodo-rido. Neitiro ro edi kemabodo ro na-gemabodo-rido borubi dibura urubia ro gare se gimedea-marimo.

²⁶ Neio auna ia sopu momuruwo ro gimabuwo-ro, iedi dibura moto gebari ro aise goromuruwouti. Dibura moto magere damo sirio imese aise gorodobuti-rimo. Ina dibura urubia aboudo anikapo nakara se aise geremapoduti-rimo.

²⁷ Taie dibura kiauri dubu norou aboudo na-geribidiro-ro, nu auna tere ro gorobai mabu magere nou ro kiaidiro se giwia. Nu ibo a-gimaragoidiro dibura urubia imese ta-wosuruwo-mo. Taie iato nu giri sipi rido se geremaubai, nu ubi ie nakara se ororopia ri.

²⁸ Kaupoti nu Pauro ro na-gowea-ro ioudo giaia-ro, 'Ei urubia dubu, idaibo tanaro osioidiro ate, oro nakara se ororopia ate! Nimo ata osuruwo pua neido, momuo se nato ti-norowomidiro.'

²⁹ Taie dibura kiauri dubu ro ata dubu aboto iato gutura pina owou ri. Nu auna ia tere ro gorobai, soro aise gorowamaro-rimo Pauro ra Sairasi ra aboto na-godoro neitiro sairo mabu ato egenabo gomi.

³⁰ Nou ro Pauro ra Sairasi ra ibi gugu rido aise giwosuruwo-marō. Taie nou ro ibo, 'Auna dubu teibo, mo ro beda tanaro anama-osioidiro-ri mo Godi ro ubauba aboudo kapopo aboto?'

³¹ Ina nu Pauro ra Sairasi ra ro ibo gemowameai-rido, 'Oro modobo ie Abera Naramu Iesu edi mea owera ro ba-dimibiria, ina oro, moto urubia mutu Godi ro nato amadi-iapopo-ri.'

³² Taie Pauro ra Sairasi ra ro neio Abera Naramu edi mea owera ro nato gimowauti-rido.

³³ Iedi atu tau ro nato dibura kiauri dubu ro neitiro iato girobai-marō ata moro ato ikoni kainakaina imowiouti-ma ri. Iato tuturu to eremasebidiro pua nu moto urubia mutu neio neitiro ro obo to aise giwarumiauti-rido.

³⁴ Obo to kiwarumiauti saro gabo ato, Pauro ra Sairasi ra dibura kiauri dubu ro aise giwou-ma nou simara moto to ohona iato gimesioidiro-ma. Nedi dibura kiauri dubu ro nu urubia mutu neio auna kamade ro giwati mabu neio Godi owerā ta-gimibiria-rimo.

³⁵ Ata kowaroho Roma gabamani dubu teibo ro pesomani dubu peteibi nato gimeiriai-birido dibura kiauri dubu aboto. Neibi ro ibo, 'Pauro ra Sairasi ra dibura rido ba-mosuruwo-rido!'

³⁶ Taie dibura kiauri dubu ro Pauro ibo gemowapotai, 'Roma gabamani dubu teibo ro owerā ibo emeiriai-dido nitiro osuruwo ri dibura rido. Nitiro mo ro abora neido a-nimeiriai-ma, mea muro to ba-dosuruwo-do.'

³⁷ Kaupoti Pauro ro ibo pesomani peteibi aboto, 'Nibi umoro ra neitiro Roma dubu teibo ie? Neitiro neio ro keba se koto aboto iwou-ma pua, urubia sirio sosoro gabo ato neio ro mabu tato moro ato niado-madumo, ina dibura to iato niedea-madumo. Neio ubi ra neitiro piro se imeiriai-mari? Etu ra aro! Koto kiauri dubu teibo neitiro ia ro se ba-mou-rido, neitiro iwosuruwo-ma ri dibura rido.'

³⁸ Pauro ro beda owerā garo pesomani dubu peteibi aboto, gabamani dubu teibo iato gimowapotai-mabirimo. Neitiro ro na-girorowai-rido ibo Pauro ra Sairasi ra Roma dubu teibo ie, koto kiauri dubu teibo auna tere ro girobai-ma.

³⁹ Taie neitiro nirimagare oweru mutu iato
gou-rido Pauro ra Sairasi ra aboto, neitiro
gabamani dubu teibo ro aise
giwosuruwo-marido dibura rido ina iato
gimagege-marido iedi sabowa ro emeserai ri.

⁴⁰ Neitiro ioudo na-gosuruwo-rido aise
gimobodiai-ma Ridia moto to. Kimibiria urubia
sirio ta-garadabuti-rimo nou moto ato, taie
neitiro ro neio kimibiria pupuwo iato
gimowai-rido. Taie neitiro ro Piripai sabowa
aise gemeserai-rido.

17

Pauro ro gimowauti Tesaronika sabowa urubia Iesu sapuwo to

¹ Pauro ra Sairasi ra Tesaronika sabowa to
na-gou-rido, ipi ato nedi sabowa teibo ro Ampi
Sabowa ra Aporonia ra neitiro ito godoro-rido.
Tesaronika sabowa ato Iu urubia karadabu
moto ta-gotoi,

² ina Pauro ito aise gou. Nu beda sosoro
irowatititi ata moro to kou ato, Iu urubia
karadabu moto to aise kou e. ³ woiki maumo ato
Iu urubia komidiro saiki ato, Pauro ro neio iato
imowautititi Tarena Buka ato oweru na-iamo

³ ibo Godi ro kohodowa dubu temeteme
ama-iwia-ri, ama-araburai-ri ina bobo rido
amadi-eribuwa-ri. Nou ro ibo, 'Nedi dubu ro
Iesu nou sapuwo to nio mo ro na-nimowauti, nu
Godi ro kohodowa dubu nou se ie.'

Nedi oweru ro neio neito gimowauti, ina nou
ro Iu urubia komidiro saiki peteibi ta-giporeai-bi
nedi oweru ro neio nouto kitomu.

⁴ Nedi owerá ro arua Iu urubia ro na-irowidirotiti-mo neio ubi aise oititi-mo, ibose Giriki urubia Godi etio ro emowabutiti-mo, awawo mamio mutu, Pauro ra Sairasi ra aboto aise iradabutiti-mo.

⁵ Kaupoti arua Iu urubia iato na-gorowomidiro neio masawe goi-rimo Pauro ra Sairasi ra aboto. Neio neido na-gohau-rimo maketo moro to koroho kawa urubia gabo ato na-irasaubutiti-dumo, neio ro kaupoti moro to na-gidabuti-rimo, neio ro ubauba tanaro nato gisioidiro-rimo. Neio ioudo na-gedei-rimo aise gimobodiai Ieisoni moto to, neio ubi ie Pauro ra Sairasi ra iado-ma ri.

⁶ Kaupoti neio ro iato egea se giosora-marimo, iwia-ma pua. Ina neio ro Ieisoni se gorobai-rimo arua kimibiria urubia mutu, ioudo aise gimudo-rimo, imese giwou-rimo koto kiauri urubia aboto. Urubia sirio ro auna owerá nato garo-rimo ibo, 'Iedi dubu teibo ro duriomoro gabogabo to na-irohotiti-do urubia neitiro ro auna se igediouti-do, ina abora nimo aboto neito gou-diodo.

⁷ Iedi dubu teibo ro Ieisoni ro giwodoro-ma, nou moto ato imidirotiti-do. Neitiro kimibiria borubi mutu edi tanaro ro na-isioidirotiti-dumo Sisa edi sabi ro nou isebo-dumo, mabu neio ro urubia ibo itamudiro-dumo, ata eputa dubu tomidiro nu masiro Iesu.'

⁸ Ina edi owerá ro koto kiauri urubia, sabowa ia urubia mutu neio ro na-girorowai-rimo neio auna ia kamade tato goi-rimo.

⁹ Taie koto kiauri urubia ro Ieisoni arua kimibiria urubia mutu ibo gimowapotai-rimo,

'Nio abora mani ba-didabuti-mo nimo
ba-dimia-rimo. Ido nedi ubauba tanaro ro nio ro
kisioidiro tato, nio mani nimo ro
anamadimi-imowameai-ri.'

Neio mani na-gidabuti-rimo koto kiauri
urubia aboto imese giaiwai-rimo, taie neio koto
kiauri urubia ro aise gitiodorai-rimo.

*Mea oweru Iesu sapuwo to Berea sabowa urubia
ro gimibiria-rimo*

¹⁰ Iedi atu duwo ro nato kimibiria urubia ro
Pauro ra Sairasi ra Tesaronika sabowa rido aise
gimeiriai-marimo Berea sabowa to. Neitiro
Berea sabowa to na-gorowateai-rido aise
gimobodiai-ma Iu urubia karadabu moto to.

¹¹ Taie neitiro edi oweru ro na-garo-rido, Iu
urubia Berea sabowa ato na-gorowomidiro auna
ia ubi ro giamo neitiro edi mea oweru ro nou
kirowidiro aboto. Kaupoti Iu urubia Tesaronika
sabowa ato na-gorowomidiro neitiro edi oweru
ro neio ro kebase ubi tato to ta-gapoi-rimo.
Berea urubia ro sirio saiki Tarena Buka oweru
mea ia se irimopotiti-mo, neio ro
a-wiosoratiti-mo ibo Pauro edi kimowauti oweru
ro morobise a-iamo ra Tarena Buka ato.

¹² Ina noudo ie Iu urubia sirio Berea sabowa
ato aise gimibiria-rimo, Giriki awawo mamio
iato na-gorowomidiro dubu mutu, neio atu se
aise gimibiria-rimo.

¹³ Ina Tesaronika sabowa ato, Iu urubia
umoro na-goi-rimo ibo, Pauro ro neio Godi
oweru timowauti Berea sabowa ato, iedi urubia
ro Tesaronika sabowa rido aise gou-rimo Berea
sabowa to. Neio ro Berea sabowa ato koroho
kawa urubia aise gilegediai-rimo, bagea oweru

iato gimowauti-rimo Pauro sapuwo to, idaibo Berea sabowa urubia kamade tato neito giwai-rimo.

¹⁴ Kaupoti kimibiria urubia ro na-girorowai-rimo ibo, nedi urubia ro idaibo tanaro nou isioidiro-dumo, neio ro Pauro aise gemeiriai-rimo Berea sabowa rido koriri sabowa to. Isana Sairasi ra Timoti ra nou ro Berea sabowa ato iato gimeserai-ma.

¹⁵ Ina Pauro edio urubia ro na-gowaboi-rimo, neio atu se nou mutu pe to gou-rimo dodo se giwaseidiro-rimo womu tato Atenisi sabowa ti-gorobai-rimo. Atenisi sabowa na-gorobai-rimo neio ro Pauro nani kemeserai ie iato, neio nakara se gorowameai-rimo Berea sabowa to. Pauro ro korowameai urubia aboto oweri se gemeiriai Sairasi ra Timoti ra aboto samo to ou ri nou aboto.

Pauro ro gemabuti Godi etu ra Atenisi urubia aboto

¹⁶ Pauro Atenisi sabowa ato na-gomidiro, Sairasi ra Timoti ra nou ro ioudo gimotoi-marō, nou nakara se masawe mutu irohotiti. Mabu nou ro nedi sabowa ro na-giauri, ota titi iato imese sirio ia se giamo.

¹⁷ Pauro nagi-odoro-ri Iu urubia karadabu moto to, Iu urubia, Giriki urubia neio mutu iremowautititi, nedi urubia ro Godi neio ro se emowabutiti-mo. Pauro ibose sirio saiki aise irohotiti maketo moro to, urubia sirio mutu iato iremowautititi.

¹⁸ Taie Ipukereini patu urubia Sitoiki patu urubia simara kitamudiro etio ro itamudiro-titi-dumo, ata tau Pauro neio mutu

gororobai owerá to. Neio ro ibo, 'Nedi dubu ro ararai ie, nou edi owerá to aro-die nimo aboudo irerisai-dumo.'

Arua ro ibo, 'Etu umoro ra orio orora teibo sapuwo to nimowauti-die.' Mabu Pauro ro neio Iesu sapuwo to gimowauti, ina ibose nou ro Kowameai sapuwo to gimowauti.

¹⁹ Taie Pauro neio ro aise gowaboi-rimo Arapagasi kanisere urubia aboto. Neio ro ibo, 'Pauro, modobo ra oro ro mea se kemabuti nedi orio kitamudiro ro oro ro na-gowou-die nimo aboto?

²⁰ Nedi orio owerá ro na-nimowauti-die orio kitamudiro ie, ina ibose nimo ubi ie umoro koi nedi kitamudiro ro maumo beda sosoro ra.'

²¹ (Atenisi urubia arua duriomoro urubia mutu etio ro irowomidiro titi iato, neio sirio tau aise iradabutiti-mo atu moro to. Orio owerá neio ro na-irorowai-dumo neio auna ubi ie keremowagomea nou sapuwo to, neio ibo irowatiti-dumo.)

²² Taie Pauro aise gotobowa Arapagasi kanisere urubia sosoro gabo ato, nou ro ibo, 'Atenisi urubia, mo umoro ie nio aboudo kemowaibiti tanaro auna se tiamotiti.

²³ Mabu nio sabowa mo ro na-nimowaseidiro namabu sirio ta-nimiauri nio ro edi na imowaibititi-dumo. Ina ata ipi ato nadi kitomuti mo ro ta-nowea, nedi kitomuti ro nato idaibo sosoro owerá nou ro iamo. *Urubia umoro tato orora nou sapuwo to ie.* Nedi orora ro nio ro umoro tato se emowaibititi-dumo. Ina nou e, nio umoro tato Godi abora nou sapuwo to nio mo ro anama-imowauti-ri.

²⁴ Nedi duriomoro gebari ro imese namabu sirio mutu nou ia ro gisioidiro. Goto, toboro imese nou do ie. Urubia dubu ro kididi moto nu nato imidirotiti pua.

²⁵ Nedi keremiro ro nimo ro na-niworohuti-dumo Godi ro nimiotiti-die, huhuame na-nimosubotiti-dumo, imese nakomu sirio nou aboudo ou-diomo. Nu urubia ro kowarebai modobo pua, imese nakomu nou do ie, nou abato tiamotiti.

²⁶ Duriomoro gabogabo ato erere urubia na-orowomidiro Godi ro keba se kaupoti dubu gosioidiro, urubia sirio nou aboudo gorobodorouti-rimo. Urubia beda tau ato ama-orowomidiro-ri, ina beda moro ato ama-irowomidiro-ri, Godi ro gabo keba se ta-gisioidiro.

²⁷ Nedi tanaro sirio ro Godi ro na-gisioidiro mabu nou ubi ie imese urubia sirio ro nu mea se kosora aboto, ina nu neio ro mea se umoro oi ri. Kaupoti nou musomuso pua nimo aboudo, nu aupise timidirotiti nimo mutu.

²⁸ Ata dubu ro keba se ta-gorowauti idaibo owera, “Nimo keremiro nou ro nimio-die, noudo ie nimo korowomidiro, ibose nou ri noroho-dumo.”

Nio simara urubia ro owera keba se ta-giatiti-rimo ibo, “Nimo nou ia sosoro to nisioidiro.”

²⁹ Ina noudo ie nio ibo imaragoidiro mamo Godi tu to kosoidiro nakomu sosoro ie, idaibo urubia dubu ro simara siware to gorodi rido kosoidiro ie, siriba rido kosoidiro ie, ibose nadi rido.

³⁰ Urubia keba ia tau ato Godi umoro tato na-irowomidirotiti, neio nou ro idomari to se ta-iaurititi-ro. Kaupoti abora Godi ro imese duriomoro urubia ibo imowauti-die, ubauba aboudo erewesegerai ri.

³¹ Mabua Godi ro ata saiki ta-gohodowa-ro nou ro imese duriomoro urubia sirio koto nato ama-iwai-ri, nu simara tuputupu mino to amadi-isioidiro-ri. Nimo koto edi dubu ro nama-iwai-ri imese urubia sirio sapuwo to nedi dubu ro nou ro keba ia se nimohodowa-ro. Godi ro pamo rido na-gowameai-ro nou ro neito gowapotai-ro ibo nimo koto kiwai dubu io nou se ie.'

³² Urubia ro na-girowidiro-rimo nedi owera ro Iesu pamo rido beda sosoro gowameai-ro, arua ro nu gaga gemororouti-rimo. Isana arua urubia ro ibo, 'Pauro, oro ina namadi-orowameai-ri, nimo oro ro arua owera nato anama-imowauti-ri nou sapuwo to.'

³³ Iedi urubia ro Pauro ro aise gimeserai nou imese gosuruo-ro.

³⁴ Kaupoti arua urubia Pauro ro kimowauti owera ta-gimibiria-rimo, taie neio nou aboto aise garadabuai-rimo. Nedi orio kimibiria urubia ro neio abato ta-gomidiro ata dubu masiro Daionasi nou Arapagasi kanisere dubu e, ibose ata orobo neio abato ta-gomidiro, masiro Damarisi, arua urubia mutu, neio aise garadabuai-rimo Pauro aboto.

18

Korini urubia Iesu sapuwo to Pauro ro imowautiti

¹ Pauro Atenisi sabowa na-gemeserai nou imese gou Korini sabowa to.

²⁻³ Taie Korini sabowa ato ata dubu nou ro iato gatowamo nou masiro Akuira. Nu Iu dubu e, mamu ro Ponitasi duriomoro ato goroto. Kaupoti Akuira nu orobo mutu Pirisira neitiro keba se Itari duriomoro ato imidirotiti-do, ina ioudo giabu-rido Korini sabowa to. Mabu Roma eputa dubu Karadiasi-Sisa ro sabi ibo gimedea Iu urubia modobo pua Roma sabowa ato korowomidiro, neio nou ro ioudo aise giwagare-ro. Taie Akuira tiro ro Itari duriomoro aise gemeserai-rido imese giabu-rido Korini sabowa to.

Neitiro parai kiwaruwouti woko isioidirotiti-do, ina Pauro ro nato giraturioma-ma. Neibi atu moro ato na-imidirotiti-bimo iedi woko ro neibi ro atu se isioidirotiti-bimo, mabu Pauro ia ibose nou parai kiwaruwoidiro woko dubu e.

⁴ Iu urubia komidiro saiki ato Pauro Iu urubia karadabu moto to aise irohotiti, Iu urubia Giriki urubia neio imowauti ri. Neio nou ro auna se imagegetiti mea owera Iesu sapuwo to imibiria ri.

⁵ Taie iato ata tau Sairasi ra Timoti ra neitiro Masedonia duriomoro na-gemeserai-rido imese gou-rido Korini sabowa to, Pauro neitiro ro iato gemadabuai-rido. Ina iedi tau ro nato Pauro ro parai kiwaruwoidiro woko aise gemeserai, nou ro auna tau omadetiti Iu urubia nou ro na-imowautiti ibo Iesu nu Godi ro kohodowa dubu nou se ie.

⁶ Kaupoti Pauro edi kitamuidiro ro neio ro aise gemadibiai-rimo, ubauba owera iato garo-rimo

nou aboto. Pauro iato poro panese se geremahudumai. Nou ro ibo, 'Ei! Nio ro womu tato womu tato keremiro kowea tato, mo mibo pua io! Nio simara mibo ie! Mo nio aboudo nama-osuruo-ri Iu owera karo tato urubia aboto nama-ou-ri, neio anama-imowautititi-ri.'

⁷ Taie Pauro Iu urubia karadabu moto na-gemeserai, imese gosuruo-ro Taitiasi-Iasiti moto to. Nedi dubu ro Iu dubu pua, kaupoti morobiſe Godi nou ro emowabutiti. Nou moto Iu urubia karadabu moto gomo ato itoititi.

⁸ Ata dubu masiro Kirisipasi nou Iu urubia karadabu moto eputa dubu e. Nu ia, moto urubia mutu, neio atu se ta-gimibiria-rimo Abera Naramu edi mea owera ro. Ina iedi sabowa gebari ro nato sirio urubia neio ibose to ta-gimibiria-rimo, iato neio arua kimibiria urubia ro obo to aise giwarumiauti-rimo.

⁹ Ata duwo ato Pauro hiwo sosoro na-gorobu, Abera Naramu nou aboto owera nato aise garo-ro. Nou ro ibo, 'Pauro, oro tere na ie, oro matagoro kimopai oroho ate. Urubia owera inaina ba-dimowautiti mo sapuwo to,

¹⁰ mabu mo sirio tau oro mutu ti-nimidirotiti. Oro ata ro ubauba owai-ri pua, mabu nedi sabowa ro nato mo ia urubia sirio ro orowomidiro.'

¹¹ Pauro iato kaupoti kisimisi ina 6 sogomi neito imidirotiti Korini sabowa ato, urubia Godi owera to iato itamudirotiti.

Pauro arua Iu urubia ro gowou-rimo koto aboto

¹² Iedi tau ro nato Akaia duriomoro ato gabamani to Gario ro gomidiro, urubia nou ro wiaurititi. Taie arua Iu urubia atu se ubi nato

goi-rimo Pauro neio ro koto owai ri, taie gabamani dubu aboto iato aise gowou-rimo.

¹³ Neio ro ibo garo-rimo koto abato, 'Nedi dubu ro Godi kemowabu tanaro ata sosoro iwapotaidiro. Idaibo kemowabu tanaro nimo abato owamo pua, sabi ie!'

¹⁴ Ina Pauro ubi ie owera utura ri, neio edi owera kio ro nou ro imowadamea rie, kaupoti nou owera Gario ro samo to gemowasiai-ro. Gario ro ibo, 'Nedi dubu ro nio ro neito na-owou-dioumo koto aboto, nou ro ata dubu ata a-gopia ra? Ata auna sabi ata a-gesebea ra? Idaibo tanaro ata nou ro kosioidiro rasiri ie, nio koto owera mo ro nato ba-nimewidiro!'

¹⁵ Kaupoti nedi mibo ro nio simara mibo ie, mabu nio simara owera mabu ato eremaro-dumo. Nedi mibo ro nakara se ba-doporeai-mo. Mo ubi tato ie nio koto owera kimerewidiro.'

¹⁶ Iedi Iu urubia sirio ro gabamani dubu ro koto aboudo aise gimabodorai-ro.

¹⁷ Neio ioudo na-gosuruwo-rimo, Iu urubia karadabu moto edi eputa dubu ro masiro Sositeni, gabamani dubu sosoro gabo ato neio ro aise gohiai-rimo nato gadomauti-rimo. Nedi tanaro ro na-gororosiodiro Gario ro imaragoidiro pua.

Pauro Ina gorowameai Entioko sabowa to

¹⁸ Pauro Korini sabowa ato tuturu tau to ta-gomidiro arua kimibiria urubia mutu. Ioudo nu Siria duriomoro to aise gasiriai-ro Pirisira ra Akuira ra mutu. Neibi ido giabu-birimo Siria duriomoro to, tauo keba se Pauro sobo se gowarure-birimo Kenkiria sabowa ato. Mabu nu

keba se Godi sosoro gabo ato keremowotouti
owera ta-garo, ina keremowotouti owera womu
to nato gereredeadea.

¹⁹ Taie neibi ioudo sawa pe se gorobai-birimo,
Epesei sabowa to imese giabu-birimo. Epesei
sabowa to na-gorowateai-birimo Pirisira ra
Akuira ra Pauro ro iato aise gimeserai-ma.

Pauro iato na-gomidiro nu aise gou Iu urubia
karadabu moto to, iato neio mutu owera imese
geremowauti.

²⁰ Neio ro nu iato gemodowa-rimo ibo,
'Modobo ra oro egea mere se komidiro nimo
abato?'

Nu ubi tato goi iato komidiro,

²¹ kaupoti nou ro ibo, 'Godi ubi beda sosoro
owamo mo nio aboto nato
anamadi-orowameai-ri.' Taie neio nou ro aise
gimeserai.

Pauro Epesei sabowa rido sawa pe se
gorobai-ro,

²² nu Siseria sabowa to na-gorowateai-ro,
ioudo gidiai-ro Ierusarema sabowa to, taie nou
ro kamade owera iato gaiwai Iesu patu urubia
aboto. Ina iedi tanaro ro na-goroporeai nou saro
gabo ato Pauro Ierusarema sabowa rido aise
godori-ro Entioko sabowa to.

Aporosi Epesei sabowa ato na-gomidiro

²³ Edi tau ro nato Pauro Entioko sabowa ato
egea mere se ta-gomidiro, nu ioudo
na-gasiriai-ro, imese gidiai Pisidia ra Gereisia ra
duriomoro teibo to. Pauro sabowa gabogabo
na-goroho, kimibiria urubia iato

na-gorowomidiro, neio kimibiria pupuwo nou ro aise gimowaititi.

²⁴ Ina ata Iu dubu masiro Aporosi nou Arekesanidara sabowa ato goroto mamu ro. Arekesanidara sabowa Isipi duriomoro ato owamotiti, nou ioudo gabu-ro Epesesi sabowa to. Nou ata mea owera kimowauti dubu e, ibose nou abato auna umoro ro owamotiti Tarena Buka sapuwo to.

²⁵ Aporosi urubia ro keba se ta-gatamudiro-rimo Abera Naramu kowasoro gabo sapuwo to. Nou owera na-iarotiti auna kamade pupuwo mutu iarotiti. Aporosi ro ibose urubia tuputupu se ta-itamudiro-titi Iesu sapuwo to. Kaupoti nou umoro mea se owamotiti pua obo to kiwarumiauti tanaro. Nou ro keba se owera ta-girorowai Ioane ro obo to beda sosoro iwarumiautiti, iedi umoro kainai ro nou abato nou ro owamotiti.

²⁶ Nou Epesesi sabowa to na-gorowateai, nou ro auna owera nato garo Iu urubia karadabu moto ato. Ina nou owera Pisisira ra Akuira ra ro na-gemewidiro-rido, nu neitiro ro aise gadabuai-rido imese gowou-rido neitiro moto to. Taie neitiro ro nu iato gowarebai-rido arua umoro owera to, ibo Godi edi gabo ro nou sapuwo to.

²⁷ Edi tau ro nato Aporosi ubi a-gowamo Akaia duriomoro to abu ri. Ibose nu kimibiria urubia ro pupuwo gowaititi-rimo iedi tanaro ro osioidiro ri, ina peba titi neio ro iato gemesioidiro-rimo, ibo nio kimibiria urubia iato na-orowomidiro, nio nimo ro

a-nimowapotai-dumo ibo, modobo ie nedi dubu ro nio ro kemaidodorai.

Akaia duriomoro ato kimibiria urubia na-gorowomidiro neio keba se ta-gimibiria-rimo mea oweru Iesu sapuwo to, mabu, Godi ro edi wisa tato nirimagare ro na-gaiwai-ro, neio abato ta-owamotiti. Ina nu ito na-gorowateai neio aboto, nou ro neio mea mino to iwarebidirotiti.

²⁸ Nou lu urubia mutu, paea se oweru to auna ia se wirimowotoititi. Nou ro Tarena Buka oweru maumo mea ia se imabutititi neio aboto ibo, Iesu nou se ie Godi ro kohodowa dubu.

19

Pauro Epesesi sabowa ato gomidiro

¹ Pauro sairo to aise gidiai-ro sabowa gabogabo goroho, ina ioudo godori-ro womu tato Epesesi sabowa to ti-gorowateai. Aporosi isana Korini sabowa ato gomidiro. Kowasoro urubia Epesesi sabowa ato Pauro ro nato giwia.

² Neio nou ro iato gimodowa, 'Nio na-gimibiria-rimo mea oweru, Tarena Urio nio aboto nato a-gateai ra?'

Neio ro ibo, 'Ee nimo ata umoro tato ie Tarena Urio, nou sapuwo to nimo ro oweru ata irorowai pua.'

³ Neio Pauro ro ina iato gimodowa, 'Nio obo to beda mabu ato giwarumiauti?'

Ina nu neio ro ibo gemowameai-rimo, 'Mabu nimo ro Ioane kitamudiro oweru nibodoro-dumo.'

⁴ Ina Pauro ro ibo, 'Urubia morobise to ubauba aboudo na-erewesegeretiti-mo Ioane ro neio obo to nou mabu ato iwarumiautiti. Ina

ibose Ioane ro ta-imowautiti morobise to imibiria ri, ata dubu sapuwo to etu ro amadi-ou-ri nou saro rido. Nedi dubu ro nou sapuwo to na-iarotiti Iesu nou se ie.'

⁵ Taie neio ro edi tau ato na-girorowai-rimo nedi oweru ro, Pauro bi ro neio obo to aise giwarumiauti-birimo, Abera Naramu Iesu nou urubia to orowomidiro rie.

⁶ Pauro tu neio eputa to na-gitomo Tarena Urui aise gateai-ro neio aboto, neio ro umoro tato oweru to neito aise garo-rimo, ibose Godi ipusu oweru to gimowauti-rimo.

⁷ Nedi soirio ro nato neio 12 urubia ie, iedi tanaro ro neio aboto gororosoidiro-rimo.

⁸ Pauro Iu urubia karadabu moto to na-irohotiti nou ro urubia tere tato itomutiti, netewa didi sogomi peteibi ta-giporeai-bi. Ibose nou Iu urubia mutu na-irimowotoititi neio nou ro omuomu se imagegetiti Godi edi kiwabo i tanaro ro nou sapuwo to.

⁹ Kaupoti arua Iu urubia koko ie, neio ubi tato ie kimibiria aboto. Urubia sosoro gabo ato neio ro ubauba oweru ta-garo-rimo Iesu kowasoro gabo sapuwo to. Ina Pauro ro neio nou ri gimeserai, kimibiria urubia se girobai-ro imese giwou ata dubu sikuru moto to, nou masiro Tairanasi. Pauro ro saiki gabogabo edi urubia ro nou ro ibo itamudiroititi,

¹⁰ womu tato netewa teibo kisimisi teibo ti-giporeai-ma. Ina noudo ie beda mutu Iu urubia ro gorowomidiro Eisia duriomoro ato, arua urubia mutu, Abera Naramu edi oweru ro neio ro aise girowidiro-rimo.

*Epesei sabowa ato Iesu masiro ohu ato
goworohuti-rimo*

¹¹ Awawo ia pupuwo korosa tanaro Godi ro Pauro aboto gaiiwai-ro isioidiro ri.

¹² Idaibo Pauro edi eputa sakake ro, ina nu edi ohu sedo ro, urubia ro temeteme urubia aboto iato giworoho-rimo. Neio ro edi tanaro ro na-gisioidiro-rimo temeteme neio aboudo aise goroporeawado-rimo, ibose ubauba urio edi urubia abato gorowomidiro neio aboudo aise garagarewado-rimo.

¹³ Kaupoti arua Iu urubia sabowa gabogabo na-irohotiti-mo neio ro ata sosoro tanaro nato gatamuai-rimo. Abera Naramu Iesu edi masiro ro nou asorotiti-mo ubauba urio urubia aboudo neito imabodoidiro ri. Neio ro ibo kutura ie, 'Oro beda ubauba urio ro omidiro iato, Pauro edi dubu owautititi Iesu, nou masiro nasoro-dumo oro ioudo dosuruwo-ro!'

¹⁴ Ina Sekeba 7 dubu mere iworohutititi, nu Godi ra urubia ra turituri auna dubu e, neio ro idaibo tanaro gisioidiro-rimo.

¹⁵ Kaupoti ata tau ato ubauba urio ro neibi aboto ibo gutura-ro, 'Mo umoro ie Iesu, mo umoro ie Pauro, ina nibi otu bi ra?'

¹⁶ Ubauba urio edi dubu abato na-gomidiro neibi aboto aise gererepeduai-ro. Nou auna ia pupuwo mutu e, neibi ro kemowameai modobo pua. Neibi moto goro rido perepere se gorowosuwoduti-birimo porose se karima patupatu gorowararioidiro-birimo.

¹⁷ Iu urubia, Iu owera karo tato urubia iato na-gorowomidiro Epesei sabowa ato, edi tanaro ro na-gororosioidiro nou sapuwo to

na-girorowai-rimo, neio auna tere ro girobai.
Ina Abera Naramu Iesu neio ro nou masiro ohu
ato goworohuti-rimo.

¹⁸ Ibose orio kimibiria urubia ro beda ubauba
tanaro isioidirotiti-mo, iato giwapotaidiro-rimo
urubia sosoro gabo ato.

¹⁹ Neio arua pakani urubia ie, arua giwari
urubia ie iato na-gorowomidiro. Neio pakani
giwari buka tako sirio iato giwosuwoduti-rimo,
urubia sosoro gabo ato era to aise
gimatowouti-rimo. Iedi buka tako sirio ro neio
wisa owamo ibo K250,000.

²⁰ Iedi pupuwo korosa tanaro sirio ro iato
gororosioidiro-rimo, ina noudo ie mea oweru
Abera Naramu sapuwo to iedi duriomoro ro
nato aise gorobodorouti, ina urubia sirio ro aise
gimibiria-rimo.

Pauro masawe Epesesi sabowa urubia ro gowea-rimo

²¹ Iedi tanaro ro kororosioidiro
na-gororoporeai-rimo Pauro kimaragoidiro nato
giwia Masedonia duriomoro to abu ri ina ioudo
apere rie Akaia duriomoro to, ina nato
orowameai rie Ierusarema sabowa to.

Ina nou ro ibo, 'Mo Ierusarema sabowa to
nama-ou-ri, mo ro modobo ie Roma sabowa
gebari ioudo karaturiomai.'

²² Nu edi dubu teibo mutu goroho Timoti ra
Erasita ra, neitiro nou ro keba moro to
gitiodorai-ma Masedonia duriomoro to. Kaupoti
nou ia Eisia duriomoro ato egea mere se iato
gomidiro.

²³ Iedi tau ro nato Iesu kowasoro gabo sapuwo to, ata auna ubauba tanaro iato gororosioi diro Epesesi sabowa ato.

²⁴ Ata dubu masiro Demetiri namabu nou ro siriba to isioi dirotiti urubia ro mani to imade ri. Nou ro siriba rido Atemasi tarena moto kainakaina nou isioi dirotiti. Urubia sirio ibo gimaragoi diro-rimo, Atemasi orobo orora ie, nou tarena moto gebari iato itoititi Epesesi sabowa ato. Demetiri edi urubia mutu isioi dirotiti atu sosoro woko, neio ro auna mani neito iaurititi-mo.

²⁵ Ata tau nedi dubu ro neio nou ro iato gidabu ai arua siware woko urubia mutu. Demetiri ro ibo neio aboto, 'Mo woko borubi, nio ro tiauri-dumo nimo ro edi besinisi ro na-nisioi diro-dumo auna mani ioudo nimadetiti-dumo.

²⁶ Kaupoti nedi dubu ro Pauro edi tanaro ro na-isioi diro, sirio urubia nou ro itowouti-die nou sapuwo to, nou owera irowidiro-dumo. Sirio urubia Epesesi sabowa ato na-orowomidi ro ibose Eisia duriomoro gebari ato na-orowomidi ro nou ro itowouti-die nimo edi orobo orora ro nou kemowai biti aboudo. Urubia nou ro ibo imowautiti "Urubia ro tu to edi asaso na-isioi dirotiti-dumo ina orora to na-iasorotiti-dumo io neio bagea orora ie."

²⁷ Nedi owera ro urubia nouto na-imowautiti auna ubauba nato towamo, nimo edi woko ro ubauba masiro ama-imidiai-ri. Atemasi orobo orora nou edi masiro ro auna ia ie, sirio urubia Eisia duriomoro ato na-orowomidi ro ina imese duriomoro gebari nou emowai bititi-dumo. Ina ibose Pauro owera ato ata ubauba towamo, urubia ro ibo amadimi-imaragoi diro-ri orobo

orora Atemasi nou pupuwo tato orora ie, edi tarena moto gebari ro saruto ama-oi-ri, nou edi auna masiro ro imese ama-aratowouti-ri.'

²⁸ Iedi woko urubia sirio ro Demetiri owera na-girowidiro-rimo neio serawo aise goi-rimo, neio ro iato kiaeauti gatamuai-rimo, 'Atemasi nimo orobo orora ie! Nu auna ia ie! Nu gebari pere ie!'

²⁹ Urubia sirio daradara goi-rimo, iato neio ro Gaiasi ra Arisitaka ra neitiro se girobai-marimo, neitiro Masedonia dubu teibo ie Pauro mutu wirotiti-do. Neitiro urubia edi karadabu moro ro neito hio to giwou-marimo.

³⁰ Pauro ubi a-gowamo edi karadabu moro ro neito ou ri, urubia owera iato imowauti rie. Kaupoti nou kimibiria urubia ro a-godiobuti-rimo, neio ubi tato ie nou ito kou.

³¹ Ibose nou arua namuturubi, neio awawo urubia ie nedi duriomoro ro nato, neio ro nou aboto owera se gemeiriai-rimo ibo, 'Pauro, oro ito ou ate!'

³² Nedi topira ro nou maumo ato arua urubia ro ata owera garo-rimo, ina arua ro ata sosoro owera garo-rimo. Iedi karadabuai ro nato urubia imese daradara ta-goi-rimo, urubia sirio mea se umoro oi pua etou mabu ato garadabuti-rimo ito.

³³ Iu urubia ro iato gohodowa-rimo ata dubu masiro Arekanida keba moro ato otoi ri, owera mea se imabuti ri. Ina nu arua urubia ro iato gemowauti-rimo karo owera. Arekanida ro urubia iato gimadohodai owera eremasiai ri. Nou ubi ie owera aro ri urubia aboto, mea se

owawea ri tanaro beda sosoro
ororosioihiro-dumo.

³⁴ Kaupoti neio ro na-gowea-rimo ibo
Arekasanida lu dubu e, nou Atemasi
emowaibititi pua, neio ro atu sosoro oweru
inaina aise giæauti-rimo tuturu tau to, 'Atemasi
nimo orobo orora ie! Nu auna ia ie! Nu gebari
pere ie!'

³⁵ Taie, iedi topira ro neido kanisere auna
woko dubu ro geribuwa oweru mutu, urubia
nou ro aise gimadohodai oweru eremasiai ri.
Nou ro ibo, 'Epesei urubia! Urubia sirio umoro
ie, orobo orora Atemasi nu edi tarena moto ro
nimo ro niauri-dumo. Ina ibose edi nadi ro nou
asaso ie Adiri sabowa rido na-geretei-ro, urubia
sirio umoro ie nu nimo ro niaurititi-dumo.

³⁶ Ata dubu ata ro modobo pua ibo karo nedi
oweru ro morobise pua, arasaubuti. Ina noudo
ie nio muro se ba-dorowomidiro. Tanaro
kisioidiro maumo ato keba se mea se
gi-imaragoidiro-ri, ido to gi-isioidiro-ri.

³⁷ Nedi dubu teibo ro nio ro karadabu moro to
na-iwou-madioumo, kaupoti neitiro ro ata
ubauba oweru ata aro pua nimo orora sapuwo
to. Neitiro ro ata namabu ata omidai pua piro
to, orobo orora edi tarena moto ro neido.

³⁸ Demetiri nou atu woko urubia mutu neio
abato ata mibo na-owamo arua urubia mutu,
modobo ie nedi urubia ro neio ro koto aboto se
kiwou. Ina neio koto ro simara se
ama-iworohuti-ri.

³⁹ Ata oweru ata na-owamo nio abato, modobo
ie nio ro morobise sabi maumo ato kisioidiro.

⁴⁰ Nio aboto mo ro nou mabu ato nutura,
abora nimo ubauba se na-naradabuai-dumo, etu

umoro ra nimo ro ubauba wisa
anamadimo-owea-ri gabamani aboudo. Mabu
nio ro ata mabu tato osioidiro-dumo nedi
ubauba karadabuai ro, owera mabu mea se
kemabuti modobo pua.'

⁴¹ Kanisere auna woko dubu owera karo
na-goporeai, urubia nou ro aise gimowapotai
simara moto to orowame ri.

20

Pauro ro duriomoro teibo ina giraturiomai-ma

¹ Iedi mibo tanaro ro na-gororsioidiro
karadabu moro ato na-goroporeai, taie Pauro ro
kimibiria urubia aise gidabuai-ro. Nou ro neio
owera iato gimowauti, kimibiria pupuwo
kimowaititi sapuwo to. Iedi tanaro ro nou ro
na-goporeai, nirimagare owera kutura, taie neio
nou ro aise gimeserai. Nu imese gabu
Masedonia duriomoro to,

² edi sabowa ro na-giamo iato nou ro kimibiria
urubia, sirio meamea owera gimowauti neio
pupuwo neito gimowaititi. Imese neito gou-ro
womu tato Akaia duriomoro to ti-gorowateai-ro,

³ nou iato 3 sogomi to imidirotiti.

Nu ta-geremododiai Siria duriomoro to ioudo
orowameai rie, kaupoti arua Iu urubia ro Pauro
sowake ta-gemedeia-rimo opia ri. Nou ro
na-girorowai nedi owera ro nou ro ibo, 'Mo
neido orowameai-ri pua Siria duriomoro to. Mo
keba se Masedonia duriomoro to anama-ou-ri,
ina ioudo anama-abu-ri Siria duriomoro to.'

⁴ Nu edi urubia mutu goroho nu neio masiro
ie, Sopate Pirasi mere ie nou Berea sabowa dubu

e. Arisitaka Sekundasi mutu neitiro Tesaronika sabowa dubu teibo ie. Gaiasi Debe sabowa dubu e, Timoti, ina Tikikasi Toropimasi mutu neitiro Eisia duriomoro dubu teibo ie.

⁵ Neio keba moro to gou-rimo, ina mo Pauro mutu Torowasi sabowa rido neio ro ioudo nimasebidiro-marimo.

⁶ Taie neitiro Piripai sabowa ato Patapata Beredi Kiaupai Tato nou soriomu na-gororoporeai, iato neitiro ioudo aise niabu-rido Torowasi sabowa to. Taie 5 saiki na-gororoporeai-rimo, neitiro ro neio Torowasi sabowa ato niatuamo-rido, iato nimo atu se 7 saiki to norowomidiro.

Pauro ro Etiko pamo rido gowoubua

⁷ Nimo Torowasi sabowa ato atu se naradabuai-rimo Sande saiki ato, Iesu nirimagare ohona ouho rie. Sirio oweru Pauro ro urubia neito gimowauti. Nou ubi a-gowamo ata kowaroho ato asiriai ri ata duriomoro to, ina nou ri gimowauti urubia sirio oweru. Nou ro oweru inaina aise gemoguwado, womu tato duwo turi ti-gorobai.

⁸⁻⁹ Nimo netewa didi ohu ra maumo ra moto ato nato naradabuai-rimo, erempa sirio ta-niwatuti-rimo ibose to giriware-rimo, ibi gugu korosa pina ro aise gowai-rimo. Taie ata orio dubu masiro Etiko aruo ato gomidiro. Pauro oweru aise garowado Etiko isana aruo ato norou ro ibo goduwuti, womu tato nu norou ro ti-gowagumaidiro, taie tuturu to owamo pua nou ohu ia rido aise geretei-ro goto to. Urubia ro nu pamo ia goumai-rimo.

¹⁰ Taie iato Pauro na-gosuruwo-ro kauhio to na-girimusubua, Etiko nou ro aise gohiaia. Nou ro ibo namuturubi aboto, 'Kimaragoidiro na ie, nu keremiro ie.'

¹¹ Taie Pauro aise gorowameai ohu ia moto to, Iesu nirimagare ohona atu se urubia mutu iato giho-rimo. Pauro ro ina edi owera ro aise goguai, tuturu tau to gorowauti womu tato saiki ro ti-giwaroho. Taie iedi kowaroho ro nu imese gasiriai ata duriomoro to,

¹² isana edi mere ro geretidiro aruo rido, namuturubi ro kamade mutu imese gowameai-rimo simara moto to.

Pauro Mireto sabowa to gou

¹³ Pauro nimo ro aise nemeserai-rimo Torowasi sabowa ato. Nou ro ibo, 'Mo sairo to anama-ou-ri Asosi sabowa to, ina nio aboto ioudo anama-orora-ri.'

Nimo Torowasi sabowa rido ioudo sawa pe se norobai-rimo, imese niapere-rimo Asosi sabowa to. Pauro isana ioudo sairo to ito gou.

¹⁴ Nimo ito na-norowateai-rimo nu nimo ro iato natuamo-rimo. Taie nu ioudo aise nowia-rimo imese niabu-rimo Mitirini sabowa to,

¹⁵ ina ata saiki Mitirini sabowa rido nasiriai-rimo imese nou-rimo Kiosi ura to. Ina ata saiki Kiosi ura na-norohodorai-rimo, imese niabu-rimo Samosi ura to. Ina iato ata saiki Samosi ura nimo ro na-nemeserai-rimo, Mireto sabowa to aise norowateai-rimo.

¹⁶ Pauro ro keba se kimaragoidiro to owera ta-gisioidiro ibo, nu ubi tato ie mediomedio koroho Epesesi sabowa nou ri gorohodorai,

mabu nou ubi tato ie iedi duriomoro ro nato tuturu tau to komidiro. Nou ri noroho-rimo sobosobo to, nou ubi ie samo to korowateai Ierusarema sabowa to, nou modobo ie Ohona Kiwoiriamuti Soriomu ro iato aise katuamo.

Pauro iana oweru ie Iesu urubia etio ro emeauri-dumo neio aboto

¹⁷ Mireto sabowa rido Pauro ro oweru ibo gemeiriai Epesesi sabowa to, Iesu urubia etio ro emeauri-dumo neio ohau ri nou aboto.

¹⁸ Neio nou aboto na-gorowateai-rimo, nou ro ibo, 'Mo keba se neito beda tau ato nou-ro Eisia duriomoro to, mo komidiro keremiro nio ro ta-nemasibai-rimo. Mo beda sosoro nimidirotiti nio mutu nio umoro ta-goi-rimo.

¹⁹ Mo Iu urubia ro sowake ta-nemaremotiti-mo ubauba owai ri, ina mo neio ro auna mibo nomiotiti-mo. Kaupoti nio umoro ie Abera Naramu woko na-nemesioidirotiti, keremowabu tato se nemesioidirotiti, ibose nio sapuwo to mo idobi sirio tau to ti-nirototiti.

²⁰ Mo ro nio aboudo ata kiwarebai oweru ata owopirowa pua, nio umoro ie mo ro imese momuo se noti nimowautiti nio kiwarebai sapuwo to. Nio umoro ie mo ro nio mea oweru paea se nimowautiti, ibose nio simara korowomidiro moto ato iato ta-nimowautiti.

²¹ Iu urubia, Iu oweru karo tato urubia, nio mo ro pupuwo oweru ta-nimiotiti atu se, ubauba aboudo erewesegerai ri Godi aboto, modobo ie kimibiria Abera Naramu Iesu sapuwo to.

²² Kaupoti nedi tau ro nato Tarena Uriu ubi ie mo Ierusarema sabowa to kou, mo ro modobo ie nou ubi tanaro aise kisioidiro. Mo ito

nama-orowateai-ri, mo umoro pua etou tanaro sirio ro amadimo-ororosiodiro-ri mo aboto.

²³ Mo umoro ie sirio sabowa to na-nirohotiti Tarena Urio ro mo ta-nemowapotaiddiro-ri ro ibo, mo Ierusarema sabowa ato ubauba anamadimo-owaititi-ri, ina dibura to anamadima-aremo-ri.

²⁴ Kaupoti mo simara keremiro eremaragoidiro-ri pua. Auna tanaro owamo ibo modobo ie misinare woko Abera Naramu Iesu edi woko ro na-gaiwai-ro mo aboto, mo ro mea se kemoporeai. Nedi woko ro ibo ie, mo ro mea oweri Godi edi wisa tato natonato ro nou sapuwo to urubia imowauti ri.

²⁵ Ina neito ma-dirowidiro-rimo, mo nio aboto ta-nirohotiti, Godi edi kiwabo tanaro ro, nio mo ro nou sapuwo to nitomutiti. Kaupoti mo umoro towamo mo nio buro ro ido owa-ri pua.

²⁶ Ina abora nio nou mabu ato a-nimowapotai, nio ata Godi aboudo imese nama-araraseperai-ri, nio ro mo aboto emowamedei ate!

²⁷ Mabu Godi edi ubi tanaro sirio ro mo ro nio aboto imese ta-niwautititi.

²⁸ Nou ro edi urubia ro na-giahodorai simara keremiro to, neio nio ro mea se ba-dimowotoi-mo, oro ia ibose nakara se mea se ba-deremowotoi. Nio idaibo sosoro ie sipisipi kimowotoi urubia ie, Tarena Urio ro nedi woko ro nou gaiwai-ro nio aboto, Godi edi urubia ro mea mino to emeauri ri.

²⁹ Mo umoro ie, mo neido nama-orowameai-ri, mo saro gabo ato arua urubia amadidimo-ou-ri, ina serawo soka ro sipisipi beda sosoro

iaipirio-dumo, neio ro Iesu patu urubia idaibo mino to amadimi-iwaititi-ri ubauba.

³⁰ Mo umoro ie nio mo ro namadi-imeserai-ri arua nio abato amadime-erereihuti-ri, morobise ower a neio ia ro amadimi-iwakopeamuti-ri, kimibiria urubia neio aboto iwasau do rie.

³¹ Ina noudo ie, ba-deremowotoi-mo! Sirio tau aise gi-imaragoidiro-ri, mo nio mutu 3 kisimisi to na-nimidirotiti, mo ro meamea ower a iwopirotiti pua, nio abato sirio tau duwo saiki idobi mutu mo ro nio erere se totomu to nirobidirotiti.

³² Nedi tau ro nato nio mo ro Godi tu to niedea. Nou edi wisa tato nirimagare ro modobo ie nio pupuwo nou ro kimowaititi, ina nou maumo ato anamadi-imeserai-ri. Ina nou ro meamea wisa ama-imio-ri. Iedi meamea wisa ro Godi abato na-iamo-die nio sapuwo to irobidiro-die, etio ra tarena urubia to na-wararasoro-dumo, io nio imese amadi-imio-ri.

³³ Mo nio mutu na-nimidirotiti, arua rubi mani, namabu mutu neio aboto imaragoidirotiti pua.

³⁴ Nio umoro ie mo ohona obotama mutu, ina mo edi urubia mutu na-nirohotiti neio ohona obotama mutu, mo ro woko nisioidirotiti, ina edi woko mani ro neio neito niwarebidirotiti.

³⁵ Mo ro sirio tanaro niwapotaidirotiti nio aboto, mo ro binio to nisioidirotiti mani woko, temeteme urubia nedi mani ro neito niwarebidirotiti, ina modobo ie nio ro idaibo tanaro kibodoro. Nio ibose ta-nitamudirotiti nio ro modobo ie kimaragoidiro Abera Naramu Iesu beda ower a garo “Kaiwai ato auna meana nato kowe a ie, komidai ato auna meana nato kowe a pua.” ’

³⁶ Pauro owerā karo na-goporeai, Iesu urubia etio ro emeauri-dumo neio atu se kauhio to aise girimusubua-rimo, Godi neio ro iato imese gararatoro-rimo.

³⁷⁻³⁸ Pauro neio ro idobi se gememai-rimo, mabu nou ro keba se ta-gutura ibo 'Mo nio buro ro ido owea-ri pua.' Nou neio ro aise gohiai-rimo atu se imese giodori pe mokuro to, sawa pe to orora ri.

21

Pauro Ierusarema sabowa to gou

¹ Nimo nirimagare owerā na-naro-rimo neio aboto, taie sawa pe to imese niora-rimo, ioudo imese niabu-rimo Kosi ura to. Ina ata saiki Kosi ura rido ioudo nasiriai-rimo a-nou-rimo womu tato Rodasi ura ti-norobai-rimo. Ina Rodasi ura rido nasiriai-rimo a-nou-rimo womu tato Patara sabowa to ti-norowateai-rimo.

² Taie Patara sabowa ato nimo iedi sawa pe to na-niabu-rimo iato aise nemeserai-rimo ina ata sawa pe to nirasaudai-rimo Ponika duriomoro to abu rie. Ina Patara rido imese na-niabu-rimo,

³ Saiporasi ura gare mata to naudurai-rimo womu tato Siria duriomoro ti-norobai-rimo. Taie ata sabowa Siria duriomoro ato na-owamo masiro Taia iato aise norodiobo-rimo, mabu arua namabu ta-giamo Taia sabowa sapuwo to iato gibeduti-rimo.

⁴ Taia sabowa ato kowasoro urubia arua iato ta-niwia-rimo, nimo neio mutu 7 saiki to norowomidiro. Neio Tarena Urio ro giwai umoro ibo Pauro aboto beda tanaro ro amadimo-ororosioiidiro-ri Ierusarema sabowa

ato, ina nu neio ro gemagege-rimo ibo, 'Oro ito ou ate!'

⁵ Nimo neio mutu komidiro arua saiki ta-niporeai-rimo, ina ioudo nasiriai-rimo. Edi kowasoro urubia ro na-gorowomidiro, upi, dubu, merebusere kainakaina, nimo neio ro atu se aise niwaboi-rimo pe mokuro to. Taie koriri ato kauhio to aise nirimusubua-rimo iato nararatoro-rimo,

⁶ nimo ido niora-rimo sawa pe to, tauo keba se nirimagare owera naro-rimo neio aboto. Kowasoro urubia aise gorowameai-rimo simara moto to, isana nimo sawa pe to niora-rimo,

⁷ taie Taia sabowa rido imese napere-rimo Toremaisi sabowa to, ina iato kaupoti saiki to norowomidiro nimo kamade owera iato naro-rimo kimibiria urubia aboto.

⁸ Taie Toremaisi sabowa rido na-nasiriai-rimo ata saiki imese nou-rimo womu tato Siseria sabowa korobai, taie ioudo aise nidiai-rimo Piripi moto to. Piripi Godi mea owera kimowauti dubu e. Keba se edi 7 urubia ro na-giaubai-rimo ohona kihoduti woko isioidiro ri, Piripi ata nou se ie.

⁹ Nu 4 irimo busere mutu e, neibi Godi ipusu owera kimowauti busere ie.

¹⁰ Ina nimo nou abato egea mere se na-norowomidiro, taie Godi ipusu owera dubu masiro Agabasi Iudia duriomoro rido nato godori-ro.

¹¹ Nou nimo aboto na-gorowateai-ro, Pauro edi bereito ro aise gomidai-ro, nou simara tu ra sairo ra neito aise geremotohiti. Taie nou ro ibo, 'Nedi dubu bereito to na-nerematahiti mo Tarena Urio ro ibo nemowapotai-die, "Nu Iu

urubia ro idaibo mino to amadimo-oworohuti-ri Ierusarema sabowa ato, iato nu neio ro Iu oweru karo tato urubia aboto aise amadima-aiwai-ri." ' '

¹² Taie nimo ro edi oweru ro na-nirorowai-rimo nou nimo ro binio to nemediai-rimo, ibo 'Oro aise ou ate Ierusarema sabowa to!'

¹³ Kaupoti Pauro ro ibo, 'Nio idobi etou mabu ato iroto-dumo, mo idaibo nio ro kamade tato nowai-dumo, mo arua urubia ro kemotohiti modobo ie, mo kopia aboto Abera Naramu Iesu sapuwo to, io ata ubauba tato ie.'

¹⁴ Nu Ierusarema sabowa to kou aboto nimo ro modobo pua kodiobuti, taie oweru aise neremasiai-rimo. Nimo ro ibo, 'Abera Naramu ubi ato tanaro aise ba-mororosioi-ro-mo.'

¹⁵ Taie ata saiki nimo imese nasiriai-rimo Ierusarema sabowa to idiai ri.

¹⁶ Ibose Siseria sabowa ato arua kowasoro urubia nimo aboto ta-garadabuai-rimo, atu se aise nidiai-rimo Ierusarema sabowa to, taie neio ro imese niwaboi-rimo Mesoni moto to. Mesoni Saiporasi ura dubu e, nou tagara kimibiria dubu e.

Pauro ro Iemisi garaturiimai

¹⁷ Nimo edi tau ato na-norowateai-rimo Ierusarema sabowa to kimibiria urubia iato na-gorowomidiro auna kamade goi-rimo, nimo neio ro na-niwia-rimo.

¹⁸ Taie ata saiki nimo atu se Pauro mutu imese nou-rimo Iemisi owea ri, Iesu urubia etio ro emeauri-dumo neio nimo ro iato aise niatuamo-rimo.

¹⁹ Neio Pauro ro kamade oweru na-gimia, taie neio nou ro nato gimowauti ibo nu na-irohotiti

Godi ro beda tanaro isioidiro-titi Iu owera karo tato urubia abato.

²⁰ Neio ro na-girowidiro-rimo nedi owera ro, Godi neio ro iato gemowabu-rimo. Taie neio ro ibo, 'Neama Pauro, oro umoro ie Iu urubia Iesu kowasoro urubia to na-gararapoi-rimo imese sirio ia ie, neio ro ibose Mose sabi patu auna se tirobidiro-dumo.

²¹ Kaupoti neio ro bagea owera irowidiro-titi-mo arua urubia aboudo ibo oro daimodaimo duriomoro ato na-irohotiti Iu urubia neito itamudiro-titi Mose sabi imesera ri. Neio ro ibose ta-irowidiro-titi-mo oro ro Iu urubia na-itamudiro-titi ibo modobo pua dubu simara takamai kiasio kiouriouti, ina nimo Iu urubia tanaro kibodoro modobo pua.

²² Mea gabo kowea aboto imese koko ia ie. Mabua neio umoro nato amadimo-oi-ri ibo oro neito ta-gou-die, ina neio serawo amadimo-oi-ri.

²³ Ina oro nimo ro nato anamadime-emowapotai-ri, beda tanaro ama-osioidiro-ri. 4 dubu peteibi tomidiro-diebirimo Godi aboto ta-garo-birimo keremowotouti owera,

²⁴ neibi keremowotouti tanaro aupise koroporeai, oro ro ba-dirobai-biro. Modobo ie oro ro ata tanaro kosioidiro neibi meana kiwai-bi sapuwo to. Neibi sapuwo to wisa oro ro ba-daiwai iato turituri urubia ro sobo amadimi-iwasioi-biri neibi keremowotouti tau koporeai aboto. Nedi tanaro ro oro ro nama-isioidiro-ri, Iu urubia umoro nato amadimo-oi-ri ibo iedi owera ro oro sapuwo to na-irowidiro-mo io bagea owera ie. Ina ibose Iu urubia umoro nato amadimo-oi-ri ibo Mose edi

sabi sirio ro oro ro mea se tibodoro oro komidiro keremiro maumo ato.

²⁵ Kaupoti Iu owera karo tato urubia etio ro gimibiria-rimo Iesu sapuwo to, neio aboto nimo ro ta-nimeiriai-rimo peba titi owera, ata orio owera ata adabuai-ri pua. Iedi peba titi ro nato a-giamo idaibo owera. Orora aboto beda ohona kiedea ra nio ro modobo pua kiho. Ibose dao karima mutu iho mamo, karima keba se kosuruwo modobo ie, idaibo urubia ro hodo to na-iopiauti-dumo. Ina ata owera nou e upo tanaro nio ro kisioidiro modobo pua.'

²⁶ Taie ata saiki edi 4 dubu peteibi ro Pauro ro na-girobai-biro, neibi atu se aise gimobodiai-bi Tarena Moto to. Neibi atu se Iu urubia edi tanaro ro aise gosioidiro-birimo meana kiwai-bi aboto. Taie Godi ra urubia ra turituri dubu Pauro ro nato gemowapotai ibo, '7 saiki ro nama-orobai-ri nedi na peteibi ro nato namadi-iwameai-biri. Kimatowo namabu neibi sapuwo to oro aboto nato anama-iaiwai-ri imamatowo-ibiri. Mabu Mose sabi ato ibo iamo idaibo tanaro aise kisioidiro modobo ie.'

Pauro Tarena Moto abato Iu urubia ro gado-rimo

²⁷ Iedi 7 saiki ro aupise ie kororoporeai arua Iu urubia keba se gou-rimo Eisia duriomoro rido Ierusarema sabowa to, Pauro neio ro Tarena Moto ato gowea-rimo. Nedi urubia ro arua Iu urubia iato na-goroho-rimo serawo koromea neio ro gimia-rimo, ina Pauro neio ro aise gohiai-rimo.

²⁸ Neio ro ibo, 'Isiraere urubia dou-rimo! Nimo diwarebai-rimo! Nedi dubu ro nio ro a-iauri-dumo ra? Nu duriomoro gabogabo

na-irohotiti nou ro imowautititi ibo Mose sabi ibodoro mamo. Iu urubia sapuwo to ubauba oweru nou ro ta-iarotiti, nou ro ibose Tarena Moto ubauba ta-owaititi. Abora nou ro arua Iu oweru karo tato urubia noti iwou-die Tarena Moto to, neio ro idaibo saruto owai-dumo.'

²⁹ Edi Iu urubia ro nou ri gutura-rimo mabu neio ro Toropimasi Pauro mutu dese to giwia-marimo Ierusarema sabowa ato, Toropimasi Iu dubu pua, nou Epesesi sabowa dubu e. Neio ibo gimaragoidiro-rimo Toropimasi Pauro ro ta-owodoro Tarena Moto kara goro to.

³⁰ Taie sirio urubia Ierusarema sabowa ato na-gorowomidiro, neio auna ia serawo goi-rimo, Pauro neio ro aise gorobai-rimo. Nu neio ro ioudo aise gomudo-rimo, ina Tarena Moto magere damo teibo iato giopai-marimo.

³¹ Neio ro Pauro opia ri gemiri-rimo womu tato Roma boso eputa dubu aboto oweru ti-girarebai ibo 'Auna karado tororosoidiro-die sabowa ato.'

³² Nu boso urubia aboto iato gutura, 'Mohau-mo ito!'

Taie neio neido na-gohau-rimo, isana Pauro Iu urubia ro a-gado-rimo. Iu urubia ioudo na-girarowea-rimo Roma boso eputa dubu a-gohau-ro simara boso urubia mutu, iato Pauro neio ro kado egenabo gemeserai-rimo,

³³ taie boso eputa dubu ro nou aise gorobai. Nou ro ibo boso urubia aboto, 'Nedi dubu ro anikapo to demotohiti-mo!'

Nou ro Iu urubia nato gimodowa, 'Nedi dubu ro beda dubu ra? Nou ro beda ubauba tanaro gisoidiro?'

³⁴ Nedi auna dubu ro neio ro nato gowakopeamuti-rimo, arua urubia ro ata owerato giaeauti-rimo, arua urubia ro ata owerato giaeauti-rimo. Iato nou kimaragoidiro modobo pua mea mino to kiwesegeruti aboto. Taie boso urubia nou ro nato gimowapotai ibo, 'Nedi dubu ro dowou-mo bariki to!'

³⁵ Taie totorowa aupiaupi na-gemowai-rimo nu ohu ato kemerebuti se gowou-rimo, mabu Iu urubia ioudo na-gou-rimo neio auna ia serawo ro giwati neio ubi ie nu opia ri.

³⁶ Neio ro neibi saro rido aise gibodoro-ibirimo, kai diamo mutu neio ro ibo, 'Nedi dubu ro aise mororopia!'

Pauro ro gimowauti Iu urubia sirio

³⁷ Boso urubia ro Pauro na-gowou-rimo bariki to, nou ro ibo boso eputa dubu aboto, 'Mo modobo ra owerakaro oro aboto?'

Taie boso eputa dubu ro ibo, 'Oro Giriki oweraumoro ra?'

³⁸ Mo ibo nimaragoidiro oro Isipi dubu e. Dutu ata 4,000 urubia oro ro gidabuti, boso gabamani aboto oro ubi ato nato gosioi-ro-rimo, ina nedi kororopiauti urubia ro oro ro neio goto se duriomoro to aise giwabo.

³⁹ Ina Pauro ibo, 'Ee, io mo pua io, mo Iu dubu e mamu ro Tasasi sabowa ato noroto. Tasasi sabowa Sirisia duriomoro ato na-owamo, nu dorogora sabowa pua mo ioudo nou-ro. Mo auna ubi ie urubia sirio owerakimowauti.'

⁴⁰ Taie nu boso eputa dubu ro gabo aise gemagerai oweraro ri. Nou bariki totorowa ato aise gotobowa nou ro urubia tu to aise

gimadohodai. Taie nou urubia ro
na-gowea-rimo, neio ower aise
geremasiai-rimo. Nou ower a na-gatamuai Iu
urubia simara ia ower a to gimowauti.

22

¹ Nou ro ibo, 'Mo borubi Iu urubia, nio arua
abeamio to na-niasoro, nio ower a neito
ma-dirowidiro-rimo, mo ro beda sosoro tanaro
nisioidirotiti nio mo ro nou anama-imowauti-ri.'

² Taie Pauro ower a na-gatamuai nou ro neio
simara Iu ower a to gimowauti, urubia sirio ro
na-gemororowai-rimo nou edi ower a to garo
neio ata ower a ata aro pua imese gasio se
gemowadau.

Nou ro ibo,

³ 'Mo Iu dubu e, mo mamu ro Tasasi sabowa
ato noroto, Tasasi sabowa Sirisia duriomoro ato
owamo. Kaupoti Ierusarema mo kororomai
sabowa ie, sikuru ato nato nirohotiti, mo
Gamariere ro mea mino to natamudirotiti nimo
nasa naminami sabi patu beda sosoro iamo. Nio
pupuwo beda sosoro iasibowado-dumo Godi edi
ubi tanaro nou kisioidiro aboto, ina mo ibose
pupuwo ta-nasibawadotiti.

⁴ Etio ro obodorotiti-mo Iesu edi gabo ro, neio
arua mo ro ubauba mino to ta-niadotiti. Arua
urubia mo ro ta-niopiautiti, ibose upi dubu
ta-nirobotiti-ro, mo ro neio dibura to aise
niaremotiti.

⁵ Io morobise ie nio na-orowomidiro nato Godi
ra urubia ra turituri eputa dubu, Iu koto kiauri
urubia mutu, neio ro korowauti modobo ie ibo
mo ro edi ower a ro naro-die io morobise ower a
ie. Nedi urubia ro neio ro mo aboto peba titi

owera ta-giaiwai-rimo, iato mo neido aise nasiriai Damasikasi sabowa to, Iesu kowasoro urubia iato na-gorowomidiro neio irobo rie, ina Ierusarema sabowa ato dibura to nato iaremo rie.

⁶ Mo Damasikasi sabowa aupiaupi na-nemowaititi, saiki turi ato gotoi. Tuturu to pua auna ia pina benenio mutu toboro rido nato gerememiai-ro.

⁷ Mo iato aise neretei, sapuwo pamo imese norobu. Ina mo ro owera kodu se nirorowai toboro rido na-gutura-ro “Sauro! Sauro! Mo oro ro temeteme etou mabu ato nomiotiti?”

⁸ Taie mo ro nu ibo nemowameai “Auna dubu, oro etu ra?”

Ina ata owera kodu iato nirorowai “Mo Iesu e, mo Nasareta sabowa dubu e, mo oro ro nomiotiti temeteme.”

⁹ Edi urubia ro gou-rimo mo mutu neio ro owera mea se irorowai pua toboro rido na-garo-ro, kaupoti neio ro pina se gowea-rimo.

¹⁰ Taie mo ro ibo, “Abera Naramu, ina mo beda sosoro nama-orowati-ri?”

Ina Abera Naramu ro mo owera ibo nemowameai-ro, “Oro deribua! Ito ba-dou Damasikasi sabowa to oro iato urubia ro amadime-emowauti-ri mo ubi tanaro kisioidiro aboto. Keba se oro sapuwo to mo ro gabo ta-nisioidiro.”

¹¹ Mo modobo pua kirarowea aboto, mabu mo idomari teibo pogo auna ia pina ro nemowai. Mo edi urubia mutu na-nou, mo neio ro norobai-rimo nato nowaguo-rimo Damasikasi sabowa to.

¹² Taie Damasikasi sabowa ato, ata dubu masiro Ananaiasi nou ro gou-ro mo aboto. Nedi dubu ro Godi nou ro emaragoidirotiti ibose Mose sabi nou ro mea mino to ibodorotiti. Imese lu urubia Damasikasi sabowa ato na-irowomidirotiti, nou sapuwo to mea ower aiarotiti-mo.

¹³ Taie Ananaiasi ioudo na-gou-ro mo gomo ato aise gotobowa. Nou ro ibo, "Neama Pauro, oro idomari dirarowea!"

Taie mo idomari teibo na-nirarowea nu mo ro mea se nato nowea.

¹⁴ Ananaiasi ro ibo, "Nimo abeamio nasaio ro edi na emowabutiti-mo, oro nou ro keba se ta-garapoi-ro nu edi ubi ro oro ro umoro oi ri. Ibose oro nou ro ta-garapoi-ro Godi edi Tuputupu Dubu ro oro ro owea ri, ina nou ower a irowai ri.

¹⁵ Oro ro nou sapuwo to imese urubia sirio ama-imowautiti-ri Abera Naramu oro ro beda sosoro gowea ina nu ower a kodu beda sosoro gemororowai.

¹⁶ Abora oro mo ro a-nemowapotai, mabu boira oro tuturu tau to na-eremasebidiro? Deribua, obo to ba-mowarumia-mo oro Godi ro ubauba nato ama-ematopeamuti-ri. Oro kararatoro ower a nama-aro-ri nou aboto, oro nou ro meansa nato ama-owai-ri."

¹⁷ Ata tau mo Ierusarema sabowa to neito na-norowameai-ro, mo Tarena Moto ato Godi iato nararatoro. Iedi kararatoro maumo ro nato mo ro hiwo sosoro to nato niauri,

¹⁸ Abera Naramu mo aboto ower a na-garo-ro. Nou ro ibo, "Deribua! Ierusarema sabowa demeserai-ro! Nato mo sapuwo to oro edi

kimowauti oweru ro urubia ro
amadimi-ibeiyoti-ri."

¹⁹ Kaupoti Abera Naramu mo ro ibo
nemowameai, "Nedi urubia ro neio umoro tiamo
ibo, Iu urubia edi karadabu moto sirio ro
na-orowotoi, oro edi kimibiria urubia ro mo ro
ubauba mino to ta-niadotiti, taie aise niaremotiti
dibura to. Mo ro idaibo tanaro nou nisioidirotiti.

²⁰ Neio ibose umoro ie oro sapuwo to oweru
edi dubu ro irowautiti Sitibini, edi tau ato
na-gopia-rimo mo ro ubi to nomidai. Nou edi
moro ato na-gopia-rimo neio mo ro nimotoi
obotama mo ro nimiauri."

²¹ Kaupoti Abera Naramu ro ibo, "Dou! Oro
mo ro anama-otiodorai-ri muso duriomoro to, Iu
oweru karo tato urubia imowauti ri." '

Boso eputa dubu ubi ie Pauro epesuti ri

²² Ina iedi urubia sirio ro na-gorowomidiro
neio ro Pauro oweru gare se gemedea-rimo,
womu tato neio ro na-girorowai-rimo nou iana
oweru, neio nedi oweru ro nou ro gimowai
serawo. Neio oweru mutu aise giriribua-rimo
nou aboto. 'Nedi dubu ro kopia modobo ie,
sogosogo se omidiro nato, etou ememidiro, opia
rie!'

²³ Neio iato ohu obotama aise
giwagarewado-rimo iato giaeauti-rimo mabu
neio auna ia serawo ro giwati, ibose arua urubia
goto panese na-giwoiriamuti-rimo ohu to iato
gihere-rimo.

²⁴ Roma boso eputa dubu ro boso urubia iato
gimowapotai Pauro ina orobai ri bariki to owou
ri, iato kerei to epesuti rie, womu tato Pauro ro
beda ubauba tanaro gisioidiro nou ro kiwapotai.

Boso eputa dubu ubi ie umoro koi mabu boira Iu urubia serawo Pauro aboto na-goi-rimo.

²⁵ Nu boso urubia ro na-gemotohiti-rimo epesuti ri, edi boso dubu ro nou aboto na-gotoi Pauro ro ibo nou aboto, 'Nio ro modobo ra Roma dubu kado? Sabi ra Roma dubu keba se kerei to kepesuti, ina saro to koto aboto iato kowou? Io, sabi ie!'

²⁶ Taie edi boso dubu ro na-gotoi Pauro gomo ato, nou ro edi owera ro na-girorowai nou aise gou boso eputa dubu iato gemowapotai, 'Oro ro etou tanaro ama-osioidi-ro-ri? Iedi dubu ro ibo aro-die nou Roma dubu e.'

²⁷ Taie boso eputa dubu ro na-girorowai nou imese gou-ro Pauro aboto. Nou ro ibo, 'Oro Roma dubu ra?'

Pauro ro ibo, 'Io mo Roma dubu e.'

²⁸ Boso eputa dubu ro ibo, 'Mo ro gabamani aboto auna mani ta-niaiwai Roma dubu to kararapoi aboto.'

Kaupoti nu Pauro ro ibo gemowameai, 'Mo ro mani iaiwai pua, mo edi tau ato noroto mo Roma dubu to nararapoi.'

²⁹ Iedi boso urubia ro iato na-gorowotoi neio tere ri Pauro aise gemeserai-rimo, huru to imese goriodoi-rimo ibose boso eputa dubu tere ta-goi, mabu Pauro nou Roma dubu e, ina Pauro nou ro tau se ta-gemotohiti anikapo to.

Pauro ro gimowauti Iu koto kiauri urubia

³⁰ Ata saiki Roma boso eputa dubu auna ubi ro gowamo umoro koi aboto Iu urubia etou na mabu ato oititi-mo serawo Pauro aboto. Taie nou ro owera iato gemeiriai Godi ra urubia ra turituri awawo urubia aboto, ibose Iu koto

kiauri urubia aboto atu se aradabuti ri. Neio na-gou-rimo, Pauro nou ro aise gowosuruwo-ro, taie neio sosoro gabo ato iato gowotobowa ower a ro ri.

23

¹ Pauro ro iedi urubia ro na-giwia, nu idomari teibo imese neio ato se giwotobowa. Nou ro ibo, 'Mo borubi Iu urubia, mo Godi sosoro gabo ato mo ro ubauba tanaro isioidirotiti pua, womu tato abora noti notoi.'

² Ina Ananaiasi nou Godi ra urubia ra turituri eputa dubu e. Nou ro edio ower a ro na-girorowai Pauro aboudo, edi dubu teibo ro na-gotoi-rido nou gomo ato, nou ro aise gimowapotai-ma neitiro ata ro Pauro giposo mabu ato iatoia ri.

³ Taie Pauro ro ibo Ananaiasi aboto, 'Mo idaibo na-niatoia giposo mabu ato oro Godi ro ibose to ama-iatoia-ri! Oro ohu meana ie, maumo ubauba ia ie! Oro beda koto kiauri dubu ra? Oro nakara se sabi ta-wesebea! Mabu mo oro ower a to didi poro to niatoia-die edi dubu ro nou ro.'

⁴ Iedi dubu teibo ro Pauro gomo ato na-gotoi-rido neitiro ro ibo, 'Ei, ubauba ower a ro mamo turituri auna dubu aboto!'

⁵ Ina Pauro ro ibo, 'Nirimagare mo borubi Iu urubia, mo ro mea se eibimai pua ibo nou Godi ra urubia ra turituri eputa dubu e. Mo umoro ie ibo Tarena Buka ato ower a tiamo "Ower a to eputa urubia ubauba iwaititi mamo." '

⁶ Taie nou ro nato giwia Parasi urubia, Sadusi urubia soirio teibo na-gorowomidiro koto kiauri urubia karadabu maumo ato. Nou ro auna ia se nato gutura, 'Mo borubi Iu urubia, mo Parasi

dubu e, ibose mo abera aramio nogenoge mutu neio Parasi urubia ie. Mo kimibiria tiamo ibo, urubia na-orowaburo-dumo, neio pamo rido amadimi-iririburio-ri. Mo koto nou ri nowai-dumo.'

⁷ Pauro ro edi owera to gimowauti Parasi urubia, Sadusi urubia, neio ro na-girorowai-rimo, neio auna keremaro nato gatamuai-rimo. Iato neio aise gorohodowa-rimo Parasi urubia ata sapuwo rido Sadusi urubia ata sapuwo rido.

⁸ (Mabu Sadusi urubia neio kimibiria ibo ie, Godi sowake urio tato ie, erere urio tato ie, urubia na-orowaburo-dumo neio pamo rido iririburio-ri pua. Kaupoti nedi tanaro peteibi ro nato Parasi urubia timibiria-dumo.)

⁹ Nedi topira teibo ro auna serawo owera nato garo-rimo. Ina iato ta-gorowomidiro Parasi topira maumo ato arua Mose sabi kitamudiro urubia, neio owera mutu nato gotobowa-rimo. Neio ro ibo, 'Nimo ro na-niauri-dumo, nedi dubu ro nou ro ata ubauba tanaro ata osioidiro pua. Etu umoro ra nu Godi sowake urio ro emowapotaiddiro-die owera o idaibo ata urio ro.'

¹⁰ Ina iedi urubia ro auna ia auna ia keremaro nou gosioidiro-rimo. Modobo pua neio aupise gowamo karado, ina boso eputa dubu ro na-girorowai owera togo, nou ubauba kimaragoidiro ta-giwia ibo etu umoro ra Pauro neio ro amadime-ekekeouti-ri. Taie nou ro boso urubia se gimeiriai Pauro ina orobai ri, nu imese gowou-rimo bariki to.

¹¹ Ina iato ata duwo Abera Naramu ioudo na-godoro-ro Pauro abato aise gotobowa, nou ro

ibo, 'Oro koko se ba-dirimusubuwa! Oro nato Ierusarema sabowa ato mo sapuwo to owera to beda sosoro to irimowotoititi, io idaibo sosoro ba-dirimowotoititi Roma sabowa ato.'

Pauro Iu urubia ro opia ri gemediai-rimo

¹² Ata kowaroho amia Iu urubia nato garadabuai-rimo, neio ubi ie Pauro opia ri. Ina neio idaibo sosoro koko owera nou garo-rimo, ibo 'Nimo ro ohona iho-ri pua, obo idio-ri pua, womu tato Pauro nimo ro tinamadimo-opia-ri.'

¹³ Nedi urubia ro neio atu se kidabuai ato, 40 dubu ta-gorohodorai-ro idaibo urubia ie neio ro gosioidiro-rimo nedi owera ro.

¹⁴ Taie neio imese gidiai-rimo Godi ra urubia ra turituri eputa urubia aboto, ibose Iu eputa urubia aboto. Neio ro ibo 'Nimo ro koko owera ta-naro-dumo ibo "Nimo ohona iho-ri pua, obo idio-ri pua, womu tato Pauro nimo ro tinamadimo-opia-ri."

¹⁵ Nio ro koto kiauri urubia mutu modobo ie owera kemeiriai boso eputa dubu aboto, ibo "Pauro ba-dotiodorai-ro nimo aboto, ina nimo ro nato anamadime-emodoruti-ri." Boso eputa dubu ro namadi-emeiriai-ri nu ibo ama-imaragoidiro-ri Pauro ina mea se emodoruti ri owou-dumo koto kiauri urubia ro. Ina nimo ipi gabo ato anamadima-aratimuti-ri, nu namadi-ou-ri edi tau ro nato aise anamadimo-opia-ri.'

Neio ro edi owera ro nou gisioidiro-rimo Iu eputa urubia mutu.

¹⁶ Kaupoti Pauro edi mabira mere ro nedi owera ro nou ro na-girorowai, nou ioudo aise

gou-ro bariki to Pauro emowapotai ri. Taie Pauro nou ro iato gemowauti edi oweru ro.

¹⁷ Pauro ro ata bosu dubu aise garamairiai-ro nou aboto ou ri. Nou ro ibo, 'Nedi orio mere ro ba-dowou bosu eputa dubu aboto, nou aboto ata oweru towamo, nou ro nou ama-emowapotai-ri.'

¹⁸ Taie edi orio mere ro bosu dubu ro aise gorobai neitiro atu se imese gou-rido bosu eputa dubu aboto. Bosu dubu ro ibo 'Iedi dibura dubu ro Pauro mo nou ro nemodowa-die ibo Modobo ra nedi mere ro oro aboto kowou? Nou aboto ata auna oweru towamo oro nou ro ama-emowauti-ri.'

¹⁹ Taie iedi orio mere ro nou ro tu rido aise gorobai, neitiro imese gou-rido nakara moro to. Bosu eputa dubu ro ibo, 'Oro etona oweru owou-die, obiri idaibo tau ato ma-demowauti-ro.'

²⁰ Pauro mabira mere ro ibo, 'Iu koto kiauri urubia ro peba titi oweru amadidime-emeiriai-ri oro aboto. Peba titi oweru ibo ama-iamo-ri Pauro oro ro owosuruo ri neio karadabu soirio to kowaroho. Ina neio ubi ie oro ibo imaragoidiro ri iedi koto kiauri urubia ro neio ro Pauro koto aboto mea se emodoruti rie.

²¹ Kaupoti neio oweru oro ro aise imibiria ate! Mabu Iu urubia ta-gorohodowa-dumo, 40 ta-gorohodorai, nedi urubia ro neio ipi gabo ato amadima-arahiditi-ri nu kopia aboto amadime-emotoi-ri. Neio ro idaibo sosoro koko oweru nou garo-dumo ibo, "Nimo ro ohona iho-ri pua obo idio-ri pua womu tato Pauro nimo ro tinamadimo-opia-ri." Neio oro emasebidiro-dioumo nou emeiriai ri.'

²² Iedi orio mere ro boso eputa dubu ro ibo gemowameai, 'Ata dubu ata aboto owera eherai ate ibo mo oro ro nemowauti nedi owera ro!'

Taie, iedi mere ro nou ro aise gotiodorai.

Pauro Siseria sabowa to gowahau-rimo

²³ Boso eputa dubu ro netewa teibo boso urubia kiauri dubu teibo na-girumai-ma nou ro ibo, 'Mo ro arua urubia Siseria sabowa to anama-imeiriai-ri. Nedi duwo ro nato nitiro ro ba-dimododiai-do 200 boso urubia, 70 hosi boso urubia daro 200 girikibi mutu boso urubia. Nedi duwo ro nato 9 koroko ato ba-dasiriai-mo Siseria sabowa to.

²⁴ Ibose Pauro sapuwo to hosi teibo ba-dihodowa-mado, nu edi hosi teibo ro neito ama-ou-ri womu tato auna gabamani dubu Periki aboto mea mino to tamadimo-owateai-ri.'

²⁵ Ibose boso eputa dubu ro ata peba titi owera ta-gisioidiro Gabamani dubu aboto, nedi peba ro owera nato ibo giamo.

²⁶ 'Mo Karadiasi Risiasi ie, nedi peba titi ro mo ro nisioidiro. Auna ia gabamani dubu Periki, nedi peba titi ro oro aboto ie. Oro aboto mo auna kamade ie.

²⁷ Nedi dubu ro Pauro, Iu urubia ro gorobai-rimo opia ri, kaupoti mo umoro ta-noi ibo nu Roma dubu e. Ina noudo ie mo boso urubia mutu nu nimo ro nowairiai-rimo, nu neio ro aupise kopia.

²⁸ Mo ubi ie umoro koi neio ro etou mabu ato isioidiro-dumo idaibo tanaro Pauro aboto. Ina nou mabu ato nowou Iu koto kiauri urubia neio edi karadabu ro nou aboto.

²⁹ Mo umoro nato noi Iu urubia ro gutura-rimo ibo "Pauro ro nimo simara sabi

gisebo.” Kaupoti nou modobo pua dibura to kede, o kopia iedi sabi ro nou sapuwo to.

³⁰ Mo edi tau ato nemowapotai-rimo ibo nu arua Iu urubia ro emediawado-dumo opia ri, ina nou samo to nou ri nemeiriai-die oro aboto. Ibose mo ro Iu koto kiauri urubia ta-nimowapotai, oro koto ato neio ro ba-memowauti-mo nou ro beda sabi gisebo.’

³¹ Edio duwo ro nato boso eputa dubu oweru to boso urubia ro aise gosioi-ro-rimo. Pauro imese gowodori-rimo womu tato Antipatiri sabowa ti-gorobai-rimo.

³² Ata saiki iedi 70 hosi boso urubia ro Pauro neio ro gowaboi-rimo womu tato Siseria sabowa ti-gorobai-rimo. Isana amia boso urubia Antipatiri sabowa rido ioudo aise gorowameai-rimo Ierusarema sabowa to.

³³ Hosi to edi urubia ro na-gou-rimo, neio Siseria sabowa to na-gorowateai-rimo Gabamani neio ro peba titi se gemeihai-rimo, ina Pauro neio ro iato gowapotai-rimo nou aboto.

³⁴ Taie gabamani dubu ro peba titi na-gioputi nou ro Pauro iato gemodowa. ‘Oro beda duriomoro dubu ra?’

Taie Pauro ro ibo, ‘Mo Sirisia duriomoro dubu e.’

³⁵ Gabamani ro ibo, ‘Oro koto oweru mo ro tau se emerewidiro-ri pua womu tato oro koto to edi urubia ro gedea-rimo neio neito namadidimo-orowateai-ri.’

Taie nou ro boso urubia se gimowapotai Pauro emotoi ri gabamani urubia moto gebari ato.

24

Pauro Periki koto ato gotoi

¹ 5 saiki na-goroporeai-rimo Ananaiasi nu Godi ra urubia ra turituri eputa dubu e, nu Siseria sabowa to nato godori, amia lu eputa urubia mutu, ibose neio sabi umoro dubu Teturiasi ta-gadabuai-rimo. Neio ito nou ri gou-rimo Pauro koto ato edea rie.

² Pauro gabamani owera to boso urubia ro iato gowosuruwo-rimo koto aboto.

Taie Teturiasi ro Pauro koto owera Gabamani iato gemowauti. Nou ro ibo, 'Auna ia Gabamani Periki, urubia nedi tau ro nato mea mino to orowomidiro ata boso tato ie. Mabu nimo oro ro mea se niworohutiti. Nedi muro ro oro aboudo ou-die, ibose sirio tanaro ubauba to na-iamotiti keba se, oro ro meana ta-giwai. Oro edi muro tanaro ro urubia neito iwarebaititi sirio tau.

³ Oro ro edi meamea tanaro ro na-isioidiro erere sabowa ato nimo ro ubi to nimadetiti-dumo. Nedi tanaro ro neio sapuwo to nimo ro oro aboto auna eso owera naro-dumo.

⁴ Kaupoti nimo ubi tato ie oro tuturu tau to korobidiro owera to. Oro nimo ro a-nemagege-dumo modobo ra nimo nirimagare kimati owera kainai oro ro kimewidiro sapuwo to?

⁵ Nedi dubu ro Pauro oro ro na-iauri nimo umoro ta-noi-rimo nou ata ubauba tanaro kisioidiro dubu e. lu urubia erere duriomoro ato na-orowomidiro nou ro igedioutititi ubauba tanaro isioidiro ri. Nu Nasareta patu eputa dubu e, urubia nou ro bagea gabo ato iwaboi,

⁶⁻⁷ ibose nu ubi ie Tarena Moto saro to kowaititi. Kaupoti nu nimo ro ta-nodiobo-rimo.

⁸ Nu oro ro nama-emodoruti-ri mea se, oro nakara se umoro nato ama-oi-ri ibo, mo ro edi oweru ro na-naro nou sapuwo to morobise ie.'

⁹ Ina arua Iu urubia ro na-girorowai-rimo nedi oweru ro neio ro ibo, 'Io, nedi oweru ro morobise ie!'

Pauro a-gorowairiai Periki koto abato

¹⁰ Pauro Gabamani ro eputa se gemauro-ro oweru aro ri. Ina Pauro ro ibo, 'Auna dubu, mo umoro ie oro sirio tau Iu urubia koto kiauri dubu to irarasorotiti. Ina noudo ie mo kamade ie oro aboto korowairiai oweru nama-aro-ri.

¹¹ Arua urubia oro ro nama-imodowa-ri oro nakara se umoro nato ama-oi-ri, ¹² saiki oroporeai pua, mo Ierusarema sabowa to nato nidiai Godi emowabu ri.

¹² Mo koto to edi urubia ro nedea-rimo mo neio ata ro iato owea pua urubia mutu eremaro moro ato Tarena Moto ato. Iu urubia karadabu moto ato urubia mo ro iato igediouti pua ibose Ierusarema sabowa gebari ato idaibo tanaro isioidiro pua.

¹³ Mo edio tanaro mabu ato nowapotai-dumo neio ro modobo pua mea se kowawe oro aboto.

¹⁴ Kaupoti oro mo ro nedi oweru ro nou anama-emowauti-ri, nimo nasa naminami edi na emowabutiti-mo, io mo ro nou nemowabutiti Iesu gabo na-nowasorotiti. Iu urubia ro ibo imaragoidiro-dumo Iesu edi kowasoro gabo ro morobise gabo pua. Kaupoti namabu mo ro ti-nimibiria Mose edi sabi oweru sirio ro na-iamo Tarena Buka ato, ibose Godi edi ipusu oweru urubia ro beda oweru gisioidiro-rimo mo ro ti-nimibiria.

¹⁵ Nedi urubia ro iana tau sapuwo to kimaragoidiro tiamo, ina ibose mo atu sosoro kimaragoidiro mutu nomidiro. Nedi kimaragoidiro owamo ibo tuputupu urubia, ubauba urubia mutu neio Godi ro pamo rido ama-iwame-ri.

¹⁶ Ina nou mabu rido ie mo pupuwo kasibai meamea tanaro se kisioidiro aboto Godi ra urubia ra sosoro gabo ato.

¹⁷ Mo ro Ierusarema sabowa tau se nemeserai-ro sirio kisimisi ta-niporeai daimodaimo duriomoro ato koroho. Mo dutu ata norowameai-ro Ierusarema sabowa to namabu tato urubia mani iopu nimowou-ro. Ibose mo Godi aboto dao imatowo ri nou-ro.

¹⁸ Tarena Moto ato mo ro nedi tanaro ro nou nisioidiro mo urubia ro nato nowea-rimo. Mo ro tanaro kosioidiro ta-noporeai mo meana kowai aboto, mo ro ata ubauba ata osioidiro pua Tarena Moto ato. Mo ro edi tanaro na-nosioidiro urubia keremaro tato, karado tato goroho-rimo.

¹⁹ Kaupoti muso moro rido gou-rimo edi Iu urubia ro Eisia duriomoro ato na-irowomidiroiti, mo sapuwo to oweri neio ro gisaubuti-rimo. Nedi urubia ro modobo ie paea se korowotoi oro sosoro gabo ato. Mo ro beda ubauba tanaro nisioidiro, mo neio ro kowauti modobo ie.

²⁰ Edi tau ato na-nowou-rimo Iu koto kiauri urubia aboto Ierusarema sabowa ato, neio ro beda ubauba hato gowea-rimo mo abato? Nedi Iu awawo urubia ro abora na-orowotoi oro sosoro gabo ato, neio oro ro ma-dimodowa. Neio umoro ie!

²¹ Kaupoti tanaro morobise ie Ierusarema

sabowa ato auna oweru mo ro ta-nosioidiro neio sosoro gabo ato ibo, “Mo kimibiria tiamo ibo, urubia na-orowaburo-dumo, neio pamo rido amadimi-iririburio-ri. Mo koto nou ri nowai-dumo.” ’

²² Periki umoro keba se ta-goi Iesu kowasoro gabo beda sosoro ra, taie koto nou ro iato aise godiobo. Nou ro ibo Pauro aboto, ‘Boso eputa dubu Risiiasi neito namadi-orowateai-ri, oro koto oweru kemewidiro nato anama-emoporeai-ri.’

²³ Taie Periki ro boso urubia kiauri dubu se gemowapotai Pauro nou ro dibura abato mea se iauri ri. Pauro ibose gabo nou ro aise gemodobura dibura moto goro ato oroho ri, nu ibose namuturubi ro karaturio modobo ie ohona komio, kiwarebai tanaro kisioidiro nou aboto.

Periki orobo mutu oweru Pauro ro gimowauti-ma

²⁴ Arua saiki ta-gororoporeai-rimo Periki tiro orobo mutu imese gou-rido, orobo masiro Durisira, nu Iu orobo ie. Taie Periki ro nato gutura ibo, ‘Pauro neito dowaboi-rimo.’

Taie neitiro Pauro oweru gare se gemedea-rido, Pauro ro neitiro a-gimowauti-ma ibo modobo ie Iesu Keriso sapuwo to kimibiria.

²⁵ Neitiro Pauro ro nedi oweru ro neito gimowauti-ma ibo Godi ro urubia beda sosoro ra tuputupu urubia to kiapoi. Ina nou ro ibose to gimowauti-ma tanaro kisioidiro maumo ato modobo ie kororodiobuti mutu kisioidiro, ibose womu tau ato urubia sirio Godi ro koto nato ama-iwai-ri. Nedi oweru ro Periki ro na-girorowai, nu tere ro aise gorobai. Taie nou ro ibo Pauro aboto, ‘Abora oro neido dosuruwo.

Ata mea tau ata mo ro nama-owea-ri oro mo ro nato tinama-orumai-ri.'

²⁶ Iedi atu tau ro nato Periki ubi ta-iamotiti Pauro ro mani piro se omia ri. Ina sirio tau, Pauro nou ro nou ri ororutiti oroho ri nou mutu owerera eremowauti ri.

²⁷ Periki kisimisi teibo to na-gomidiro gabamani to, iato nou bobo orio dubu ro gorobai. Nu masiro Pokiasi-Pesitasi, orio gabamani to nou ro gomi. Isana Pauro Periki ro dibura ato aise gemeserai Iu urubia kamade kiwai sapuwo to.

25

Pauro ubi ie nu koto owerera Sisa ro kemewidiro

¹ Pesitasi gabamani to edi tau ato na-gomi nou ro 3 saiki se giporeai-bi Siseria sabowa ato komidiro, taie nu ioudo imese gidiai-ro Ierusarema sabowa to.

² Godi ra urubia ra turituri awawo urubia, Iu awawo urubia mutu iato ta-garadabuti-rimo Pauro neio ro Pesitasi aboto nato gowapotai-rimo.

³ Neio ro Pesitasi iato gararatoro-rimo ibo, 'Oro ro modobo ra nimo edi ubi tanaro ro nou kosioidiro? Modobo ra Pauro oro ro neito kemeiriai koto owerera nato aro ri Ierusarema sabowa ato?'

Kaupoti Pauro Iu urubia ro sowake ta-gemedea-rimo ipi gabo ato opia rie.

⁴ Iu awawo urubia Pesitasi ro ibo gimowameai, 'Pauro Siseria sabowa ato ibose to ama-omidiro-ri, nu mo ro emeiriai-ri pua neito. Mo aupise ie korowameai Siseria sabowa to.

⁵ Ina nio edi awawo urubia ro modobo ie nato karadabuai mo mutu atu se anama-iodori-ri Siseria sabowa to. Iedi tau ro nu nio ro nato amadimo-owapotai-ri mo aboto. Nou ro morobise to ubauba tanaro na-gosioidiro nio ro nu koto ato nato kowapotai modobo ie.'

⁶ Pesitasi Ierusarema sabowa ato ta-gomidiro 8 o 10 saiki to, taie iedi saiki nou ro na-giporeai nou iato aise gorowameai-ro Siseria sabowa to Iu awawo urubia mutu.

Ina ata saiki na-gorobai Pesitasi koto sea ato imese gomi, oweri iato gemeiriai Pauro owou ri koto aboto.

⁷ Pauro edi tau ato na-gorowateai-ro koto aboto, edi Iu awawo urubia ro na-gou-rimo Ierusarema sabowa rido Pauro neio ro ta-gemowaperai-rimo turi ato imese gotoi. Taie neio ro iato gowapotai-rimo, 'Nedi dubu ro sirio awawo sabi nou ro ta-isebotiti.' Kaupoti neio ro modobo pua mea se kowawea ibo nou ro morobise to sabi ta-isebotiti.

⁸ Iedi koto ro nou abato Pauro ro neio oweri aise giaudurai nu nakara se koko sopu to kotobowa sapuwo to. Nou ro ibo, 'Mo ro ata ubauba ata osioidiro pua, Iu urubia sabi ata mo ro esebea pua. Tarena Moto sapuwo to mo ro ata sabi ata esebea pua, ibose Gabamani dubu Sisa edi sabi ata ro mo ro esebea pua.'

⁹ Kaupoti Pesitasi ubi ie Iu urubia kamade kiwai aboto. Pauro nou ro nato gemodowa, 'Oro ubi ra Ierusarema sabowa to kou? Oro neio mutu koto oweri mo ro iato anama-imewidiro-ri.'

¹⁰ Kaupoti nu Pauro ro ibo gemowameai, 'Ee! Nedi koto ro nato na-notoi Sisa sabi patu maumo ato owamo. Sisa sabi patu maumo ato mo koto kowai modobo ie. Oro imese auna umoro ie mo ro ata lu sabi ata esebea pua.

¹¹ Mo ro ata ubauba ata kosioidiro rasiri ie mabu sabi ro aro mo kopia aboto, modobo ie mo nio ro nato kopia. Mo ro utura-ri pua ibo mo opia ate mo ro morobise to sabi kesebea rasiri ie. Ata dubu ata ro modobo pua mo didi mabu ato kapoi neio aboto. Mo ubi ie nedi tau ro nato mo koto owera Roma auna gabamani dubu Sisa nou ia ro kemewidiro.'

¹² Taie nedi owera ro Pesitasi ro na-girorowai nou simara kanisere mutu se gomi neio Pauro sapuwo to owera iato geremowagomea-rimo. Taie Pesitasi ro ibo Pauro aboto, 'Oro nakara se utura-die Sisa owea ri oro koto owera nou ro emewidiro ri. Modobo ie oro Roma sabowa to kou Sisa aboto, koto owera nou ro ba-memewidiro.'

Eputa dubu Herodi-Agiripa, Pesitasi ro gemowauti Pauro sapuwo to

¹³ Arua saiki ta-goroporeai-rimo, taie eputa dubu orio Herodi-Agiripa nu medera mutu Benisi neitiro iato giodori-marō Siseria sabowa to Pesitasi araturioma ri.

¹⁴ Neitiro iato egea mere se na-gomidiro-rido, Gabamani Pesitasi ro eputa dubu Agiripa nato gemowauti Pauro koto owera sapuwo to. 'Ata dubu tomidiro-die dibura moto ato, Periki ro dibura moto ato gemeserai.

¹⁵ Mo dutu ata na-nidiai Ierusarema sabowa to Godi ra urubia ra turituri awawo urubia, Iu

awawo urubia mutu Pauro neio ro nato gowapotai-rimo. Neio ubi ie nu mo ro opia ri

¹⁶ kaupoti neio mo ro ibo nimowapotai, “Roma tanaro ibo owamo, ata mere ata na-owapotai-dumo nu nimo ro tau se omia-ri pua ubauba wisa, tau keba se nu koto to edi urubia ro na-owapotai-dioumo neio nou mutu atu se kou e, taie neio owera nato keremowameduti ie. Ibose edi dubu ro modobo ie nou korowairiai owera karo.”

¹⁷ Nedi Iu urubia ro neio mo mutu Ierusarema sabowa rido atu se norowameai-rimo Siseria sabowa to. Mo neito na-norowateai-ro mo komidiro kawa omidiro pua. Taie ata saiki na-gowaroho koto sea ato na-nomi, iato koto aise natamuai, mo ro owera iato nemeiriai Pauro owou ri koto aboto.

¹⁸ Edi tau ato gowou-rimo Iu urubia owera mutu iato gotobowa-rimo. Neio ro nu iato gowauti-rimo nou ro etou ubauba tanaro isioidirotiti. Mo ro ta-nimaragoidiro keba se ibo nu kowapotai urubia ro amadima-aro-ri nou ro awawo sabi ta-gisebo. Kaupoti neio owera mo ro na-nimewidiro awawo sabi kisebo sapuwo to aro pua.

¹⁹ Neio ro edi owera ro garo-rimo, simara kimibiria tanaro sapuwo to geremaro-rimo nou mutu. Ina ibose pamo dubu masiro Iesu nou sapuwo to geremaro-rimo. Kaupoti Pauro ro binio to garo ibo Iesu pamo pua, tomidiro.

²⁰ Mo umoro pua mea se kihoduti aboto nedi owera ro. Ina Pauro nou ri nemodowa, “Oro ubi ra Ierusarema sabowa to kou mo ro oro koto owera ina iato kemewidiro?”

²¹ Kaupoti nou ro a-gutura ibo, “Mo ubi tato ie Ierusarema to kou, mo koto ower a Sisa ro ba-memewidiro-ro Roma sabowa ato.”

Taie nou ro edi ower a ro na-gutura-ro nu mo ro Siseria ato aise nodiobo dibura ato, womu tato nu mo ro kemeiriai Roma Gabamani eputa dubu Sisa aboto.’

²² Taie eputa dubu Agiripa ro ibo Pesitasi aboto, ‘Mo ubi ie nu ower a kemewidiro aboto.’

Ina Pesitasi ro ibo, ‘Nu ower a oro ro kowaroho ama-emewidiro-ri.’

Pesitasi ro gemodowa orio Herodi-Agiripa Pauro sapuwo to

²³ Ata saiki eputa dubu orio Herodi-Agiripa nou medera Benisi mutu, neitiro meamea namabu to na-geremeduti-rido, awawo urubia beda sosoro iremedutiti-dumo neitiro neito geremeduti-rido, amura ra sagaru ra to gotoburio-rido. Taie neitiro ito aise gosuruwo-rido koto beda moto ato iamotiti. Neitiro koto aboto boso eputa urubia mutu gou-rido ibose Siseria sabowa kiauri urubia neio mutu gou-rimo. Ina Pesitasi ro arua boso urubia iato girumai Pauro owosuruo ri dibura moto rido. Pauro neio ro na-gowosuruwo-rimo dibura moto rido,

²⁴ taie Pesitasi ro ibo, ‘Eputa dubu Agiripa, ibose nio etio ro orowomidiro, nio ro tiauri-dumo nedi dubu ro, Iu urubia sirio nato na-orowomidiro, ibose Ierusarema sabowa ato na-orowomidiro neio mo aboto sirio tau serawo ower a mutu irohotiti-dioumo. Neio ro ibo, “Pauro modobo pua komidiro! Modobo ie nou kopia!”

²⁵ Kaupoti nedi dubu ro koto oweru mo ro na-nemewidiro nou ro ata ubauba ata osioidiro pua nou sapuwo to kopia ie. Nu mo ro ba-nemeiriai sabowa to, kaupoti nou ro a-gutura mo aboto ibo, “Mo koto oweru Sisa ro ba-memewidiro-ro.”

Mo ubi ta-noi nu kemeiriai Roma sabowa to, nou koto oweru Sisa ro iato emewidiro rie.

²⁶ Kaupoti mo aboto meamea kimaragoidiro oweru iamo pua nu beda oweru mutu anama-emeiriai-ri Sisa aboto. Ina noudo ie nedi dubu ro neito nowou-die nio aboto. Nio sirio se na-orowomidiro nato, auna se eputa dubu Agiripa oro aboto ou-die nedi oweru ro. Oro ro mo kowarebai sapuwo to Pauro mea se ba-demodoruti, ina mo ro mea umoro oweru nou sapuwo to nato anama-emesioidiro-ri Sisa aboto.

²⁷ Modobo pua dibura dubu Sisa aboto kemeiriai kawa kemeiriai peba titi oweru tato. Neio ro nu beda oweru sapuwo to gowapotai-rimo Sisa ro nu peba rido neido ama-emoputi-ri.’

26

Pauro korowairiai oweru garo orio

Herodi-Agiripa aboto

¹ Eputa dubu orio Herodi-Agiripa ro ibo Pauro aboto, ‘Obiri oro korowairiai sapuwo to oweru ma-daro-ro.’

Taie Pauro tu se gowotobowa, nu oweru karo iato gatamuai. Nou ro ibo,

² ‘Tu urubia beda sosoro oweru garo-rimo mo sapuwo to, neio oweru anama-imetebeai-ri.

Eputa dubu Agiripa, mo abora auna kamade mutu notobowa oro sosoro gabo ato ower a ro ri,

³ mabu oro auna umoro ie nimo Iu urubia korowomidiro tanaro beda sosoro ra, ibose nimo beda tanaro mabu rido niragegetiti-dumo. Ina nedi tau ro nato modobo ie mo ower a ro gare se kemedea.

⁴ Imese Iu urubia sirio neio auna umoro ie, mo beda sosoro nimidirotiti, simara urubia abato mere kainai na-nomidiro womu tato mo ti-nou Ierusarema sabowa to.

⁵ Mo neio mutu tuturu tau to nimidirotiti iato, neio auna umoro ie mo beda sosoro nimidirotiti. Ina neio ubi na-iamo oro kemowauti aboto oro neio ro ba-memowauti-mo, ibo mo keba se Parasi dubu to nararasorotiti. Morobise ie Iu urubia kimibiria maumo ato nimo Parasi urubia sabi sirio mea ia mino to nibodorotiti-mo, ibo pua arua Iu urubia sosoro.

⁶ Ina abora mo nou e mo Iu awawo urubia ro koto ato noti nedea-dumo, mabu mo ta-nimibiria Godi ro hodo keba se ta-gasaubiai-ro nimo nasa naminami neio aboudo.

⁷ Isiraere urubia 12 gu neio ro nou auna se emasebidirotiti-dumo nedi tanaro ro ororosioidiro ri. Neio ro duwo saiki Godi aise emowabutiti-dumo. Mona ia eputa dubu Agiripa, mo Iu urubia ro koto aboto nou ri nowapotaiddiro-dumo mabu nedi hodo kasaubiai ro nou sapuwo to ta-nimibiria

⁸ ibo morobise to gororosioidiro-rimo Godi ro Iesu pamo rido na-gowameai-ro.'

Ina Pauro aise gerewesegerai Iu urubia aboto, nou ro ibo, 'Ina mabu boira nio aboudo modobo

pua kimibiria ibo pamo urubia Godi ro kiwame?’

⁹ ‘Eputa dubu Agiripa, mo ro ibo ta-nimaragoidiro modobo ie mo ro sirio tanaro kisioidiro Nasareta sabowa dubu Iesu nou kowasoro urubia ubauba kiwaititi aboto.

¹⁰ Ina edi tanaro ro kisioidiro mo ro aise nitamuai Ierusarema sabowa ato. Godi ra urubia ra turituri awawo urubia mo neio ro pupuwo oweri iato nomia-rimo Godi edi tarena urubia ro mo ro irobo ri ina dibura to iaremo ri. Ibose Iesu kowasoro urubia Iu urubia ro na-iopiautiti-mo, mo ro ibo nimaragoidirotiti io mea tanaro ie, mo ibose ubi ta-noititi Iesu kowasoro urubia kiopiauti aboto.

¹¹ Iu urubia edi karadabu moto sirio ro mo neito na-nidoutiti Iesu urubia mo ro ta-niadotiti. Mo pupuwo auna se nasibawadotiti Iesu kowasoro urubia ro nou masiro ubauba kowaititi aboto. Mo auna serawo ro owamotiti neio aboto, ina noudo ie muso duriomoro to aise nirohotiti Iesu kowasoro urubia iado ri, ibose dibura to iaremo ri.

¹² Eputa dubu Agiripa, ata tau mo ro pupuwo oweri ta-nimidai-ro Godi ra urubia ra turituri awawo urubia aboudo. Neio ro mo peba titi oweri ta-nemesioidiro-rimo nou mutu nemeiriai-rimo Damasikasi sabowa to, Iesu kowasoro urubia ubauba iwaititi ri.

¹³ Mo ito na-nou ipi gabo ato, saiki turi ie naio, pina benenio mutu nato gerememiai-ro toboro rido. Iedi pina ro ibo pua saiki sosoro, imese benenio ia ie.

¹⁴ Taie edi kerememiai ro na-gerememiai-ro, mo edi urubia mutu na-nou atu se aise norowaburuti-rimo goto ato imese nirobu. Taie iato mo ro oweri kodu se nirorowai

na-gutura-ro mo simara owerato, “Sauro! Sauro! Mo oro ro temeteme etou mabu ato nomiotiti? Oro giro batina ie, nou ri ireisorowadotiti. Mo oro ro ubauba na-nowaititi, oro nakara se orowaititi ubauba.”

¹⁵ Ina mo ro nu ibo nemowameai, “Auna dubu, oro etu ra?”

Ina Abera Naramu ro ibo, “Mo Iesu e, mo oro ro nomiotiti temeteme.

¹⁶ Oro abora deribua, ta-narapoi mo woko emesioidiro ri. Abora oro ro etou tanaro owea, ina ido oro aboto beda tanaro ra nama-iwawuti-ri, urubia oro ro neito ama-imowauti-ri. Mo abora oro aboto nou ri norowapotai-die.

¹⁷ Nedi saiki ro neido na-waratamuai oro mo ro anama-owairiawado-ri Iu urubia aboudo ibose Iu owerakaro tato urubia aboudo. Oro mo ro neio aboto nemeiriai

¹⁸ neio idomari imodobuti ri, neio sisibo maumo rido amadimo-osuwoduti-ri Godi edi woroworo ro neito. Neio amadima-aragarewado-ri Satani tu rido Godi aboto. Ina mo ro neio ubauba nato anama-imatopeamuti-ri. Keba se mo sapuwo to etio ro gimibiria-rimo neio mutu anama-idabuti-ri, ibose neio mo ro tarena anama-iwai-ri mabu neio kimibiria urubia ie. Neio mo mutu atu se anama-irowomidiro-ri.”

¹⁹ Io eputa dubu Agiripa mo ro edi tanaro ro na-nowea, hiwo to kiauri sosoro niauri toboro ato edi tanaro ro gorosioidiro-ro. Iedi oweraro mo ro na-nirorowai taie iedi tanaro ro mo ro aise nisioidiro.

²⁰ Nedi oweraro urubia neito nimowautiti ubauba aboudo erewesegerai ri Godi aboto. Ina

neio modobo ie Godi ubi tanaro se kisioidiro ibo neio morobise to ta-gerewesegerai-dumo ubauba aboudo. Mo ro keba se nedi oweru ro kimowauti Damasikasi sabowa ato natamuai ina ioudo nidiai Ierusarema sabowa to urubia iato imowauti ri. Ina Iudia duriomoro gebari ato edi sabowa sirio ro na-iamo, edi atu oweru ro ta-nimowautititi. Ina ioudo mo ta-nirohotiti Iu oweru karo tato urubia aboto, nedi oweru ro imowauti ri.

²¹ Ina mo nou mabu ato norobai-rimo Tarena Moto ato, neio ubi ie mo opia ri.

²² Kaupoti mo Godi ro ti-nowarebidiro-titi-die, ina abora noudo notoi oro sosoro gabo ato. Nio abora etio ro orowomidiro kainakaina idaro awawo masiro mutu, mo ro edi tanaro ro na-niauri nio mo ro nou nimowauti. Nedi oweru ro nio mo ro na-nimowauti atu sosoro oweru ie, keba se ta-gisioidiro-rimo Godi ipusu oweru urubia ro Mose mutu, ibo etou tanaro ro amadimo-ororosioidiro-ri

²³ Godi ro kohodowa dubu aboto, nu temeteme ama-iwia-ri, amadimo-opia-ri, ina nou keba dubu e Godi ro kowameai pamo rido. Nedi dubu ro nou ro amadi-owou-ri auna ia woroworo nou simara Iu urubia aboto, ibose Iu oweru karo tato urubia aboto.'

Pauro ubi e nu oweru eputa dubu Agiripa ro kimibiria

²⁴ Pauro ro edi oweru garo koto abato, nou korowairiai sapuwo to gabamani dubu Pesitasi ro na-girorowai Pauro nou ro aise gemaea. 'Pauro! Oro kawakawa ro ta-worobai! Oro auna sikuru ro gemowai eputa ubauba, neido ie oro kimaragoidiro tato oweru karo!'

25 Pauro ro ibo, 'Mona ia gabamani Pesitasi, mo ibo pua kawakawa ro korobai. Mo ro edio oweru ro na-naro ibo pua karasaubuti oweru, morobise oweru ie. Mo ro mea kimaragoidiro oweru naru.

26 Eputa dubu Agiripa, (oro) umoro tiamo, mo ro paea se beda oweru naru. Mabu iedi tanaro ro Iesu sapuwo to na-gororosioidiro-rimo piro se ororosioidiro pua, paea se gororosioidiro-rimo.'

27 Ina Pauro aise gerewesegerai Agiripa aboto. 'Eputa dubu Agiripa, Godi ipusu oweru urubia ro edi oweru ro garo-rimo oro ro a-gimibiria ra? Mo umoro ie oro ro ta-gimibiria.'

28 Taie Agiripa ro ibo, 'Oro kimaragoidiro ibo a-iamo ra, nedi komukere tau ro nato mo Iesu kowasoro dubu to oro ro owasaudai ri?'

29 Pauro ro ibo, 'Komukere tau o tuturu tau auna tanaro pua. Mo ro Godi anama-araratoro-ri oro owasaudai ri Iesu kowasoro dubu to kararapoi ie. Ibo pua oro se kowasaudai, ibose mo oweru gare etio ro nemedea-dioumo abora, nio atu se mo ubi ie kiwasaudai Iesu kowasoro urubia to kararapoi. Mo beda sosoro nimidirotiti nio modobo ie idaibo sosoro korowomidiro. Kaupoti nedi anikapo to nemotohiti-rimo nou sapuwo to aro pua!'

30-31 Ina iato eputa dubu Agiripa, gabamani dubu Pesitasi, Benisi, arua awawo urubia neio ro edi oweru ro na-girorowai-rimo, neio iato imese gosuwoduti-rimo. Neio ro ibo, 'Nedi dubu ro ata mea mabu tato ie dibura to kedea o kopia aboto.'

³² Eputa dubu Agiripa ro ibo Pesitasi aboto, 'Nedi dubu ro neitiro ro ba-nemeiriai-do sabowa to orowameai ri, kaupoti nou simara ubi ie koto owera ina Sisa ro kemewidiro.'

27

Pauro Roma sabowa to gasiriai

¹ Awawo urubia keremowagomea maumo ato neio ubi ta-goi-rimo Pauro dibura urubia mutu, Itari duriomoro to imeiriai ri, Roma sabowa gebari edi moro ato owamo. Ata boso dubu masiro Iuriasi, nu Sisa ia edi boso urubia ro nou ro emeaurititi 100 boso urubia. Ina Pauro arua dibura urubia mutu neio nou ro giauri.

² Taie nimo atu se kiwadaudiro moro ato ata sawa pe Adorimitiamo sabowa rido na-gou-ro neito aise niora-rimo. Edi sawa pe ro ito abu rie arua sabowa na-iamo Eisia duriomoro ato neito ararairioidiro rie. Ina ata dubu Tesaronika sabowa dubu e Masedonia duriomoro ato na-owamo Arisitaka nou masiro ie, nu ibose ta-garadabuai-ro nimo mutu atu se niapere-rimo,

³ Ina ata saiki ato norowateai-rimo Sidoni sabowa to. Ibose boso urubia kiauri dubu Iuriasi Pauro aboto nou ro meamea tanaro gisioidiro, gabo aise gemodobura Pauro namuturubi iraturio ri, neio ro nu mea mino to gowarebai-rimo.

⁴ Taie ata saiki Sidoni sabowa na-nemeserai-rimo imese niabu-rimo Saiporasi ura ro niwasiai, mabu gawia ubauba sapuwo rido gihuduti-ro.

⁵ Sirisia ra Pampiria ra duriomoro teibo se niwia-marimo, edi sawa pe ro na-gou-ro womu tato nimo ti-norowateai-rimo Mira sabowa to, Risia duriomoro ato owamo.

⁶ Edi sabowa ro iato ata sawa pe Arekesanidara sabowa rido gorowameai-ro ioudo abu ri Itari duriomoro to.

Nimo imese sirio se boso urubia kiauri dubu ro edi sawa pe ro neito aise niwasaudai.

⁷ Taie ioudo nasiriai-rimo sirio saiki ro gararahudirio-rimo umodi to na-niaubu-rimo. Modobo pua, nimo ro imese koko ia tau nowea-rimo womu tato Kinidasi sabowa to ti-norowateai-rimo. Mabu nimo sawa pe surama ro huru to aise gowioduti-ro, ina noudo ie modobo pua ito aise kou aboto. Taie ina ioudo aise niabu-rimo ata sapuwo to, ata ura towadaudio masiro Kiriti, nou ro niwasiai. Saramoni ura kainai bato owadaudio, edi turi ro neido keresia koko ia ie.

⁸ Ina ioudo na-nasiriai-rimo a-nou-rimo womu tato Mea Ibi sabowa ti-norobai-rimo Rasea sabowa gomo ato na-owamo.

⁹ Nimo ro mea tau ta-naraseperai-rimo sawa pe to koroho, mabu auna tau ta-noporeai-rimo ipi ato.

Taie neio Pauro ro umoro owera nato gimia,

¹⁰ 'Urubia, nato morodiobo-rimo, nedi tau ro nato kaimai ato nedi sawa pe ro namabu, urubia mutu amadima-araraseperai-ri.'

¹¹ Kaupoti sawa pe edi dubu ro na-giauri ina sawa pe abera ia neitiro ubi tato goi-rido, edi owera ro Pauro ro na-garo. Boso urubia kiauri

dubu ro neitiro edi owera ro nou ro ubi to aise gomidai.

¹² Neio sirio se ibo gimaragoidiro-rimo, sawa pe edi moro ato na-gowadaudio mea moro pua kowadaudio aboto kukamo tau ato. Modobo pua nato korobuti, ata mea moro to kaimai modobo ie. Taie neio ro ibo, 'Nedi sawa pe ro kowatupia modobo ie Ponikisi sabowa to, kukamo tau iato kemasebidiro modobo ie.'

Ponikisi sabowa Kiriti ura ibi ato na-owamo gawia ra surama ra aboudo sawa pe ito iwopiroititi-dumo.

Pauro urubia mutu buru oromo ato auna surama ro giwia

¹³ Sawa pe woko urubia ro na-gowea-rimo gawia kainai na-gihudurai-ro, neio ro ibo, 'Nou modobo gawia ro ihudurai-die nimo idaibo tau ato masiriai-rimo, modobo ato namadimi-iapere-ri Ponikisi sabowa to.'

Taie woko urubia ro aga na-giwioro-rimo sawa kimobodorouti ioudo imese nasiriai-rimo. Iedi sawa pe ro Kiriti ura gomo ato gapere-ro.

¹⁴ Kaupoti tuturu to pua auna ia surama bubu nato giwomi-ro Kiriti ura sapuwo rido.

¹⁵ Iedi sawa pe ro ito kereisia modobo pua, surama ro ioudo aise gowioduti-ro. Nimo ro edi sawa pe ro aise noupiriai-rimo mabu surama kameai modobo pua, surama ro se nihuduti-ro

¹⁶⁻¹⁷ womu tato Kauda ura ti-norohodorai-rimo.

Nimo dinigi aupise gowamo bukopu ro keherai, auna koko tau nowea-rimo kowioro aboto. Ina woko urubia ro hodo to na-gemotohiti-rimo koko ti-gemowaititi-rimo.

Taie sawa pe awawo hodo to iato gemotohiti-rimo, sapuwo bara rido sapuwo bara to imese koko kemowaititi sapuwo to. Neio nou tere ro giwati nedi sawa pe ro modobo pua Siritisi koriri to kotomuti iato bukopu ro kepeputi. Ina nou mabu ato ie neio ro sawa aise giwororuwoidiro-rimo, iedi sawa pe ro surama ro se gohuduti-ro.

¹⁸ Ina ata saiki ato surama auna ia se gaduduro-ro imese kainai se ihuduti pua. Sawa pe ato beda nakomu ro giamo pe woko urubia ro aise gihere-rimo obo to.

¹⁹ Ina ata saiki ato sawa pe woko namabu sirio, tu gabogabo aise geremerebai-rimo ina ibose to gihere-rimo obo to.

²⁰ Nimo ro na-niaurititi-mo ibo saiki mea se idiawadotiti pua ibose kiboni toboro ato irowotoititi pua mabu buru oromo surama ro imese ubauba ia ta-gowai. Nimo a-nimaragoidirotiti-mo ibo nimo keremiro anamadimi-iaseperai-ri.

²¹ Nimo edi sawa pe ro nato tuturu tau to nirowomidiro kiho tato. Taie Pauro aise gotobowa neio turituri ato nou ro ibo, 'Nio aboto mo ro keba se owera ta-naro ibo modobo pua nimo neido kaimai. Nio ro mo owera kirorowai rasiri ie nedi ubauba ro nimo ro owea-ri pua.

²² Kaupoti nio mo ro a-nimowapotai modobo ie koko se korowotoi, ina nio ata pamo owea-ri pua kaupoti nakomu, nimo ro nedi sawa pe ro nou se anamadima-aseperai-ri.

²³ Mo ro Godi sowake nemoworohutititi, mo nou do ie. Nedi duwo ro nato mo hiwo

na-norobu Godi sowake urio mo aboto
ta-wou-ro.

²⁴ Nou ro ibo, “Pauro oro tere na ie, oro
ama-orowateai-ri Sisa aboto, ibose oro nou ro
koto owera gare ama-emedea-ri. Godi ro
ta-giapoi-ro nedi urubia ro oro aboto neio
keremiro araraseperai-ri pua.”

²⁵ Ina noudo ie nio modobo pua tere ro
na-iwati, nio modobo ie koko se korowotoi. Mo
Godi owera ti-nimibiria beda tanaro
namadimo-ororosioihiro-ri io sowake urio
owera gabo modobo ato
amadimo-ororosioihiro-ri.

²⁶ Kaupoti sawa pe ata ura to bukopu ro
amadimo-owidiai-ri, taie iato aise
amadime-eteamuti-ri.’

*Pauro edi sawa pe to gou bukopu ro gepeputi
koriri Ato*

²⁷ Nimo 14 duwo ro na-nirobai surama ro
Meditereni buru oromo ato niworohuti. Sawa
pe woko urubia a-gimaragoidiro-rimo duwo turi
ato ibo etu umoro ra nimo sopu to aupise ie
korowateai.

²⁸ Taie neio redi hodo nou ri gehere-rimo obo
mako na-godoburio-rimo, keba se
na-geherai-rimo obo mako a-gowamo ibo 40
mita nou gowea-rimo. Ina iato na-geherai-rimo
obo mako ta-gororumaidiro-ro 30 mita to.

²⁹ Taie neio iato tere ro girobai mabu modobo
pua sawa pe nadi ato kodoromuti. Taie neio aise
gorowadoro-rimo netewa netewa aga iato
giheruti-rimo wapo rido, taie Godi neio ro iato
gararatoro-rimo saiki hio ito kowaroho sapuwo
to.

³⁰ Ibose arua sawa pe woko urubia ubi a-giamo korowadau, neio ro dinigi iato imese gowororuwo-rimo obo to. Neio bagea to garo-rimo, 'Nimo aga wamea rido anamadimi-imudidiro-ri.'

³¹ Pauro ta-geremasibai ibo sawa pe woko urubia orowadau rie. Nou ro boso urubia kiauri dubu nato gemowapotai arua boso urubia mutu ibo, 'Nedi urubia ro sawa pe ato korowomidiro tato nimo atu se keremiro anamadimi-iaseperai-ri.'

³² Ina boso urubia umoro na-goi-rimo taie neio iato gorowadoro-rimo, dinigi hodo aise gemasiouti-rimo, edi dinigi ro obo ro imese gowadau.

³³ Taie saiki kowaroho aupiaupi Pauro ro neio nato gimadowerai auna oweri to ibo, 'Nedi 14 saiki ro na-gororoporeai-dumo nio korowomidiro kawa irowomidiro-titi ohona iho tato, norou tato, aise irarowotiti-rimo.'

³⁴ Abora nio mo ro a-nimowapotai ohona diho-mo keremiro sapuwo to. Nio ata keremiro aseperai-ri pua, ata nakomu ata ro iari-ri pua.'

³⁵ Taie Pauro beredi na-gomidai-ro eso oweri iato garo Godi aboto neio sosoro gabo ato taie aise gouho.

³⁶ Pauro neio ro na-gowea-rimo nou ro edi tanaro ro na-gosoidiro neio nou ro pupuwo gimowai. Neio iato simara ohona na-gimade-rimo imese giho-rimo.

³⁷ Iedi sawa pe ro nato 276 urubia neio ro gorowomidiro.

³⁸ Kiho na-goroporeai taie, neio ro ata woko iato gemeiriai-rimo sawa pe toutou kowai sapuwo to. Neio ro woiti baiko iato gipedu-rimo obo to sawa pe toutou neito gowai-rimo.

³⁹ Taie iato tuturu to pua saiki bani na-giwotowa-ro sawa pe woko urubia neido na-girarowea-rimo neio ro duriomoro se gowea-rimo. Ina nedi duriomoro ro neio ro eibimai pua, kaupoti neio ro koriri se gowea-rimo ibi ato na-gowamo-ro. Neio ubi ibo giamo nedi sawa pe ro nedi koriri ro neito owidiai ri,

⁴⁰ ina aga neio ro iaubo pua, hodo aise giasiuoti-rimo aga imese giroruwoi-ro. Iedi atu tau ro nato kemohotidiro aibi teibo edi hodo teibo ro gorobidiro-rido neio ro aise giasiai-marimo, taie wamea ato edi sawa ro gotoi nou se gemobodorai-rimo.

Iedi sawa pe ro surama ro neido na-gohuduti imese imese,

⁴¹ womu tato wamea koriri to ti-gotomai. Koriri ato iato aise girimuba modobo pua ioudo karaubai aboto. Kaupoti bukopu eputa neido na-giarioidiro-rimo iedi sawa pe ro wapo rido aise geteamuti.

⁴² Ina Roma boso urubia ubi ie dibura urubia iopiauti ri, mabu neio ubi tato ie dibura urubia korowadau.

⁴³ Ina boso urubia kiauri dubu Iuriasi nou ubi tato ie Pauro kopia, Pauro arua dibura urubia mutu nou ro a-giwairiai idaibo mino to. Taie urubia nou ro nato gimowapotai, 'Nio etio ra

pepeduo umoro ramutu nio ba-dererepeduti-mo
ba-dairoidiro-mo keba se koriri to.

⁴⁴ Nio arua pe kanakere to ba-dairoidiro-mo.'

Io urubia sirio idaibo sosoro gairoidiro-rimo
koriri to neio ata keremiro araseperai pua.

28

Pauro Marata ura ato gomidiro

¹ Nimo na-niariroidiro-rimo iedi koriri ro neito,
nimo umoro nato noi-rimo ibo, nedi ura ro
masiro Marata ura ie.

² Iedi urubia iato na-gorowomidiro neio ro
nimo mea mino to niwarebai-rimo, mabu edi
tau ro nato auna ia daroho ro garo, nimo imese
kukamo ro niwati, taie urubia ro auna ia era
iato nimaduruti-rimo.

³ Pauro era agagi ioudo na-giwosuruwo-ro aise
giatowea. Ina bagawe era korosa tere ri ioudo
na-gosuwoidiro-ro Pauro tu ato aise gagegeai,

⁴⁻⁶ iato nou ro aise gepesuai era to.

Sabowa urubia ro Pauro na-gowea-rimo
bagawe tu rido na-gororidiro, neio ro ibo, 'Nou
ro ata dubu ata keba se ta-gopia ina nu nou ri
agegeai. Obo to kororuwo egea se
godobowauti-dumo, abora nu nato aise
ama-araburai-ri.'

Urubia egea se geremasebidiro-rimo kikiou
erereihuti ri, nu idomari to se gemowotoi-rimo,
pamo araburuti ri. Kaupoti nou abato ata tanaro
ata ororosoidiro pua, ina urubia ro nato
gutura-rimo, 'Nedi dubu ro orora dubu e, meana
nakara se ta-worowai.'

⁷ Marata ura edi dubu ro na-iaurititi nou
masiro Pabiriasi nedi tanaro ro

na-gororosioi diro nou goto kere abato
gororosioi diro. Nimo nou ro sirio se aise
niramairiai-ro nou moto ato iato norowomidiro
netewa didi saiki to, nimo nou ro mea se
niwarebai.

⁸ Iedi tau ro nato Pabiriasi abera auna
temeteme ro gorobai-rimo nou kabena ro
gowati obo neke karima mutu wiritititi, aise
orobutititi. Taie Pauro neido na-gou temeteme
dubu aboto nou sapuwo to Godi iato gararatoro
ina tu teibo iato giedea-ma nou durupi ato. Taie
edi dubu ro nou ro meana aise gowai.

⁹ Nou saro gabo ato urubia umoro na-goi-rimo
Pauro ro beda tanaro gosioi diro, temeteme
urubia iato goroho-rimo nou aboto, neio meana
nou ro aise giwaititi.

¹⁰ Iedi sabowa urubia ro nimo neio ro mea
mino to niwarebidirotiti-mo, ina kasiriai
aupiaupi nimo neio ro namabu to erere se iato
niwarebai-rimo.

Pauro aupise ie korowateai Roma sabowa to

¹¹ Nimo Marata ura ato 3 sogomi to
norowomidiro, taie ata sawa pe to aise
niora-rimo. Iedi sawa pe ro Arekesanidara
sabowa rido gabu-ro, Isipi duriomoro ato
na-owamo. Awawo bukupu tau na-gorobai iedi
sawa pe ro iato gowadaudi ro Marata ura ato.
Iedi sawa pe ro wamea ato ota titi teibo
ta-gisioi diro-marimo, edi ota titi teibo ro
edemuai orora dubu teibo ie neitiro masiro ibo
iamo-ma Kasita ra Porukisi ra.

¹² Taie nimo Marata ura rido na-niora-rimo
imese niabu-rimo Serikusi sabowa

ti-norobai-rimo, iato netewa didi saiki to norowomidiro.

¹³ Ina ioudo nasiriai-rimo imese niabu-rimo ata sabowa to masiro Regiam.

Ina ata saiki na-gowaroho gawia kainai mea se giwadudumai-ro taie nimo ioudo imese niabu-rimo womu tato Puteuri sabowa ti-norobai-rimo ata saiki ato.

¹⁴ Puteuri sabowa ato kimibiria urubia nimo ro iato niwia-rimo, neio ro aise nidiobo-rimo nimo iato kaupoti woiki to orowomidiro ri.

Ina ioudo sairo to aise nasiriai-rimo Roma sabowa nemou-rimo.

¹⁵ Kimibiria namuturubi iato na-gorowomidiro Roma sabowa ato, neio ro na-girorowai-rimo ibo nimo aupise ie korowateai, taie Roma sabowa rido kimibiria urubia sirio ioudo gou-rimo nimo mutu ipi ato ororowea ri. Arua Roma kimibiria urubia neio Apiasi maketo moro ato niwia-rimo. Arua neio ata sabowa ato niwia-rimo apira urubia kirobuti moto peteibi iedi moro ato witoititi-bimo. Neio Pauro ro na-giwia, nu neio ro pupuwo bo gemowai-rimo, ina Godi aboto eso owera iato garo.

Io nimo idaibo sosoro nou-rimo Roma sabowa to.

Pauro ro Roma sabowa ato urubia Iesu sapuwo to gimowauti

¹⁶ Nimo ito na-norowateai-rimo Roma sabowa to Pauro nakara moto gemapoi-rimo nato imidirotiti. Kaupoti nu kemotoi dubu ro aise emotoititi.

¹⁷ Taie netewa didi saiki peteibi na-goroporeai-birimo, Pauro ro Iu eputa urubia

aboto owerá iato gemeiriai nou aboto ou ri. Neio na-gou-rimo nou ro nato gimowauti nedi owerá ro. Nou ro ibo, 'Mo borubi Iu urubia, mo ro ata ubauba tanaro ata osioidiro pua nimo simara urubia aboto, nimo nasa naminami beda tanaro isioidirotiti-mo mo ro neio ubauba iwaititi pua. Kaupoti mo Iu urubia ro Ierusarema sabowa ato norobai-rimo, ina mo Roma gabamani tu to neio ro aise nedeá-rimo.

¹⁸ Mo Roma gabamani urubia ro na-nemodoruti-rimo mo abato neio ro ata ubauba ata owea pua, ina mo etou mabu rido anamadimo-opia-ri? Mo gabamani dubu ro emeiriai rie sabowa to,

¹⁹ kaupoti Iu urubia ubi tato goi-rimo. Ina mo ata gabo tato ie, nou ri nutura mo koto owerá modobo ie auna gabamani Sisa nou ro kemewidiro. Kaupoti mo neito na-nou-die ibo pua Iu urubia koto ato iedeá ri.

²⁰ Nio mo ro ta-nimowapotai nio mutu eremowauti ri. Mabu mo ro ta-nimibiria Godi ro beda hodo gasaubiai nimo nasa naminami aboudo ibo Godi ro kohodowa dubu nimo aboto amadi-emeiriai-ri. Ina nimo Isiraere urubia nou nemasebidirotiti-dumo. Mo anikapo mutu nou mabu ato nimidirotiti!'

²¹ Pauro neio ro ibo gemowameai-rimo, 'Oro sapuwo to nimo ro ata peba titi ata imidai pua Iu urubia aboudo Iudia duriomoro ato na-orowomidiro. Ibose Iu urubia ioudo na-iabudiro-rimo neito, nimo neio ro ata ubauba owerá ata oro sapuwo to imowauti pua.

²² Kaupoti oro kimaragoidiro owerá nimo ubi ie kirowidiro aboto. Mabu sirio urubia arua

duriomoro ato na-orowomidiro nedi oweru ro
neito eremowagomea-dumo ibo iedi kimibiria
patu urubia ro neio bagea gabo obodoro-dumo.'

²³ Iedi keremowagomea ro nou saro gabo ato,
Pauro Iu eputa urubia mutu ata saiki iato
gohodowa-rimo neio ina aradabuai ri Pauro
abato. Taie iedi keremowagomea saiki ro
na-gorobai Iu urubia sirio ina aise gou-rimo
Pauro beda moto ato imidirotiti neio neito
garadabuti-rimo. Taie Pauro oweru karo iato
gatamuai neio kimowauti, imese saiki tuturu
ta-gorowomidirowado-ro womu tato duwo ro
ti-giatimai-ro. Nou auna se a-gotoi Mose sabi ato
beda sosoro oweru ro iamo ina Godi ipusu
oweru urubia ro beda oweru ra
na-gisioidiro-rimo urubia nou ro edi Tarena
Buka oweru ro neito gimowauti Iesu sapuwo to.
Nou ro neio ibose ta-gimowauti Godi ro kiwaboi
tanaro nou sapuwo to.

²⁴ Nedi oweru ro Pauro ro na-gimowauti arua
urubia ro se gimibiria-rimo, kaupoti arua ro
imibiria pua.

²⁵ Ina iedi urubia patu teibo ro oweru
a-geremowameduti-rimo.

Iedi keremowagomea moro ro
na-gemeserai-rimo, Pauro ro nedi iana oweru ro
nou gimowauti. 'Tarena Urio morobise oweru
garo-ro nio nasa naminami aboto. Nedi oweru
ro Godi ipusu oweru dubu Aisaia aboto keba se
ta-garo-ro nio nasaio nou ro neito gimowauti,

²⁶ *Ba-dou nedi urubia ro neio aboto, ibo
ba-daro. Nio ro oweru amadimi-irowidiro-ri,
amadimi-irowidiro-ri. Kaupoti oweru maumo nio*

ro mea mino to imade-ri pua. Tanaro nio ro amadimi-iauri-ri, amadimi-iauri-ri kaupoti nio ro maumo mea se ieibimo-ri pua.

²⁷ *Mabu nio eputa imese koko ia ie. Nio gare tato ie, oweru mea se irowidiro-ri pua, idomari kiopai se irowomidiro. Nio idomari mea se kidobura rasiri ie nio ro tanaro mea se umoro ba-goi-rimo. Nio ro simara gare to mea se kemedea rasiri ie, nio ro oweru maumo mea se ba-gimade-rimo. Nio ro etu umoro ra kimaragoidiro to mea se ba-gowea-rimo, ina nio mo aboto nato ba-gorowameai-rimo nio mo ro meana nato ba-niwaititi.'*

²⁸⁻²⁹ *Ina Pauro ro ata oweru iato gadabuai ibo, 'Nio Iu urubia umoro ba-doi-mo ibo Godi edi kiapopo tanaro ro ta-gowapotai-ro Iu oweru karo tato urubia aboto. Neio ia ro amadimi-imade-ri mea se.'*

³⁰ *Pauro netewa teibo kisimisi teibo ta-giporeai-ma komidiro nakara moto ato. Nou beda urubia ro waraturiotiti-mo neio nou ro kamade mutu iramairititi-ro.*

³¹ *Urubia nou ro tere tato se imowautiti Godi ro kiwabo tanaro sapuwo to. Nou ro ibose Abera Naramu Iesu Keriso sapuwo to ta-itamudiroititi, nu oweru karo aboudo ata ro odiobutiti pua.*

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4